


*ANG UMALABOT NGA
PULOY-ANAN
SA LANGITNONG PAMANHONON
UG
SA YUTAN-ONG PANGASAW-ONON*

 Magpabilin kita sa pagtindog sa makadiyut, samtang ginayukbo nato ang atong mga kasingkasing karon sa atubangan sa Dios.

² Langitnon namong Amahan, mapasalamaton gayud kami tungod sa pribilihiyo nga maania dinhi karong adlaw, nga nagkatigum diha sa Ngalan ni Ginoong Jesus. Among ginaampo nga pasayloon Mo unta ang among mga sala, ug samtang ania kami aron isentro ang among pagtagad ngadto sa Eternal nga mga butang ug sa Kinabuhi nga lagpas na sa mortal nga panabot. Karon ginaampo sab namo nga itugyan Mo kanamo ang Imong mga paggiya, bahin sa kung unsaon namo sa paggawi, sa kung unsay angay namong buhaton sa umalabot, ug bisan sa karon, aron nga maangkon namo ang maong bahin nga . . . gikasaad kanamo.

³ Daghan ang mga may sakit ug mga nanginahanglan sa kayutaan, ug wala pa nila matapos ang ilang panaw. Ug ang among dakung kaaway, dili lang nga among kaaway, kondili ang Imong kaaway usab, mianhi siya aron dauton sila ug aron—aron tapuson ang ilang kinabuhi, ug aron dalhon sila ngadto sa—sa sayo nga pagkamatay. Ug nagapangamuyo kami alang kanila, nga Ikaw ug ang Imong kalooy ug grasya, Ginoo, maglugway pa unta sa ilang mga adlaw hangtud sa gitagana nga panahon.

⁴ Dinhi sa entablado, o sa pulpito, aniay napahimutang nga mga panyo ug gagmay'ng mga panapton. Ug dinha sa mga pasilyo ug sa tibuok bilding, dunay mga nanaghigda diha sa mga higdaanan, og mga yayunganan, mga may sakit ug mga nanag-antus, nga nagatindog sa taliwala sa mga mananambong nga halos wala na'y igong kusog aron sa pagtindog.

⁵ Oh Eternal nga Dios, ang Maong Mapanalanginon, dunggon Mo unta ang among pag-ampo niining buntaga, pinaagi sa Dugo ni Ginoong Jesus; nga dili ginatan-aw ang among kasal-anan,

kondili hingsayran ra nga Siya ang mipuli kanamo, ug Siya Mao ang nagarepresentar kanamo alang niini nga pag-ampo. Hinaut nga mamaayo ang matag usa alang sa Imong kahimayaan, Ginoo.

⁶ Panalangini kini nga mga panyo. Sa diha nga maipahimutang na kini ngadto sa mga may sakit, hinaut nga mangaayo gayud sila.

⁷ Ug karon, Amahan, hangtud sa among pagpaabot sa dakung panerbisyo sa pagpang-ayo, nga ginatoohan namo nga mosunod na, ablihi para kanamo ang dalan sa Kinabuhi, Ginoo, aron nga masayran namo pinaagi sa Imong Pulong ang angay namong buhaton. Kay amo kining ginapangamuyo sa Ngalan ni Jesus. Amen.

⁸ Sa kanunay, ginaisip ko kini nga usa sa akong pinakadakung mga pribilihiyo, ang maania sa balay sa Dios ug aron mamulong ngadto sa Iyang mga katawohan. Ug karon nasayod ko nga nagkadasok na gyud dinhi, ug aduna baya ko'y hataas kaayo nga leksyon. Busa akong . . . ako—nagasalig ako nga—nga mahimong komportable kamo, kung mahimo unta, hangtud nga matapos nato ang Mensahe.

⁹ Bueno, mainit gayud, apan mapasalamaton gihapon kita tungod sa air conditioner. Pero, sa pundok nga ingon-ini ka daghan, walay air conditioner nga makasugakod niini, kita n'yo, tungod kay ang inyo mismong lawas usa man ka yunit nga nagahatag og kainit, nga halos nubenta'y-otso nga temperatura, ug kanunay kanang nagapagawas og kainit, ug tungod nga magkaduol pa gyud nga nagalingkod. Apan ako—nagasalig ako nga himoon kamo sa Dios nga komportable gayud.

¹⁰ Ug sa diha nga anaa kita sa, ingon niining gipahigayon nga mga panagtigum, ako—dili ko man kamo paanhion dinhi, sa unsa mang hinungdan, kung sa tan-aw kong dili kini makatabang kaninyo, kung sa tan-aw kong dili kini makahatag og maayo kaninyo, ug kon dili man gani kamo makabeneplisyo, sa inyong pagtambong. Ug gawas niana, nasayod sab ko nga wala na kita'y igong panahon aron sa pagbuhat niini, ingon nga kita'y—haduol na kita sa—sa nagahinapos na gayud nga mga oras, ug ako—ginatinguha ko usab nga mahimong mahinungdanon ang matag gutlo, nga mahimo ko, alang sa Iyang Gingharian. Ug karon nagasalig ako nga panalanginan kita sa Ginoong Dios samtang nagkatigum kita.

¹¹ Ug buut kong sultihan kamo, nga, kagahapon miadto ako sa nagkadaiyang mga lugar, giduaw ko ang pipila ka mga masakiton ug mga nagaantus, nga anaa sa mga motel, ug nahimamat ko usab niining semanaha ang uban sa mga tigdumala, sa pipila ka mga lugar nga kan-anan. Sama sa, Ranch House nga akong naadtoan niining semanaha, dinhi ra dapit, ug gilamano ako sa maong tigdumala sa dihang pagawas na unta kami. Ug ingon niya, gitawag ko niya, “Igsong Branham.”

Natingala ko kon ngano kaha nga nakaila siya nako. Ug ingon niya . . .

Ingon ko, “Ikaw ba ang tigdumala?”

¹² Ingon siya, “Ako mao ang tag-iya.” Ug dayon miingon siya, “Oo, ang imong mga miyembro nagaanhi man dinhi para mangaon, inig gikan didto.” Miingon, “Sila . . .”

Ug miingon ko, “Bueno, nagkapunsisok gyud siguro sila dinhi sa inyo.”

¹³ Ingon niya, “Sir, usa baya sila sa pinakabuutan nga pundok sa mga tawo nga akong nakita sukad.” Ingon pa siya, “Sila’y mga buutan gayud.”

¹⁴ Miadto ako sa usa ka motel kagahapon, aron duawon ang usa ka batan-ong babaye nga gusto kong istoryahon, atua pud ang iyang amahan ug inahan, ug kinahanglan ko man unang adtoan ang tigdumala para hibaloon kung asa ba ang—ang mot-. . . ang lawak nga ilang nahimutangan.

¹⁵ Ingon siya, “Ug ikaw ba si Igsoong Branham?” Didto kana sa Oaks.

Ug miingon ko, “Oo, sir.”

¹⁶ Ingon siya, “Gusto ko unta nga makiglamano kanimo.” Ingon siya . . . Gipaila-ila pud ko niya sa iyang asawa; buutan kaayo nga magtiayon. Ingon sila, “Ang tanang tawo dinhi sa motel motambong man sa imong mga panerbisyo. Mao nga amo na kining gigahin para kanila.” Ug ingon pa, “Gibalibaran na sab namo ang tanang uban pa namong mga kostumer.”

Ug miingon ko, “Bueno, ginapasalamatan ko kamo tungod niana.”

¹⁷ Ingon siya, “Igsoong Branham, ang usa sa pinakabuutan nga pundok sa mga tawo nga akong nakita sukad-sukad, mao gayud ang mga tawo nga nagaanhi dinhi, nga nagatambong sa imong mga panagtigum.”

¹⁸ Niadtong miaging gabii miadto ko sa usa nako ka higala, si Mr. Becker nga taga dinhi ra pud, ug kaniadto pa ganahan na gyud ko sa iyang sandwich. Siya’y usa gayud ka . . . Siya, kaila ko na siya niadtong batan-on pa ako; kaila ko na siya sa tibuok kong kinabuhi. Adunay magtiayon nga naglingkod didto sa—sa maong karaan na nga lugar, didto sa may Riverside Hotel. Busa sila . . . miingon si Mr. Becker, “Billy?”

¹⁹ Ingon ko, “Unsa man, Homer?” Magkaila na man kaayo mi sa usa’g usa.

Ingon siya, “Ginapakaon baya nako ang tanan mong mga miyembro didto.”

²⁰ Mga duha ka gatus, o mora’g ingon-ana, ang nagakaon didto sa Blue Boar, matag Domingo. Ug bisan asa ako moadto, duna

gyud ko'y madungog nga mga komento kung unsa kamo ka buutan.

²¹ Miingon pud kining maong lalaki, “Didto sa—sa may Riverview,” miingon, “kanang tibuok lugar okupado na sa mga tawo nga nagapanambong sa panagtigum.” Miingon, “Gatasan na gani ang dili na makasulod didto.”

²² Busa, kung ingon niana, para kanako kamo mao ang asin sa kalibutan. Ako—mapasalamaton kaayo ako nga mahibaloan nga duna ko'y pribilihiyo sa pagpangwali ngadto sa mga tawo nga bisan ang mga makasasala ug mga tawong. . . dili ko ginaingon nga mga makasasala kini nga mga tawo, apan ang buut kong ipasabot nga, bisan ang mga negosyante ug uban pa, makasulti gyud nga mga buutan kono kamo, ug ngani nalipay sila nga abi-abihon kamo sa ilang negosyo, ug sa ilang mga lugar. Abi ninyo, ingon niana ang mamahimong asin. Mao nga gikalipay ko kanang, inyong kinaiya, ang inyong paagi sa paggawi sa mga butang.

²³ Kanunay ko nang ginaingon, “Kung aduna ma'y mosulod ug walay, wala siya'y kuwarta para mabayran ang iyang balayronon, nan tawagi lang ko ninyo.” Kita n'yo? Ingon ko, “Kami na ang mangita'g paagi niana.” Ug miingon ko, “Pakanang lang sila pirmi, aduna man sila'y kuwarta o wala.” Kita n'yo, buhaton ta ang unsa man nga mahimo nato.

²⁴ Giisip ko na kamo nga akong mga anak. Kamo'y—kamo mao ang mga bitoon nga akong. . . Kung magkaaduna man ako og ingon-ana pag atua na ko didto, nan kamo mao ang mutya, ang pinakamadan-ag nga bahin, sa—sa purong-purong sa akong ministerio. Pag mapurongpurongan na kini, nan kamo mao ang mamahimong mutya.

²⁵ Ug dugay ko nang ginaingon kaninyo, sa nangaging mga panahon, ang mahitungod sa Pito ka Selyo, ang mga Kapanahonan sa Iglesia, ug ang mga butang nga—nga nagakahitabo na.

²⁶ Ug karon, niining buntaga, duna ko'y importante kaayo nga hilisgotanan. Para kanako, mapanalanginon kaayo kini. Nanghinaut ko nga mao usab ang paghunahuna n'yo niini. Ug kung maipahayag ko lang kini nga basi usab sa inspirasyon sa pagkadawat ko niini, maanindot gyud unta, apan ang Dios na ang bahala sa pagbuhat niana.

²⁷ Dugay ko nang ginaingon kaninyo ang mahitungod sa *kung asa* ug *kung unsa* ang magakahitabo, ug nakita na nato ang tanan niini nga mga butang nga nagakahitabo na.

²⁸ Karon magahisgot ako, niining buntaga, mahitungod sa: *Ang Umalabot Nga Puloy-anan Sa Langitnong Pamanhonon Ug Sa Yutan-ong Pangasaw-onon*, kon asa ba sila magapuyo. Ug, tungod kay, nagasalig ako nga pinaagi sa grasya sa Dios kabahin kitang tanan nianang halangdong ekonomiya sa Dios.

²⁹ Ug karon ako—nagasalig ko nga pasensyahan n'yo unta ako, iandam n'yo na ang inyong mga Biblia, ang inyong mga lapis, o unsa man ang inyong gamiton para sa pagbasa uban kanako, tungod kay mopahinungod baya ko sa daghang mga Kasulatan. Paningkamotan ko usab nga mahuman tà nga igo gayud sa oras aron makapahigayon pa og pagpang-ampo alang sa mga may sakit; ug gisaad ko na man gud kana. Ngani pag-abot ko, kaganina nag-ampo ako, diha sa mga lawak ug sa palibot dinha, alang sa mga halos wala na'y mahimo ug nawad-an na'g paglaum.

³⁰ Ug, kon itugot sa Ginoo, tingali'g magpahigayon ako og usa pa ka panerbisyo sa ikadise-sais, siguro kana'y pag-ampo lang para sa mga may sakit.

³¹ Sa karon nagsugod na ko sa akong bakasyon. Sukad niadtong miaging Enero, nagsige na man gud ko'g biyahe, ug mao nga mobalik na pud ko dinhi. Dalhon ko lang ùna, ang akong pamilya ngadto sa Tucson ugma sa buntag, ug mobalik ra dayon ko aron makagahin og panahon didto na sa Kentucky, uban ang pipila sa akong mga higala, sa pagpangayam, ug pagpangayam pud og mga squirrel, sulod sa duha ka semana, o tingali'g pito o walo, napulo ra ka adlaw, o unsa man, gawas lang kon pangunahan ako sa Ginoo sa kung asa pa man. Wala ako mahibalo, sa kung asa pa kami mapaingon; wala gyud kita mahibalo niana, tungod kay anaa ra kana sa mga kamot sa Dios, sa Dios lamang.

³² Bueno alang niining halangdong hilisgotanan, atong—atong... sa hunahuna ko, kung mogahin gyud ko og oras niini, nan magkinahanglan kini og pipila ka semana, tungod kay kinahanglan mo man nga ilakip usab ang daghang mga butang. Apan nagsulat ra ko og pipila ka Kasulatan, pipila ka sinulat, aron hisgotan ang mga mahinungdanon lang nga punto niini, para tun-an n'yo na lang kini.

³³ Dayon sa dili madugay, tingali, kon itugot sa Ginoo, sa Oktubre, wala ako masayod kung kanus-a, apan kung itagana man Niya, buut kong magpahigayon og—og pipila ka adlaw'ng, sunod-sunod nga panagtigum, mahitungod sa ika-12 nga kapitulo sa Pinadayag, aron maitakdo sa niining ania dinhi. Oh, nagatoo ko nga pagkaanindot niana. Pagkaanindot gayud. Pagkaanindot nga makita kung giunsa Niya kana pagbuhat.

³⁴ Bueno, ingon nga nagkatigum kita karon, miingon ko kagabii, ingon ko, “Kabalo mo, sa dihang ako...” Inig ka buntag, mora'g kada buntag gyud, nagahunahuna ko, “Pag moabot na ko dinhi, himamaton ko gayud ang matag usa sa akong mga higala nga ania dinhi.” Karon unsaon kaha nako paghimo niana?

³⁵ Nga makauban dinhi, ang buutan kong higala nga sama, ni Doktor Lee Vayle nga nagalingkod dinhi sa luyo, ang buutan

niyang asawa ug anak nga babaye usab. Ug si Igsoong Roy Borders usab, ug, sa tan-aw ko, anaa pa gani sila ni Igsoong Ruddell, Igsoong Beeler, ug si Igsoong Palmer, ug si Igsoong Jackson. Ug, oh, my, ang—ang... Silang minahal nga mga kaigsoonan nga gikan pa sa nagkalainlaing mga dapit! Si Igsoong Anthony Milano usab, ug, oh, bisan asa ka motan-aw, makita mo gayud ang uban pa nga igsoong lalaki! Duna usab og taga Arkansas, dili ko lang madumduman ang ilang ngalan; sila ni Igsoong John, Igsoong Earl Martin, ug si Igsoong Blair. Ug, oh, aduna gayu'y... kamo... Wala gyu'y kahumanan, nakita n'yo. Mao nga malipayon kaayo ko nga magkaaduna og usa ka grupo nga sama nila nga nakapalibot kanako pag nagatudlo ako mahitungod sa Pulong sa Dios, mga kalalaken-an nga nagatoo ko nga maisogon nga mga tawo, tinuod gyud nga mga tawo sa Dios.

³⁶ Mapasalamaton sab ako tungod niining gamay'ng tabernakulo. Mapasalamaton ako tungod sa lima ka pultahan niini nga bukas gayud para sa publiko. Matag pultahan... Aduna man kita'y upat ka diyakono dinhi, mga lalaki nga puno-sa-Espiritu; upat pud ka tinugyanan, mga lalaki nga puno-sa-Espiritu. Mao nga dunay duha sa matag pultahan. Ug aduna pu'y duha ka pultahan sa atubangan, para sa duha ka pastor, nga mga magbalantay sa panon.

³⁷ Malipayon gyud kami nga makauban kamo; mapasalamaton kami sa Dios tungod niini. Hinaut nga panalanginan Niya kamo sa kanunay.

³⁸ Karon buut nato nga motindog sa makadiyut, samtang magabasa kita sa Ikaduhang Pedro sa ika-3 nga kapitulo, ug usab sa Basahon sa Pinadayag 21.

³⁹ Samtang nagatindog kami, Oh Ginoo, pun-a sa kalipay ang among mga kasingkasing tungod sa pagbasa sa Imong Pulong, ingon nga nanghibalo kami nga si Jesus miingon, nga, "Ang mga Langit ug yuta mangahanaw, apan ang Akong Pulong dili gayud mapakyas." Nasayod usab kami nga Siya miingon, "Ang tibuok Kasulatan mamatuman gayud." Ug samtang magabasa kami niining mga butanga, hinaut nga magkaaduna kami og pagsabot nga gikan Kanimo, sa panahon nga among gikinabuhian. Amo kining ginapangamuyo sa Ngalan ni Jesus, ang Tagsulat sa Basahon. Amen.

⁴⁰ Ikaduhang Pedro 3.

Kini mao na ang ikaduhang sulat, mga hinigugma, nga gisulat ko kaninyo; nga niining duha nagadasig ako sa inyong lunsay nga panghunahuna pinaagi sa pagpahinumdom kaninyo:

Aron hinumduman ninyo ang mga pulong nga gisulti kaniadto sa mga balaang propeta, ug ang mga sugo sa Ginoo ug Manluluwas pinaagi sa inyong mga apostoles:

Sa nahibaloan ninyo una kini, nga sa katapusan nga mga adlaw mangabot ang mga mayubiton, nga may pagyubit nga magasunod sa ilang kaugalingong mga kailibgon,

Ug magaingon, Hain na ang saad sa iyang pag-anhi? (Kung dili kana nagakatakdo sa niining babaye nga wala-nagatoo sa . . .) . . . sukad sa pagkamatay sa mga ginikanan, ang tanang mga butang nagapadayon ingon sa gihapon gikan sa sinugdanan sa paglalang.

Kay kini ginakalimtan nila pagtuyo, nga sa karaang panahon pinaagi sa pulong sa Dios dihay mga langit, ug yuta nga naumol gikan sa tubig ug sa kinataliwad-an sa tubig:

Nga tungod niana ang kalibutan nga kaniadto, gilunopan sa tubig, nalaglag:

Apan ang mga langit ug yuta, nga mao karon, pinaagi sa mao ra usab nga pulong ginatipigan, gikatagana alang sa kalayo sa adlaw sa paghukom ug sa paglaglag sa mga tawo nga dili-diosnon.

Apan, mga hinigugma, ayaw ninyo paghikalimti kining usa ka butang, nga alang sa Ginoo ang usa ka adlaw ingon sa usa ka libo ka tuig, ug ang usa ka libo ka tuig ingon sa usa ka adlaw.

Karon, ang Ginoo dili langaylangayan bahin sa iyang saad, ingon sa paglangaylangay nga gihunahuna sa uban; apan siya mapailubon kaninyo, nga wala magtinguha nga may si bisan kinsa nga malaglag kondili aron ang tanan makadangat unta sa paghinulsol.

Apan ang adlaw sa Ginoo moabot ingon sa usa ka kawatan; sa . . . nga unya ang mga langit ug ang yuta, uban sa dakung dinagook . . . mawagtang uban sa dakung dinagook, ug ang mga butang sa kalangitan mangatunaw sa hilabihang kainit, ug ang yuta usab ug ang mga buhat nga ania niini mangasunog.

Sanglit kining tanang mga butanga pagatunawon man, unsa man nga matang sa tawo ang angay kanato sumala sa balaan nga pagkinabuhi ug pagkadiosnon,

Nga magapaabot ug magapadali sa pag-abot sa adlaw sa Dios, nga tungod niini ang mga langit nga nagadilaab mangatunaw, ug ang mga butang sa kalangitan mangatunaw sa hilabihang kainit?

Apan, sumala sa iyang saad, nagapaabot kita sa bag-ong mga langit ug usa ka bag-ong yuta, diin nagapuyo ang pagkamatarung.

Busa, mga hinigugma, sanglit nagapaabot man kita niining mga butanga, paningkamoti gayud ninyo nga dili kamo makaplagan. . . mahikaplagan kamo diha sa kalinaw, nga walay hugaw, ug walay buling sa iyang atubangan.

Ug isipa ninyo nga ang pagkamainantuson sa Ginoo mao ang kaluwasan; sa ingon usab nga nagsulat kaninyo ang atong hinigugmang. . . si Pablo. . . sumala sa kaalam nga gihatag kaniya;

Ingon man. . . sa tanan niyang mga surat, nga kanila ginapamulong ang mga butang; . . nga may mga higayon nga malisud sabton, nga ginatuis sa mga burong ug mga mahuyang, ginatuis, ingon—ingon sa ginabuhat usab nila sa uban nga mga kasulatan, ngadto sa ilang kaugalingong pagkalaglag.

Busa kamo, mga hinigugma, sa nasayod na kamong daan niining mga butanga, magbantay kamo aron dili kamo, madala sa. . . kasaypanan sa mga masupilon, ug mahulog kamo gikan sa inyong. . . kalig-on.

Apan managtubo kamo diha sa grasya, . . sa kahibalo sa Ginoo ug Manluluwas nga si Jesus Cristo. Kaniya ang himaya karon ug hangtud sa kahangturan. Amen.

⁴¹ Karon diha sa—sa Pinadayag ni Cristo, sa ika-21 nga kapitulo, basahon ko kini nga mga Pulong.

Ug nakita ko ang usa ka bag-ong langit ug ang usa ka bag-ong yuta: kay ang unang langit ug ang unang yuta nangahanaw na man; ug ang dagat wala na.

Ug ako si Juan nakita ang balaang siyudad, ang bag-ong Jerusalem, nga nanaug sa langit gikan sa Dios, nga naandam ingon sa usa ka pangasaw-onon nga gidayandayanan alang sa iyang bana.

Ug nadungog ko gikan sa langit ang usa ka dakung tingog nga nagaingon, Tan-awa, ang tabernakulo sa Dios anaa uban sa mga tawo, ug siya magapuyo ipon kanila, ug sila mahimong iyang katawohan, ug ang Dios gayud mao ang magpakig-uban kanila, ug mahimong ilang Dios.

Ug pagapahiran sa Dios ang tanang luha sa ilang mga mata; ug ang kamatayon wala na, ug wala na'y pagbalata, bisan paghilak, bisan kasakit: kay ang unang mga butang nangagi na.

Ug siya nga nagalingkod sa trono miingon, Ania karon, ginabag-o ko ang tanang mga butang! . . siya miingon kanako, Isulat mo: kay kini nga mga pulong kasaligan ug matuod.

Ug siya miingon kanako, Natapus na. Ako mao ang Alfa ug Omega, ang sinugdan ug ang katapusan. Ug ang giuhaw paimnon ko nga walay bayad sa mga tuboran sa tubig sa kinabuhi.

Ang magamadaugon makapanunod niining mga butanga; ug ako mahimong iyang Dios, ug siya mahimong akong anak.

Mag-ampo kita pag-usab.

⁴² Ginooong Jesus, sa ingon niana nga saad ug ingon niana ka mabagison nga pagpamulong nga gipamulong kanamo ni Jesus Mismo ug sa maong apostoles mahitungod sa takna nga among ginapaabot, hatagi kami, Oh Ginoo, sa Imong paggiya, aron nga among masayran kung unsaon namo sa pagpaabot niini sa husto nga paagi. Tungod kay, taliabot na kini, nasayod kami. Ang mga Kasulatan mamatuman gayud, ug busa mamatuman gyud kini. Ug karon, Ginoo, ginapangamuyo usab namo ang Imong kalooy nganhi kanamong tanan, samtang pagatun-an namo ang Imong Pulong. Ubani kami ug ipadayag Kini nganhi kanamo, Ginoo, kay amo kining ginapangamuyo sa Ngalan ni Jesus. Amen.

Makalingkod na kamo.

⁴³ Bueno, nahuhuna ko lang kung aduna kaha og paagi, nga basin mahimo ra nilang palongon ang mga suga sa pinaka-punoang bahin sa awditoryum, ug kini lang ania sa entablado ang pasigaon, diin mahimong mas arang-arang, ug para makadaginot pud sa kuryente. Hapit man gud tà masunogan og transformer, niadtong miaging gabii. Ug basin mahimo kana sa tigbantay para kanato, pasalamatán gyud nato kung puede niyang palongon ang mga suga sa ubos, palongon ra, ang mga suga sa pinaka-punoang bahin sa awditoryum. Ug bueno sa tan-aw ko mora'g aduna pa ma'y igong kahayag para makakita, og para makasulat kamo.

⁴⁴ Karon, ang maong hilisgotanan, isulti ko kini pag-usab, nga atong hisgotan ang—ang hilisgotanan mahitungod sa: *Ang Umalabot Nga Pulo-y-anan Sa Langitnong Pamanhonon Ug Sa Yutan-ong Pangasaw-onon.*

⁴⁵ Bueno tungod nga . . . kinahanglan ko nang buhaton kini. Grabe man gud ka igang dinhi dapit, kita n'yo. Oo, sir. Samtang atong . . . kabalo ko nga dili gyud gusto sa akong asawa nga buhaton ko ang ingon-ini; apan, nga, huboon ko ang akong amerikana. Igang man kaayo dinhi dapit. Kita n'yo, aduna kamo'y hangin dinha, pero dili na man gud kana makaabot sa usa ka gamay'ng lawak dinhi, kita n'yo. Bueno, sa—sa umalabot, o . . .

⁴⁶ Kaniadto, diay, natun-an na nato *Ang Pito Ka Selyo, Ang Pito Ka Iglesia.* Ngani ginabuhat na kana nila Igsoong Vayle karon, nga matinud-anon gayud, aron maipa-libro kana.

47 Ug ingon nga nakita na nato ang tanan niining misteryoso nga mga butang nga nangahitabo na, nan akong nahunahuna, human nga nasabtan kana, nga sa panahon nga atong gikinabuhian, ug ang kahimtang niini; walay si kinsa man nga may maayong salabutan nga gustong molingkod ug susihon kung unsa ang gikasulti na, ug kung unsa ang gikasaad nga mahitabo, ug kung unsa na ang nahitabo, ang dili makaingon nga nangatuman na gayud kanang mga butanga. Kita n'yo? Kung unsay eksaktong gisulti sa Dios nga Iyang buhaton, gibuhat Niya kana sa ingon gayud ka eksakto. Kita n'yo?

48 Bueno, akong nahunahuna ang bahin niini, ingon, nga wala ko masayod kung unsang orasa mahimong magpakita si Ginoong Jesus, nahunahuna ko nga maayo gyud, og daw sa makapahimuot sab sa Balaang Espiritu kon hisgotan nato kini, pagkahuman; ug tingali balikan kini pag-usab, sa makaduha o makatulo ka higayon, tungod kay wala man ko'y igong panahon para maipahayag ang tanan niini.

49 Sama ra pag maghisgot ka og usa—usa ka hilisgotanan nga mahimong medyo kapandolan sa usa ka tawo, tungod dili mo man kini bug-os gyud nga maipahayag aron maipaklaro unta kini, mao nga imong balikan pag-usab para makahisgot sa sunod nga hilisgotanan.

50 Ug dayon human niana, diha sa...kon itugot sa Ginoo, moadto kita sa ika-12 nga selyo, o dili...Pasayloa ko. Sa ika-12 diay nga kapitulo sa Pinadayag, nga napahimutang tali sa Pag-abot sa Ginoo ug sa pagtapos sa mga Trumpeta, ug uban pa. Paningkamotan natong hisgotan kana pag-usab, aron ipakita kung kinsa si Satanas, ug kung unsay iyang gibuhat, kung asa siya naggikan, kung unsa ang iyang katuyoan, ug kung daw sa unsa nga ang iyang grabeng kaanyag nga gikahatag kaniya ang naghinungdan sa iyang pagkahulog. Ang iyang pagpanglimbong ang naghinungdan sa pagkahulog kaniadto; kaanyag.

51 Dayon, daw sa imposible gayud para kang kinsa man nga gapaninguhang susihon kana og ayo, ang mahitungod sa “binhi” sa serpente. Mohagit ako bahin niana, ang si kinsa man, kita n'yo, nga gapaninguhang susihon kana, pinaagi—pinaagi lamang sa yanong panabot. Makasabot man gani niana ang usa ka bata. Kita n'yo? Bueno, ug hisgotan ra nato kana pagkahuman.

52 Karon, nasabtan nato dinhi nga kining duha ka Kasulatan...Ang hinungdan kon nganong gibasa ko ang Ikaduhang Pedro sa ika-3 nga kapitulo, ug gitandi kini sa Pinadayag 21, pareho man gud kining nagahisgot sa mao ra nga hilisgotanan, apan wala—wala kini gisulat ni Juan nga sama sa pagsulat ni Pedro. Kita n'yo? Nasabtan nato nga kining halangdong Puloy-anan sa Pangasaw-onon maania ra dinhi ibabaw sa yuta.

⁵³ Ug karon kung inyong basahon, sama lang sa ika-21 nga kapitulo, ika-21 nga kapitulo sa Pinadayag, ang giingon dinhi sa apostoles, o ang giingon sa propeta, nga, “Nakita ko ang usa ka Bag-ong Langit ug ang usa ka Bag-ong Yuta.” Mora’g aduna gyu’y mahitabo nga pagkahanaw.

⁵⁴ Bueno, sa kanunay ang paagi nga makaplagan ko ang akong mga Mensahe pinaagi kini og pag-ampo. Maanaa ako sa pag-ampo ug adunay maipadayag kanako. Ug mohulat usa ko og pipila ka minuto bahin niana ug hibaloon ko kung husto ba kana, dayon mabati ko na nga mas napahiduol na kana. Ug usahay usab padayon ra kong maghulat hangtud nga mahimo kanang usa ka panan-awon. Apan sa dihang hinay-hinay na kana nga motungha, ug sigurado na ko nga gikan kana sa Dios, nan moadto na ako sa Kasulatan. Kita n’yo, Kana mao, ang angay nga kapanghimatuoran sa matag espirituhanong butang nga nagakahitabo, tungod kay ang Biblia mao man ang bug-os nga kapadayagan ni Jesus Cristo; kita n’yo, Iya Kanang Lawas.

⁵⁵ Ug karon, bahin niana, mahimong makakaplag pud ako og usa ka bahin sa Kasulatan nga daw sa dili husto, ug maghunahuna ako. Mao nga mag-ampo ako pag-usab. Dayon nagaabot kana pag-usab. Nan ako—nan ako nang sugdan sa—sa pagsusi ang akong Kasulatan.

⁵⁶ Bueno, ang atong Biblia nahisulat man nga Iningles, ug nagakausab pud ang mga pulong nga Ingles, sa kanunay. Pananglitan, sama sa San Juan 14, ang ingon, “Sa Balay sa Akong Amahan adunay daghang puloy-anan,” puloy-anan sulod sa usa ka balay. Bueno, kung ingon-ana, imong, ang imong buhaton kung ingon niana, balikan mo kana sa—sa orihinal ug tan-awon kung unsay buut ipasabot ni James, o kaha balikan ang sa Hebreohanon, o ang sa Griyego, gikan sa unang hubad. Ug dinha ang ingon niini, “Sa Ginghamian sa Akong Amahan adunay daghang palasyo.” Bueno, kung ingon-ana, imong balikan ang sa kaniadtong panahon diin naghubad ang mga maghuhubad para kang King James, nga ang *gingharian* kaniadto gitawag, sa Iningles, ingon nga usa ka “balay,” ug ang hari mao ang amahan sa iyang mga ginsakupan. Mao kana ang hinungdan kon nganong ilang gihubad nga, “Sa Balay sa Akong Amahan adunay daghang puloy-anan.” Kita n’yo? Ug mao nga imong kuhaon kana nga mga pulong ug kinahanglan mo pang susihon kana.

⁵⁷ Dayon, nakita n’yo, gikan niana nga inspirasyon . . . Dinhi niining pulpito karong buntaga, moingon ko, nga wala gyud ni usa ka higayon nga nahimo kining unsa pa man kondili tukma gayud, sa Kasulatan. Sa ingon-anang paagi miabot ang mahitungod sa *Binhi Sa Serpente* ug tanan na niining uban pang mga butang. Kita n’yo? Pinaagi sa . . .

⁵⁸ Ug kini’y, sa tinuod lang, kung diretso na lang basahon

sa usa ka tawo ug moingon, “Sa Balay sa Akong Amahan adunay daghang puloy-anan,” kung dili ka una mohunong para magtuon, og mag-ampo, nan malibog ka gayud. Kita n’yo? Apan padayon lang sa pag-ampo. Kanunay man kining ihusto sa Dios, kung gikan gyud kini sa Dios.

⁵⁹ Bueno, gihatagan og katin-awan ni Juan ang pagkausab ug ang pag- . . .kung sa unsang paagi kini mahitabo . . .Wala niya diay kini gihatagan og, katin-awan, kondili si Pedro mismo ang naghatag og katin-awan. Gisulti lamang ni Juan nga, “Nakita ko ang Bag-ong mga Langit ug ang Bag-ong Yuta; ang unang mga langit ug ang unang yuta nangahanaw na man. Wala na ang dagat. Ako si Juan nakita ang balaang Siyudad nga nanaug sa Langit gikan sa Dios, nga naandam ingon sa usa ka Pangasaw-onon nga gidayandayanan alang sa Iyang Bana.” Apan, atong balikan karon ang Ikaduhang Pedro aron masayran nato, gisaysay man ni Pedro kung sa unsang paagi mahitabo kini nga proseso. Karon, kung susihon ninyo ang gisulti ni Juan, daw sa ingon niini, “Kay ang unang mga langit ug ang unang yuta nangahanaw na man,” nagun-ob na. Kita n’yo, kung ingon-ana, medyo talagsaon gayud kana. Busa mao kana ang nakapaaghat kanako, ug mao nga akong gisugdan sa pagsusi ang pulong nga, “nahanaw.” Ug, karon, apan klaro na nga kining duha, ang apostoles ug ang propeta, nagahisgot gyud mahitungod sa mao ra nga butang.

⁶⁰ Ug karon, usab, diha sa Basahon ni Isaias, karon, kon gusto n’yong isulat kini nga mga Kasulatan, sa Isaias 65:17. Si Isaias, nga nagahisgot mahitungod sa Milenyum, kanang usa ka libo ka tuig nga pagpahulay alang sa—alang sa mga katawohan sa Dios. Si Isaias naghisgot bahin niana, ug ingon siya, “Ako . . . Adunay usa ka . . . Ang tanang unang mga butang nangagi na,” ug daw sa unsa nga managtukod sila og mga balay, og magapuyo niana. Kung aduna pa kita’y oras . . . Siguro mogahin na lang tà og oras ug—ug basahon kini sa makadiyut lang, ang Isaias 65, ug mobasa lang tà dinhi sulod sa pipila ka minuto. Ug ania kini, mismo, para kanato. Karon, sugdan tà sa, Isaias 65:17.

Ug, ania karon, ako nagahimo og bag-ong mga langit ug usa ka bag-ong yuta: . . .

⁶¹ Bueno, si Isaias, nga propeta, mao ang usa sa mga propeta nga nagsulat mismo sa tibuok Biblia bahin sa iyang propesiya. Nagsugod siya diha sa paglalang; sa tunga-tunga sa iyang Basahon, sa mga ika-40 nga kapitulo, miabot si Juan Bautista, ang sa Bag-ong Tugon; ug natapos ang, iyang Basahon, dinhi sa Pinadayag, bahin sa Milenyum. Adunay saisenta’y-sais nga mga basahon ang Biblia, ug adunay saisenta’y-sais nga mga kapitulo ang Isaias. Misulat siya og usa ka kumpleto nga pagsaysay.

⁶² Bueno, hingsayran nato, dinhi karon anaa na siya sa ika-65 nga kapitulo, sa usa pa ka kapitulo, ug nagahisgot siya

mahitungod sa Milenyum. Himatikdi n'yo kini, pagkaanindot gayud.

...ania karon, ako nagahimo og bag-ong langit ug...bag-ong yuta: ug ang unang butang dili na pagahinumduman, o motungha pa sa hunahuna. (Tungod “nahanaw” na man kini.)

Apan manag—managlipay kamo ug managmaya... tungod niadtong gihimo ko: kay, ania karon, gihimo ko ang Jerusalem nga usa ka pagmaya, ug ang iyang mga pumoluyo nga usa ka kalipay.

Ug ako magamaya diha sa Jerusalem, ug magakalipay diha sa akong katawohan: ug dili na pagahidunggan diha kaniya ang tingog sa pagbakho, kay...o ang tingog sa paghilak.

Wala na unya'y bata nga sa...pila lamang ka adlaw, ug...usa ka tawong tigulang nga wala nakatuman sa iyang mga adlaw: kay ang usa ka bata mamatay sa usa ka gatus ka tuig; ug ang usa ka makasasala sanglit adunay usa ka gatus ka tuig pagatunglohon. Dayon paga...

Ug sila magatukod og mga balay, ug magapuyo niini; ug sila magatanum og mga kaparrasan, ug makakaon sa ilang bunga.

Ug sila dili magatukod, ug unya lain ang magapuyo; (kana mao, ang inyong umahan, ang inyong anak ang magapanunod niana, o ang pipila sa inyong mga manununod)...sila dili magatanum, ug unya lain ang magakaon niana: (sila mismo ang magatanum ug magpabilin ra dinha; aduna sila'y Kinabuhing Walay Katapusan)...kay ingon sa mga adlaw sa usa ka kahoy mao man ang mga adlaw sa akong katawohan, ug ang akong hataas...ang akong mga pinili magapahimulos pag-ayo sa mga buhat sa ilang mga kamot.

Sila dili magabuhat nga walay kapuslanan, ni manganak sila alang sa kagul-anan; kay sila mao ang kaliwatan sa gipanalanginan sa GINOO, ug ang ilang mga kaliwatan magauban kanila.

⁶³ Karon matikdi n'yo, dinhi ako mopaingon, pagkataudtaud.

Ug mahinabo, nga sa dili pa sila magasangpit, ako magatubag na; ug samtang nga sila magasulti pa, ako mamati kanila.

Ug ang lobo ug ang nating karnero managsalo sa pagsibsib, ug ang leon mokaon sa dagami sama sa usa ka vaca nga toro:...abog ang mahimong kalan-on sa bitin. Ug sila dili modaut ni molaglag sa bisan kinsa diha sa tibuok nakong bukid nga balaan, nagaingon ang GINOO.

64 Pagkaanindot nga saad, nga gisulti niining mga propeta ug halangdon nga mga manggialamon, nga mga magtutudlo sa Biblia, sa karaang mga adlaw kaniadto, ingon nga nakita nila ang pag-abot niining mahimayaong Adlaw!

65 Sumala niini nga mga kinutlo, mahimong adunay maghunahuna, o maaghat, diay, nga motoo nga ang tibuok planeta, sa niining kalibutan, pagalaglagon, “Ako magahimo og usa ka Bag-ong Langit ug usa ka Bag-ong Yuta,” kita n’yo, nga mawala mismo ang kalangitan ug pagawalaon usab ang yuta, bug-os gayud nga mapuo. Apan sa akong pagtuon og ayo, ug pinaagi sa tabang sa Balaang Espiritu, makita gyud nato ang Kamatuoran niini; ug mao kana ang atong pagahisgotan.

66 Ang mga kawanangan lamang nga nagaputos niini, ug ang sala nga anaa ibabaw sa yuta, ang pagahanawon. Kita n’yo? Bueno, hingsayran na nato nga ang buut ipasabot sa *kalangitan* mao ang “mga kawanangan sa itaas.” Kita n’yo?

67 Unsa ma’y mahitabo niini? Bueno kini, kining mga kadyapa, ug balatian, ug kamatayon, ug pulitika, ug ang makasasala nga lalaki, ug makasasala nga babaye, ug ang dautang mga espiritu, bug-os gayud nga mahanaw ug mapuo. Kita n’yo? Kinahanglan nga mapuo gyud sa ingon-ana nga paagi, tungod kay magapuyo man kita dinhi mismo. Pamatud-an nato kana pinaagi sa Biblia. Dinhi mismo kita magapuyo. Karon matikdi n’yo, ang mga kadyapa, ang mga kagaw, ang tanang mga balatian ug mga ingon-anang butang, hingpit gayud nga pagawagtangon. Tungod kining tanan, kining nagalungtad sa yuta karon, nga mga sistemang hinimo’g-tawo, pulitika, kasal-anan, og tanan nang matang sa dautang mga espiritu nga nagapahugaw sa kalibutan, ug ang tibuok kalangitan dinhi sa ibabaw nato, kontaminado na man sa dautang espiritu. Bueno pagalaluman pa nato ug magadugay pa kita sa paghisgot, bahin niini, kita n’yo.

68 Kining tanan nga anaa sa kalangitan, o sa mga kawanangan, ug sa yuta karon. Kining yutaa nagkaaduna nianang mga butanga, apan wala man gyud kini gilalang alang niana nga katuyoan. Kondili ang sala mao’y naghinungdan nga mamaingon niana kini. Kita n’yo? Gilalang kini sa Dios, ang Magbubuhat. Apan ang tanan . . .

69 Ug ang tanan natong mga lawas, nga ginapuy-an nato karon, napahimutang na ibabaw sa yuta sa dihang gilalang kini sa Dios kaniadto, tungod kay gikan man kamo sa abog sa yuta. Napahimutang na kining tanan dinhi kaniadto. Sa dihang gilalang kini sa Dios Mismo, anaa na kamo sa Iyang panghunahuna. Ug diha Kaniya, ang Gamhanang Eternal, anaa na ang hunahuna, nga mao’y Iyang kinaiyahan.

70 Ug bueno ang sala mao’y naghinungdan nga mahitabo kining tanan. Ug ginatigum na sa Dios, sa niini nga

kapanahonan, ang Iyang materyal.

⁷¹ Pero si Satanas ania pa sa gihapon. Mao kana'y hinungdan nga nagakahitabo ang tanan niining mga butanga. Ania pa siya sa gihapon, ug ang tanan niyang dautan nga mga puwersa ania pa usab gihapon. Matikdi n'yo, mao kana kon nganong hugaw na kaayo ang kalibutan karon. Mao kana kon nganong nagapadayon sa gihapon ang mga hugaw ug talamayon nga mga butang; ang pagpinatyanay, gubat, pulitika, kasalanan, pagpanapaw, og tanan nang matang sa kahugawan nga nagakahitabo, tungod kay si Satanas man mao ang tigpangulo niining yutaa ug sa niini nga kawanangan.

Moingon mo, "Sa kawana-...?" Oo, sir!

⁷² Ang kalangitan ug ang yuta karon kontaminado na sa mga yawa nga makahimo sa pag-akusar kanato sa atubangan sa Dios. Pero Anaa man si Jesus aron mangaliya para kanato. Kita n'yo? Samtang ang mga magsusumbong padayon nga nagasumbong, "gibuhat nila *kini*, gibuhat nila *kini*, gibuhat nila *kini*," apan nagatabon sa gihapon ang Dugo. Mianhi Siya aron tubuson ang maong mga Pinili nga nakita na Niya kaniadto pa. Mao kana kon nganong hugaw na kaayo kini karong panahona.

⁷³ Ania, ang apostoles, dinhi sa Ikaduhang Pedro, sa ika-2 nga kapitulo, ug sa ika-5 ug sa . . . ug sa ika-5 ug ika-6 nga bersekulo. Oo, naisulat ko na kini. Nagapahinungod siya sa tulo ka hugna sa kalibutan. Kita n'yo, iyang-iyang gihisgotan ang tulo ka hugna niini. Matikdi kung giunsa niya pagpahayag ang mga niini.

⁷⁴ "Ang karaang kalibutan nga wala nakaluwas sa tubig," bueno, mao kana ang kalibutan sa wala pa ang paglunop.

⁷⁵ Karon, kining sa karon, ang kasamtangang kalibutan nga ginapuy-an nato karon, gitawag kini og "kalibutan."

⁷⁶ "Ang karaang kalibutan nga wala nakaluwas sa tubig," Genesis 1:1. Karon ug ang "kalibutan" sa karong panahon. Ug, usab, nagapahinungod siya mahitungod sa usa pa, "ang kalibutan nga umalabot," ang Bag-ong Kalibutan. Tulo ka kalibutan; tulo ka hugna sa kalibutan.

⁷⁷ Ug matikdi n'yo kon daw sa unsa nga ginapatin-aw sa Dios nganhi kanato ang Iyang plano sa katubsanan. Oh, nalipay gayud ang akong kalag sa dihang nakita ko kini, kon daw sa unsa nga ginapatin-aw Niya kanato dinhi karon ang Iyang plano sa katubsanan. Karon atong itandi ang mga nakita nato sa ato mismong mga mata. Kung unsa ma'y gibuhat sa Dios aron tubuson ang Iyang kalibutan, gibuhat Niya usab ang mao gihapon nga plano aron tubuson ang Iyang mga katawohan, tungod kay ang walay-pagkausab nga Dios wala man ginausab ang bisan unsa sa Iyang mga plano o unsa man. Pagkamahimayaon gayud nga butang!

⁷⁸ Kon daw sa unsa nga gipangunahan Niya kita sa Kaugalingon Niya mismo, paingon sa usa ka tabernakulo sa kinasuloran nato, pinaagi sa tulo ka hugna sa grasya; ingon man usab nga gipangunahan Niya ang kalibutan sa tulo ka hugna, nga moabot sa kalibutan. Ingon nga moabot sa kalibutan ang Dios human nga moagi kini sa tulo ka nagkalainlaing hugna sa paglimpyo, eksaktong ingon niana usab ang paagi sa Iyang pag-anhi kanato pinaagi sa tulo ka hugna sa grasya. Gitudlo ko na kana sa sugod pa lang; wala gyud ko'y giusab, sukad kaniadto. Kini mao ang Pulong sa Dios.

⁷⁹ Kinahanglan n'yong ipapabilin ang inyong tinag-tulo, ang inyong tinag-pito, ang inyong tinag-dose. Tungod ang mga numero sa Biblia kinahanglan man nga mahitakdo nga hingpit kay kon dili nan malibog ka gayud sa imong hulagway. Kung dili n'yo kini masabtan, padayon lang mo sa pag-ampo. Matikdi ninyo, mahitakdo gyud kini, sa ingon ka eksakto. Nagakahingpit ang Dios sa tutulo. Kita n'yo?

⁸⁰ Himatikdi n'yo, “ang karaang kalibutan,” sa wala pa ang paglunop kaniadto; ang “kalibutan” sa kasamtangang panahon karon; ug ang Usa nga umalabot.

⁸¹ Karon, ang unang hugna nga Iyang pagadalhan kanato. . . Kita n'yo, ang Iyang plano sa katubsanan mao ra gayud sa tanang butang. Mao ra nga pamaagi ang Iyang ginagamit. Tungod dili man Siya nagakausab. Miingon Siya, sa Malaquias 3, “Ako mao ang Dios, ug dili Ako nagakausab.” Busa, ang Iyang pamaagi sa pagbuhat, kung giluwat Niya ang unang tawo nga Iyang giluwat kaniadto, pinaagi sa giula nga Dugo sa Usa ka walay-sala, nan kinahanglan Niyang luwason ang usa na usab; ug ang matag usa nga Iyang ginaluwat kinahanglan nga luwason Niya sa mao ra gihapon nga pamaagi.

⁸² Kung giayo Niya ang usa ka tawo sa unsa mang higayon sa tibuok panaw sa kinabuhi; sa mga adlaw ni Jesus kaniadto, sa mga apostoles man, sa mga propeta, o kung kanus-a man; pag natagbo gani ang mao ra nga mga kondisyon, nan siguradong buhaton Niya kana pag-usab. Husto kana. Wala man Siya nagakausab. Nagakausab ang tawo, nagakausab ang panahon, nagakausab ang kapanahonan, nagakausab ang dispensasyon, apan ang Dios nagapabilin gayud nga mao ra sa gihapon. Hingpit man Siya. Pagkaanindot nga paglaum ang angay'ng maihatag niana para sa mga tawong masakiton!

⁸³ Kung nag-ayo man Siya og usa ka tawo kaniadto, nan kinahanglan Niya kanang buhaton pag-usab pag natagbo na ang mao ra nga mga kondisyon. Kon nagluwat Siya, og usa ka tawo kaniadto, nan kinahanglan Niya usab kanang buhaton sumala sa mao rang mga basihanon kon nganong Iyang gibuhat sa unang higayon. Kung gipuno Niya sa Espiritu Santo ang usa ka tawo, kinahanglan Niya usab kanang buhaton sumala sa mao rang mga

basihanan kon nganong Iyang gibuhat sa unang higayon. Kung gibanhaw Niya kaniadto ang usa ka tawo gikan sa lubnganan, nan siguradong buhaton Niya usab kana sa ikaduhang higayon, ug sa tanang uban pa nga panahon, sumala sa mao gihapong prinsipyo.

⁸⁴ Wala Siya nagakausab. Oh, pagkaanindot nga paglaum ang ginahatag niana kanako! Unsa man kana? Dili sa kung unsang teorya nga hinimo-sa-tawo, o usa ka butang nga giuyonan sa mga grupo sa tawo; kondili sa Iyang walay-pagkausab nga Pulong gayud.

Moingon mo, “Kamatuoran ba Kana?”

⁸⁵ Ang ingon Niya, “Ang matag pulong sa tawo bakak, ug ang sa Ako mao’y tinuod.” “Kay ang mga langit ug yuta mangahanaw, apan ang Akong Pulong dili gayud mapakyas.” “Ang tibuok Kasulatan gikahatag pinaagi’g inspirasyon, busa kini’y maayo ug may kapuslanan alang sa pagpanudlo.” Ug hinumdumi n’yo, nga, “Ang tibuok Kasulatan mamatuman gayud,” ang matag tipik niini.

⁸⁶ Matikdi n’yo kon daw sa unsa nga ginapatin-aw kini sa Dios para kanato. Ug kung dili kana usa—usa ka dakung kapanghimatuoran, usa ka maayong . . . usa ka mahimayaon, og mahigugmaong panalangin nga gikan sa Dios! Sa diha nga makita ko kini, ug nakita na kini sukad pa sa akong pagkabata, niadtong unang higayon nga nakigharong kanako si Cristo, sa kanunay ginatudlo ko gihapon kanang tulo ka hugna sa grasya. Matikdi n’yo karon kung dili ba kana tinuod.

⁸⁷ Bueno, ang unang hugna mao ang “paghinulsol ngadto sa Dios.” Ug dayon ang sunod niana, mao ang bautismo sa tubig, “bautismo sa tubig,” “Maghinulsol kamo, ug magpabautismo sa Ngalan ni Jesus Cristo.” Kita n’yo, mosunod ang bautismo sa tubig, nga nagapakita nga tinuod ang paghinulsol. O, aron sa “pagpasaylo” sa atong kanhing mga sala, nga walay unsa man nga kahilambigitan sa umalabot nga sala. Igo lang kining nagapasaylo. “Maghinulsol kamo, ug magpabautismo sa Ngalan ni Jesus Cristo.” Para sa unsa man? “Kapasayloan.” Pero ang pagtangtang sa kanhing sala walay unsa man nga kahilambigitan sa umalabot. Basta, gitangtang na ang imong sala, og kung unsay imong mga nabuhat.

⁸⁸ Dili man ninyo puedeng hinulsolan ang nabuhat ni Adan. Wala n’yo gayud kadto buhata; si Adan mismo ang nagbuhat niadto. Ang maangkon n’yo lang nga kapasayloan mao’y kung unsay inyong nabuhat. Pero anaa dinha sa gihapon ang kanhing kinaiyahan.

⁸⁹ Gamiton ko ùsa kining pisara sa makadiyut. [Si Igsoong Branham nagadrowing og mga hulagway sa pisara—Ed.] Karon, *aniay* usa ka kasingkasing sa tawo. Bueno, dili baya ko . . . halayo ra kaayo ko sa usa ka pintor. *Aniay* usa ka kasingkasing

sa tawo; ug *ania* pu'y usa ka kasingkasing sa tawo. Karon, kining usa *dinhi* dapit adunay bitin sa sulod niini, mao kana ang sala, dinhi aduna siya'y kinabuhi. Kining usa *dinhi* dapit adunay salampati sa sulod niini, nga mao ang Balaang Espiritu, og dinhi aduna siya'y Kinabuhi. Bueno, kining usa sab *dinhi*, aduna siya'y pagkamadinauton, pagdumot, kasina; mao kana ang nagapahinungdan niini, sa niini nga tawo *dinhi*. Bueno, kining usa *dinhi* dapit adunay gugma, ug kalipay, ug pagkamapuanguron; ug mao Kana mismo ang ginabuhat niining, ania *dinhi*.

⁹⁰ Karon, sa dihang gihangyo ka, o gipasaylo ka na sa imong mga sala, kini lang ang imong nabuhat, gitangtang *kana*. Apan ang maong butang nga nagapabuhat kanimo niana anaa ra gihapon dinha. Mao kana ang dinha na daan nga gamut sa kadautan; anaa gihapon kana dinha. Himatikdi, busa maghinulsol ka ug magpabautismo sa Ngalan ni Jesus Cristo, aron nga pasayloon ka Niya sa imong mga sala. Matikdi.

⁹¹ Dayon, ikaduha, mao ang pagpabalaan, nga nagahan-ay sa atong hunahuna alang sa pagkabalaan, aron maghunahuna ta og matarung. Gitangtang na...ang pagpabalaan usa kini ka Griyegong pulong nga may duha ka, kahulogan nga "gilimpyohan na, ug gigahin alang sa pag-alagad."

⁹² Dayon, ang sunod, mao na ang bautismo sa Kalayo ug Espiritu Santo, aron mopuyo ang Dios sa sulod nato. Ug ang Kalayo sa Dios ang nagalimpyo sa atong mga kasingkasing gikan sa sala, ug ginapahimutang ang Espiritu Santo diha sa kinasuloran. Mao nga igapamunga na nato ang mao ra nga Kinabuhi nga gipamunga *Niini*, tungod kay anaa na man Kana kanato.

⁹³ Matikdi n'yo, diha sa natural nga paghimugso, sa diha nga ihimugso na sa usa ka babaye ang bata. Ang natural nga kinabuhi nagatipo man sa espirituwal nga kinabuhi. Sa natural, sa diha nga ihimugso na sa babaye ang bata, ang unang butang nga mahitabo mao ang pagbugwak sa tubig, dayon ang dugo, ug pagkahuman ang espiritu na (ang kinabuhi). Kuhaon ang bata ug pikpikon siya, ug mosugod na siya, sa paghilak. [Ginapalampak ni Igsoong Branham ang iyang mga kamot sa makausa—Ed.] Tubig, dugo, espiritu.

⁹⁴ Ug bueno sa diha nga mahimugso ang usa ka bata ngadto sa Ginghamarian sa Dios, moabot siya sa mao gihapong paagi: tubig, Dugo, Espiritu.

⁹⁵ Karon matikdi n'yo, ang pagpabalaan, ang ikatulong hugna...ang ikaduhang hugna niini, mao ang paghinlo sa hunahuna; ang paghan-ay sa kasingkasing, sa hunahuna sa kasingkasing, alang sa pagkabalaan.

⁹⁶ Mahimo man sa usa ka tawo nga maghinulsol sa mga sala ug makahunahuna pa gihapon siya og...Bueno, tingali'g usa—

usa siya ka imoral nga lalaki, ang matag babaye nga imoral og hitsura nga iyang makita, anaa gihapon dinha. Tingali'g usa siya ka palahubog; sa matag higayon nga makasimhot siya og ilimnong makahubog, anaa gihapon kana dinha. Kita n'yo?

⁹⁷ Apan sa diha nga napabalaan na siya, nan gitangtang na gayud kana nga kailibgon gikan kaniya. Kita n'yo? Gitangtang na ang tinguha para niana. Hinoon mahimo gihapon siyang matintal, apan gitangtang na man sa Dios ang maong tinguha para niana. Pero, dili pa gihapon siya matarung.

⁹⁸ Dayon, bautismohan na siya sa Espiritu Santo ug Kalayo. Ingon nga gilimpyohan na, gipadilaab, og nahinloan na; ug pagkahuman igapahimutang na alang sa pag-alagad sa Dios.

Gigahin lamang sila sa pagpabalaan *alang sa pag-alagad*.

⁹⁹ Ug matikdi ang eksaktong paagi sa pag-abot niana, ang pag-abot sa mga mensahe. Si Martin Luther, sa pagpamatarung; si John Wesley, sa pagpabalaan; ang pentecostal, sa bautismo sa Espiritu Santo. Mao ra kana ang mga mensahe, mao nga dili na mahimong magkaaduna pa og mga kapanahonan, kita n'yo. Ania na kita sa katapusang panahon. Tulo ra ka hugna. Ang bautismo ang nagalimpyo sa kasingkasing pinaagi sa Espiritu Santo.

¹⁰⁰ Karon makapakurat gayud, nga ipaagi sab Niya ang dapit nga atong pagapuy-an, sa mao gihapon nga proseso.

¹⁰¹ Bueno, gitawag Niya ang Iglesia pinaagi'g pagpamatarung, gitawag Kini pinaagi'g pagpabalaan, dayon gipuno Kini sa Espiritu Santo ug Kalayo. Ug gipaagi Niya Kini sa usa ka proseso, aron Siya Mismo, ang Balaang Espiritu Mismo, ang Anak sa Dios, mahimong makapuyo sulod sa kasingkasing sa tawo. Bueno, kinahanglan Niini nga moagi una sa ingon-ana sa dili pa Siya mahimong mosulod Niini.

¹⁰² Himatikdi, gibuhat Niya usab kini sa kalibutan, kon diin magapuyo ang Pangasaw-onon, ang mao gihapon nga pamaagi, ang Iyang mao gihapong plano sa—sa katubsan.

¹⁰³ Matikdi n'yo ang kalibutan sa wala pa ang paglunop. Ang Dios, human nga naghinulsol kadto, pinaagi sa Pangasaw-onon niadtong panahon, si Noe, gihatagan Niya kadto og bautismo sa tubig, gipalunopan kadto sa tubig. Dayon, ang pagpamatarung, nagapakita nga pagatawgon Niya pag-usab kining nahulog nga kalibutan, gikan sa Eden, alang sa pagpasig-uli niini.

¹⁰⁴ Dayon mianhi si Cristo ug giula ang Iyang Dugo ngadto niini, gilimpyohan kini ug giangkong kini. Kita n'yo, mao kana ang kalibutan nga atong ginapuy-an karon.

¹⁰⁵ Kita n'yo na kung giunsa ni Satanas, nga mabasa dinhi sa Kasulatan, nga gipaningkamotan niyang ipadawat kini kang Jesus aron madaut ang plano sa Dios, gihatag niya kini ngadto kang Jesus sa dihang gidala niya Siya didto ibabaw sa bukid, ug

gisulayan kining ihatag ngadto Kaniya nga wala gipalit pinaagi sa Dugo?

¹⁰⁶ Namatikdan n'yo ba nga si Abraham kaniadto, sa dihang gisulayan nilang ihatag kaniya ang maong luna, gipalit niya kadto sa kantidad nga pipila ka siklo nga salapi, sa atubangan sa mga tawo, ingon nga usa ka timaan, ingon nga pamatuod? “Tugoti nga maipahibalo niining adlaw nga akong gipalit kining luna nga lubnganan.” Kita n'yo, gipalit gyud niya kadto! Ug gisulayan pud ni Satanas nga—nga ihatag Ug gisulayan pud ni Satanas nga—nga ihatag kang Jesus ang gingharian nga giangkon niya sa karon. Gisulayan niyang ihatag kini ngadto Kaniya ingon nga usa ka regalo, apan ayaw ni Jesus nga dawaton kini. Tungod kay kini'y, kita n'yo, tungod puede sa gihapon kini angkonon ni Satanas. Busa, kinahanglan kining paliton. Amen. Siya mao ang Pulong diha sa kahupnganan niini. Dili gyud nila Siya mahimong limbongan niini.

Kung ingon niana, kinahanglan niini karon nga madawat ang baustimo sa Kalayo.

¹⁰⁷ Kita n'yo, karon aduna na kini'y. . . Unsa ma'y nahitabo? Mianhi si Cristo ug gitawag ang Iglesia paingon sa paghinulsol, og bautismo sa Ngalan ni Jesus Cristo, alang sa pagpasaylo; pagbalaan sa Iglesia; ug pinaagi sa Kalayo sa Dios mikanaug Siya ug gisunog ang tanang kahugawan, ug misulod ug mipuyo na sa kasingkasing sa tawo.

¹⁰⁸ Bueno, ang kalibutan, aron nga matubos kini alang niining tawo nga tinubos, gigamit Niya ang Iyang mao gihapon nga pamaagi. Iya kining gibautismohan sa tubig, human niadtong paglaglag sa kalibutan pinaagi'g lunop. Giula ang Iyang Dugo ngadto niini, aron limpyohan kini ug angkonon kini. Iyaha man gyud kini.

Pero si Satanas naninguha pang moingon, “Ihatag ko kini Kanimo.”

¹⁰⁹ Miingon Siya, “Dili, sir, paliton Ko kini.” Usa kini ka pamatuod. Gibayaw Siya, ingon nga timaan, nga napalit na Niya kini. Gipalit na Niya kini.

¹¹⁰ Apan karon kinahanglan niini nga moagi ùna sa bautismo sa Kalayo, sa balaang Kalayo sa Dios, nga magalimpyo sa yuta ug sa kalangitan nga nagaputos niini. Dayon, gipalit kini aron nga makapuyo niini ang mga tinubos, og magapuyo niini nga malinawon. Himatikdi, ang bautismo sa Kalayo ang magalimpyo niini gikan sa sala, gikan sa sakit, gikan sa mga kagaw sa balatian, gikan sa mga makasasala, gikan sa yawa ug sa tanang pundok niini. Igatambog man siya, ngadto sa Linaw nga Kalayo. Ang balaang Kalayo sa Dios, mokanaug sa Langit, gikan sa Dios, ug pagasunogon kini, matikdi n'yo, aron iandam kini para puyan sa Dios. Kay, ang Dios, sa Bag-ong Kalibutan nga umalabot, magapuyo man sa yuta. Tingali'g, moingon mo, “Ang Dios,

nagapuyo man kaha Siya sulod sa kasingkasing sa tawo.” Apan, Siya ug ang Pangasaw-onon mahimo man nga Usa na, ug moadto na sila sa ilang Puloy-anan sa Bag-ong Kalibutan. Ug ang mao gihapon nga plano sa katubsanan ang gigamit aron parehong, tubuson, ang kalibutan ug ang mga tawo nga nanagpuyo niini.

¹¹¹ Kita n’yo, ang kasingkasing kinahanglan man sab nga malimpyohan nga sama niana. Sa dili pa mahimong mokanaug ang Dios diha sa persona sa Espiritu Santo, nga mao si Cristo nga nagakunsad ug nagapuyo sulod sa kasingkasing sa tawo, kinahanglan kining maghinulsol una. Kinahanglan kining magpabautismo diha sa tubig, sa Iyang Ngalan, aron maipakita kon si kinsa ang nanag-iya niini.

Dayon kinahanglan kining malimpyohan pinaagi sa Dugo ni Jesus.

¹¹² Ug pagkahuman ang balaang Kalayo ug Espiritu Santo, sa Dios, mokanaug na ug pagasunogon ang tanang pangibog sa kasal-anan, ang tanang kinaiyahan nga iya sa kalibutan. “Ug, busa, ang nagapakasala sa tinuyo human nga madawat ang kahibalo sa Kamatuoran...” Usab, ang Biblia miingon, “imposible...” “Kay, ang usa—usa ka tawo nga gipanganak gikan sa Dios dili makasala; dili siya nagapakasala.” Wala gayu’y paagi para makasala siya. Unsaon man niya pagkahimong usa ka makasasala, ug usab usa ka tinubos, sa parehong higayon? Unsaon man nako pagkahimong anaa sa prendahanan, ug nalukat na sa prendahanan, sa parehong higayon? Kita n’yo? Oh, gitubos Niya kita pinaagi sa Iyang Dugo; pinaagi sa Iyang Espiritu gihinloan Niya kita; ug pagkahuman mianhi aron mopuyo sa sulod nato, sa Iglesia. Dili sa denominasyon, ha; kondili sa Iglesia!

¹¹³ Matikdi n’yo og ayo karon samtang ginahisgotan nato kining, mga dapit nga—nga atong pagapuy-an. Karon, bueno, ang—ang paghinulsol sa wala pa ang paglunop, kaniadto, ang naghatud og bautismo sa tubig. Dayon mianhi si Cristo ug giula ang Iyang Dugo ngadto niini, aron limpyohan ug angkonon kini. Ug dayon, ang sunod, mao na ang paglaglag sa kalibutan sama sa kung unsa kini sa karon.

¹¹⁴ Ang tanang kasal-anan nga anaa sa kalangitan sa itaas, “ingon nga ang yawa ang principe sa kagamhanan sa hangin,” nan iyang ginababagan (ginabatokan) ang mga panalangin sa Dios. Dinha nagagikan ang mga liti sa kilat nga nagaigo sa yuta, ug tanan na, gikan sa kalangitan, ang mora’g nagapanghiwa nga bunok sa ulan, ug mga bagyo, bag-...ang mga unos ug tanan na, “nagagikan sa itaas,” diin si Satanas mao, “ang principe sa kagamhanan sa hangin.”

¹¹⁵ Matikdi, kita n’yo na kung giunsa ni Satanas sa pagpaningkamot nga mapanag-iya kini, sa gikaingon ko na kaganina lang, pinaagi sa paghatag niini ngadto kang Jesus nga

wala kini gipalit. Kung ingon-ana, aduna gihapon si Satanas og pag-angkon niini, tungod kay gimarkahan man niya kini, kita n'yo. Apan gipalit gyud kini ni Jesus pinaagi sa Iyang giula nga Dugo ug gibalik kini ngadto sa tinuod nga tag-iya niini. Kita n'yo? Sa ingon nianang paagi Niya kita gipalit, pinaagi sa Iyang Dugo, sa ingon-anang paagi Niya gipalit ang Iglesia.

¹¹⁶ Ug bueno ang bautismo sa Kalayo ang nagalimpyo niini gikan sa tanang mga kagaw, sa tanang mga balatian, sa tanang mga sakit, og bisan sa tanang espirituwal nga mga butang; nga para kanato, usab, gibuhat ang mao gihapon nga paagi; aron iandam kini para puy-an sa Dios, sa halangdong kapanahonan nga umalabot, ang Bag-ong Yuta. Kita n'yo, Iya kining tubuson sa mao ra nga paagi sa pagtubos Niya sa Iyang mga katawohan. Ginabuhat Niya kini sa mao ra nga paagi, ang Iyang plano sa katubsanan. Kay, Siya man mao ang walay-pagkausab nga Dios, sa kanunay wala gyud ginausab ang Iyang mga plano.

¹¹⁷ Ngani gisulti ko na kaninyo, kaniadto pa, ug gipahibalo na kini kaninyo, ug sa tanang kapanahonan, nga dili mahimong mausab ang Dios; ginapahayag Niya kini, nga pareho ra, sa tanang paagi.

¹¹⁸ Gipahayag Niya, ang Iyang unang mensahe, sa kalibutan sa wala pa ang paglunop kaniadto, pinaagi ni Noe nga propeta.

¹¹⁹ Nakig-istorya ako sa usa ka minahal nga igsoon nga ania dinhi karon uban kanako. Kagahapon, ingon siya, “May usa ka butang nga imong gisulti, Igsoong Branham, nga pirming nagapatay-og kanako.”

Ingon ko, “Unsa man kana, igsoon?”

¹²⁰ Ug ingon siya, “Ingon-ini ang imong gisulti,” ug tinuod man kini, “Ang minorya, pagkagamay ra gayud ang mamaluwas sa adlaw na sa Pag-abot.’ Ug nahisgotan nato kon daw sa unsa nga miingon si Jesus, ‘Masigpit ang pultahan ug hiktin ang dalan, ug mamahimong diyutay ra ang makatultol niini.’ Karon himatikdi, ang Biblia miingon, ‘Maingon sa nahitabo kaniadto sa mga adlaw ni Noe, diin walo ka mga kalag ang nangaluwas latas sa tubig, mao man usab sa Pag-abot.’”

Ingon ko, “Igsoon, ang imo lamang . . .”

Ingon pa siya, “Hinumdumi, aduna lamang og walo ka kalag kaniadto.”

Ingon ko, “Katunga lang diay sa hulagway ang imong nakita.”

¹²¹ Tungod, si Noe mao man ang tipo sa mga nahibilin nga nakalatas, dili ang pundok nga gilalin. Si Enoch, usa ra ka tawo, ang nahiuban sa Pagsakgaw sa wala pa miabot ang maong lunop kaniadto, nga nagapakita nga ang Iglesia dili na mopaingon sa kasakitan o unsa man nga sama niana. Gilalin si Enoch, usa ra ka tawo. Oh, mahimong daghan lagi ang iglesia; apan ang

maong Pangasaw-onon mamahimong usa ka gamay ra kaayo nga pundok nga mao'y magalangkob sa Pangasaw-onon. Bueno, mahimong daghan gayud ang iglesia; apan, ang Pangasaw-onon, nakita n'yo, itandi n'yo ang walo sa usa ra. Walo ka pilo ang kagamay, sa mamahimong Pangasaw-onon, kaysa sa iglesia.

122 “Ug kon ang matarung malisud man ganing maluwas, unsa pa kaha'y dangatan sa mga makasasala ug dili-diosnon,” sila nga mga mas nasayod unta, sa mga dili angay'ng buhaton, pero nanagpadayon lang ug ginabuhat sa gihapon ang mga ingon niana? Sila nga mga nanagsunod sa mga kalagdaan sa denominasyon imbis unta sa Pulong, asa kaha sila mahidangat, nagapatawag pa gyud nga mga Cristohanon, og ginagamit ang Ngalan ni Cristo?

123 Bueno, tukma gayud, nga si Noe usa ka tipo niadtong mga nakalatas. Timan-i n'yo, sa dihang migawas na si Noe, kauban niya kaniadto si Ham. Mao nga anaa sa gihapon ang sala. Nakalatas pud mismo ang sala, pinaagi sa arka. Ang dili-pagtoo, pagduhaduha, nakasakay sab didto sa arka, og nakalatas ibabaw sa paghukom. Apan si Enoch mikayab na nga hataas pa kaysa sa arka, miadto mismo siya sa Presensiya sa Dios. Apan si Noe nakalatas ug nakagawas, pero aduna sa gihapon ang sala; ingon nga tipo sa Milenyum, nga kahimtang sa kalibutan.

124 Ang Milenyum dili pa man mao ang katapusan. Aduna sa gihapon og panahon human sa Milenyum. Ang Milenyum usa ra man ka gidugayon sa panahon; apan, dili ingon niana ang Bag-ong Yuta. Dili, gayud. Matikdi n'yo, dinha, hisgotan nato kana pagkataudtaud.

125 Kita n'yo, ang yuta, nga gitubos na, mahibalik na pag-usab ngadto sa orihinal nga Tag-iya niini. Gibakwi kini. . . gibakwi Niya kini gikan kang Satanas. Iyang ihimulag, og bakwion ang yuta gikan kang Satanas, sama lang sa Iyang pagbakwi kaninyo gikan kang Satanas, sama ra usab niadtong Iyang pagbakwi sa luoy'ng babaye nga atua sa atabay gikan kang Satanas. Atua usab ang sacerdote, nga nagdahum nga kauban gyud niya ang Dios, pero wala diay siya'y bisan unsa man. Kita n'yo?

126 Gusto kong ihulagway kana para kaninyo sa makadiyut lang. Karon, buut natong masabtan kini nga klaro gayud, busa matikdi ninyo og ayo karon ang mahitungod niini nga pagtudlo. [Si Igsoong Branham nagadrowing og mga hulagway sa pisara para sa sunod nga mga pipila ka parapo—Ed.]

127 Bueno, kini *dinhi*, ania ang Dios. Ang Dios, nga mao ang Eternal, nga walay. . . Wala na'y uban pa gawas Kaniya. Apan, diha sa Dios, aduna Siya og mga kinaiyahan. Karon, kini *dinhi* ang nagarepresentar sa Pulong, sa Pulong sa Dios, nga nahimong unod ug nagpuyo ipon kanato diha sa persona ni Jesus.

128 Karon kini *dinhi*, ania ang maong tawo, ihulagway nato siya nga ingon *niini*. Karon, *kini* mao ang gitawag nga babaye nga

atua sa may atabay. *Kini* sab mao ang sacerdote, ang Fariseo. Ug ang nakita ninyo *dinhi*, ang tibuok bakante nga bahin sa pisara, nagakahulogan kini sa grasya ug kaluwasan.

¹²⁹ Bueno, “Sa sinugdan mao na ang Pulong. Ug ang Pulong nahimong unod ug nagpuyo ipon kanato.” Ang maong tulo ka hugna. Usa una *Kini* ka kinaiyahan, nga anaa na sa Dios kaniadtong, gihunahuna Niya ang Iyang Kaugalingon ingon nga usa ka tawo; ug kana ang nagpahimo Kaniya nga mamahimong si Jesus; ug karon, kung maatua man kamo Didto, nan kauban na Niya kamo kaniadto pa. Tungod, aduna lamang og usa ka porma sa Kinabuhing Walay Katapusan, ang Dios kana; ug kinahanglan kabahin gyud kamo sa Dios sa sinugdan pa lang, dili tungod kay gipili n’yo *kini dinhi*. Kondili gipili Niya kamo. “Ang tanan nga gikahatag Kanako sa Amahan magaari.”

¹³⁰ Karon tan-awa n’yo kining sacerdote *dinhi*. Atong makita ang iyang ubos nga bahin, *dinhi*, kung unsa siya, kaniadtong wala pa siya natawo, kung mamahimong unsa siya, makasasala na daan.

Ania sab ang impiyerno, *dinhi* dapit.

¹³¹ Karon, kining gamay nga bahin *dinhi*, nga mora’g susama sa pisara, nagarepresentar kini sa iyang kaputli. Usa man siya ka sacerdote. Usa siya ka dungganon nga tawo. Nagarepresentar kini *niini*. Siya usab, kaniadto, kinahanglan usa gyud ka maayo nga tawo, kay kon dili nan dili unta siya mamahimong sacerdote. Apan nakita n’yo ba kung giunsa niya pagkahimong ingon niana, pinaagi kadto sa intelektuwal nga kahibalo.

¹³² Karon, kining luoy’ng babaye, ang una niyang kinabuhi, *dinhi* dapit, ingon nga usa siya ka bigaon kaniadto, siya’y bug-os gyud nga nadaut. Apan sa iyang kinasuloran, *dinhi*, aduna gayu’y diyutay nga panabot. “Nasayod ako nga pagmoabot na ang Mesias . . .” Kita n’yo? Kita n’yo, anaa na kana *dinha*.

¹³³ Matikdi n’yo, kaniadtong mianhi si Jesus ug gipadayag ang Pulong, tungod kay ginatugkad man sa Pulong ang mga hunahuna nga anaa sa kasingkasing; sumala sa ginaingon sa Mga Hebreohanon 4 nga pagabuhaton Niini, 4:12, nga Iyang pagabuhaton. “Ang Pulong usa ka magtutugkad sa mga hunahuna sa kasingkasing,” ug mianhi Siya ingon nga Anak sa tawo, nga Propeta. Unsa ma’y nahitabo? Kining sacerdote, nga aduna lamang og intelektuwal nga kahibalo, miingon, “Usa kini ka yawa,” tungod kay mao na man kana ang tawag sa iyang denominasyon niini. Unsa ba’y gibuhad niini? Wala man siya’y representasyon, busa gipangitngitan siya niini.

¹³⁴ Apan kining luoy’ng babaye nga walay unsa man nga igapresentar; siya’y ingon gayud ka malaw-ay ug mahugaw. Apan, matikdi n’yo, sa kinasuloran niya, aduna siya’y representasyon, kita n’yo. Ug, busa, nagahulat gyud siya niini nga mahimong unod.

Ug sa diha nga miingon si Jesus, “Lakaw ug kuhaa ang imong bana ug balik dinhi.”

Ingon niya, “Sir, wala man ko’y bana.”

¹³⁵ Miingon, “Tinuod ang imong giingon, tungod kay nagkaaduna ka na og lima, ug ang usa nga aduna ka karon dili man imong bana. Nagkaaduna ka na og lima. Kung ingon-ana aduna ka na og unom.”

¹³⁶ Ingon niya, “Sir!” (Dili nga, “Ikaw,” dili pud, “Beelzebub.”) “Naila ko nga Ikaw usa ka Propeta. Bueno, nasayod kami nga ang Mesias, nga ginatawag og Cristo, moabot gayud. Ug pagmoabot na Siya, buhaton Niya ang ingon-ini.”

Miingon Siya, “Ako mao Siya.”

¹³⁷ Wala na’y pagduhaduha. Dili mo na kadto kinahanglan hatagan og katin-awan. Nakita niya mismo kadto. Gitoohan niya kadto. Milakaw na siya! Ngano man? Unsa ba’y gibuhath Niini kaniya? Gitubos Niini ang maong babaye.

¹³⁸ Karon matikdi, mianhi Siya aron mamahimong usa ka Manunubos. Husto ba kana? Unsa ma’y buut ipasabot sa *tubuson*? “Ipahibalik.” Ngano man nga wala Niya gitubos ang sacerdote? Tungod wala man daan siya didto kaniadto. Kita n’yo? Kita n’yo na, wala siya’y representasyon.

¹³⁹ Mianhi si Jesus aron tubuson kadtong mga nahulog. Sa pagkahulog, nahugawan *kini*, kanang maong babaye; apan anaa na siya sa Dios diha sa Iyang panghunahuna sa wala pa ang pagkatukod sa kalibutan, ug mao nga mianhi ang Dios aron limpyohan siya. Kita n’yo? Didto daan Iyang... Aduna na siya og Kinabuhing Walay Katapusan. Kita n’yo?

¹⁴⁰ Samtang, ang sacerdote, unsa ma’y gibuhath niini kaniya? Gipahibalik siya niini mismo ngadto sa iyang pagadangatan. Wala man siya’y bisan unsa, sa sugod pa lang, kondili intelektuwal nga kahibalo lamang.

¹⁴¹ Karon paminaw, higala, kung ang bugtong butang nga aduna ka mao lamang ang intelektuwal nga kahibalo, nan nagkaaduna ka lang og usa ka butang nga lahi kaysa niana. Ug dili mo gayud Kini madawat gawas kon aduna ka’y representasyon. Mao kana’y hinungdan nga nagatoo ko nga gikan pa kamo sa sidlakan ug kasapdan, sa amihanan ug habagatan; tungod sa Pulong, nga buhi, og nadayag.

¹⁴² Matikdi n’yo karon kung ginaunsa Niya pagpahayag ang Iyang pamaagi pinaagi sa Iyang mga propeta, sa sugod pa lang. Wala gayud Niya kini giusab.

¹⁴³ [Blangko nga bahin sa teyp—Ed.]... kaluwasan. Gimatarung Niya ang usa ka tawo; gibalaan siya; gipadala ang Espiritu Santo ug Kalayo, ug gisunog ang sala diha kaniya, ug mipuyo kaniya, Siya Mismo.

144 Mao man usab ang Iyang ginabuhat sa yuta, nga mao gihapon nga pamaagi, ang Iyang pagagamiton sa plano Niyang pagtubos niini. Naghinulsol na kini kaniadto ug nabautismohan na sa tubig, sa . . . pinaagi ni Noe. Mianhi si Jesus ug gibalaan kini, pinaagi sa pagpatulo sa Iyang Dugo ngadto niini, ug giangkong kini. Ug sa Bag-ong Yuta nga umalabot, bautismohan na kini sa balaang Kalayo, aron mahinloan kini sa tanang yawa, sa tanang kagaw, sa tanang sakit, sa tanan-tanan, ug himoon kini nga bag-o na. “Nakita ko ang usa ka Bag-ong Langit ug usa ka Bag-ong Yuta.”

145 Mahimo ka nga usa na ka bag-ong tawo. Amen! Dili nga usa gihapon ka daang tawo nga gitapakan lang, pinaagi’g pagpamiyembro sa iglesia o sa pagpaninguha nga magbag-o, kondili bug-os gyud ka nga usa na ka bag-ong linalang. Kuhaon man sa Dios ang daang tawo ug bug-os kining sunogon, pinaagi sa Espiritu Santo ug Kalayo, ug moanha Siya Mismo, og ipadala ang imong representasyon. “Walay tawong makahimo sa pag-ari Kanako gawas kon pagadanihon siya sa Akong Amahan. Ug ang tanan nga gikahatag Kanako sa Amahan magaari Kanako.” Nasabtan n’yo ba? Mao ra nga plano; mao ra sab nga pamaagi.

146 Si Satanas . . . pagawagtangon gikan sa yuta, sama ra gayud nga giwagtang si Satanas gikan kaninyo. Dili na makababag si Satanas; o, mahimo gihapon siyang manintal, apan dili gyud niya madani ang usa ka natawo na pag-usab nga Cristohanon. Tungod kay, ang Dios, sukad pa sa pagkatukod sa kalibutan, nakita na siya, ug gipadala si Jesus aron tubuson siya, ug ang Dugo na ang magasulti para kaniya. Unsaon man niya pagpakasala sa dihang dili na man kini makita, bisan, sa Dios? Dili gani Niya . . . Ang Iya lamang madungog mao ang imong tingog. Ang imong representasyon na lang ang Iyang makita. Amen! Tinuod kana. Kita n’yo?

147 Sa mao gihapon nga pamaagi, kay ang kalibutan usa man sa Iyang mga kinaiyahan sama ra usab nga kamo usa sa Iyang mga kinaiyahan. Ang kalibutan nahimong usa sa Iyang mga kinaiyahan, tungod kay anaa na man kini kaniadto sa panghunahuna sa Dios, sa sugod pa lang. Ang magkaaduna og kalibutan, ang maanaa sa Trono, ang mamahimong usa ka Hari, ang mamahimong usa ka Manunubos, ang mamahimong usa ka Mananambal, Iya kanang mga kinaiyahan.

148 Sama lang sa usa ka kinaiyahan nga nagagikan kaninyo. Dili ko makasulti og—og “poste” gawas kon maghunahuna sa ko og poste. Dili pud ko makasulti og “tawo” gawas kon maghunahuna sa ko og tawo. Ug pag maghunahuna ko og tawo, dayon mosulti ko og “tawo,” ang maong hunahuna mao’y akong kinaiyahan ug ang pagpahayag niini mao ang pulong. Kita n’yo?

149 Sama ni Isaias kaniadto, giunsa man niya pagsulti, nga, “Usa ka ulay ang magasamkon”? Unsa ba ang hunahuna?

150 Bueno, daghan kaninyo ang nagahunahuna kon sa unsang paagi kaha nagaabot, kanang, mga pagpang-ila. Sultihan ko kamo. Kita n'yo, pulong kana nga akong ginasulti. Pero dili kana akong panghunahuna, tungod kay wala man ko masayod. Wala sab ko masayod mahitungod niana nga panghunahuna. Unsaon man nako pagsulti kaninyo kung si kinsa kamo ug kung taga asa kamo, sa dihang wala man gani ko makaila kaninyo? Unsaon man nako pagsulti kaninyo kung unsa ang nabuhat ninyo napulo na ka tuig ang milabay, sa dihang wala ko pa gyud kamo nakita sukad-sukad sa tibuok kong kinabuhi? Unsaon man nako pagsulti kaninyo kung asa kamo ug kung unsa ang inyong pagabuhaton sulod sa napulo ka tuig gikan karon? Unsaon man nako pagkahibalo sa umalabot? Apan hunahuna gyud kana ni Kinsa man nga dili ako.

151 “Batoni ninyo ang hunahuna nga diha kang Cristo. Batoni ninyo ang hunahuna nga diha kang Cristo.” Kita n'yo, kung ingon-ana dili diay kana inyong panghunahuna. Kondili Iya kanang panghunahuna, pinaagi kaninyo. Ug dili ang kaugalingon n'yong mga pulong ang inyong ginapahayag; kondili ginapahayag n'yo ang Iyang mga Pulong.

152 Mao kana'y hinungdan nga pirling nagakalibog ang mga kaigsoonan, mahitungod sa paghubad og mga pagsulti sa laing mga dila, ug mga ingon-anang butang. Kita n'yo, nagasulti sila og mga butang nga dili husto, ug wala nila naamgo nga si Satanas na kana. Moingon mo, “Sa tanaman sa Dios?” Hulata lang ninyo hangtud nga matapos kita, og hibaloa n'yo kung mao ba gyud kana, o dili. Ang mga bunglayon ug ang trigo nagatubo sa mao ra nga umahan. Pareho sab silang nabuhi pinaagi sa mao ra nga adlaw ug mao ra nga ulan. Kita n'yo?

153 “Apan kung adunay usa sa taliwala ninyo nga usa ka propeta, Ako nga Ginoo magpakigsulti kaniya. Ug kung ang iyang ginasulti nagakahitabo, nan Ako kana, kita n'yo, tungod kay dili man niya ginapahayag ang sa iya mismo. Kondili ginapahayag niya ang Akong mga hunahuna, ang Akong mga kinaiyahan sa mga butang nga kinahanglang mamahitabo, ug pagagamiton Ko ang iyang baba aron sa pagpahayag niana. Ug human nga masulti na niya ang mga niana, mahitabo gayud kana. Ang mga langit ug yuta mangahanaw, apan ang Akong Pulong dili gayud mapakyas.”

154 Miingon si Isaias, “Usa ka ulay ang manamkon.” Mao na kana. Magasamkon ang maong babaye. Kung unsay gisulti sa Dios, buhaton gyud Niya.

155 Oh, ginapahayag Niya, pinaagi sa Iyang mga propeta, ang tanan Niyang mga kapadayagan, tungod kay Iya man kanang mga kinaiyahan sa mga hunahuna Niya nga gipahayag.

156 Bueno, anaa na kini kaniadto, sa *niining* luoy'ng babaye. Usa man siya sa Iyang mga kinaiyahan. Kita n'yo?

¹⁵⁷ Ug atua usab ang sacerdote, nga nagarepresentar pud unta sa Kahayag. Nakat-onan niya kadto gikan sa Biblia. Nakat-onan niya nga Dios ang Dios. Nakat-onan niya nga ang pagkabalaan matarung. Nakat-onan niya nga adunay balaod ang Dios. Nakat-onan niya kadto tungod ra sa usa ka intelektuwal nga panghunahuna. Ug nahimugso man unta siya sa matarung nga kaliwatan; usa siya ka Levihanon. Apan nahibaloan lang niya kadto pinaagi sa intelektuwal nga panghunahuna. Ug sa diha nga ang Kahayag para sa maong panahon... Kita n'yo, nakat-onan niya kadto sumala sa kung unsay nahitabo *na*, dili sumala sa kung unsa ang kasamtangang nagakahitabo; kondili sa kung unsay nahitabo *na!* Ug sa dihang nasayran niya kung unsa ang kasamtangang nagakahitabo, ang iyang denominasyon wala gyu'y gikasulti mahitungod Niini, busa wala siya'y representasyon Niini.

¹⁵⁸ Apan ania ang Manunubos sa ibabaw sa yuta niadtong panahona, aron tubuson kadtong mga kinaiyahan sa Dios, ug gidawat kadto sa maong babaye. Wala gyud siya nagduhaduha niadtong. Ingon siya, "Pagmoabot na ang Mesias, buhaton Niya ang ingon-*ini*," ug mao na kadto. Ug nakita man sa maong babaye nga nabuhat kadto, busa... ingon Niya, "Ako mao ang Mesias," busa mao na mismo kadto. Wala na'y pangutana pa. Milakaw na dayon siya, og gisultihan ang tanang uban pa, "Umari kamo, tan-awa n'yo kung Kinsa ang akong nakita."

¹⁵⁹ Kini nga mga proseso ang magapahimo kanato nga limpyo, ingon nga usa ka templo nga Iyang puloy-anan: pagpamatarung, pagpabalaan, og bautismo sa Espiritu Santo pinaagi'g Kalayo. Kini mao ang nagalimpyo niining (atong) templo.

¹⁶⁰ Bueno, ang katukoranan sa karaang kalibutan wala man gyud ingon nga nahanaw, sa mga tubig kaniadtong gilimpyohan kini; ang katukoranan niining planeta, ang karaang katukoranan, ang... ang tanang hugaw, ang tanang butang nga gipahimutang sa Dios sa ibabaw sa yuta, wala man nahanaw sa dihang gilaglag kaniadtong unang kalibutan. Ug miingon man ang Biblia nga kini "nahanaw," apan wala man nahanaw ang katukoranan niini. Igo lang nga nahanaw ang sala ug mga makasasala nga anaa ibabaw niini. Pero nagpabilin sa gihapon ang katukoranan.

¹⁶¹ Apan, nakita n'yo, sama ra sa pagpamatarung, sumala sa gusto ninyong hunahunaon mahitungod niini kamong mga Baptist ug mga Methodist, kon pagpamatarung lamang, pagtoo ug pagpabautismo, dili pa kana igo. Mamalik lang gihapon kamo sa mga butang nga iya sa kalibutan, ug putlan ang inyong buhok ug magsul-ob og purol, ug tanan nang uban pa. Kita n'yo, tungod wala pa ma'y nahitabo. Igo lang kamong milingi ug nakaamgo sa gibuhat ninyong sayup.

¹⁶² Unsa ba'y gibuhat sa pagpamatarung ngadto sa kalibutan?

Wala kini'y nabuhat og bisan unsa man ngadto niini; nagpasugod hinoon, og ingon ka daghan na usab nga sala nga sama kaniadto. Ingon niana usab ang ginabuhat sa tawo, ug dinha lang siya kutob.

¹⁶³ Ingon niana pud unta ang angay'ng makita sa, bantugang ebangelista, nga si Billy Graham. Ingon siya, "Sa nagsangyaw ako ug adunay traynta ka libo nga mga nakabig, pero sa pagbalik ko human sa usa ka tuig ug wala na'y bisan traynta man lang." Dinha lang man gud sila kutob. Kita n'yo? Ug, sigurado gayud, nanaghinulsol man sila. Nagatoo ko nga nanaghinulsol sila; kadaghanan kanila, o ang pipila kanila, tingali. Apan dili man kana ang gikinahanglan. Kana nagapamatuod lang.

¹⁶⁴ Karon, busa ang karaang katukoranan wala gyud ingon nga nahanaw sa tubig. Igo lamang gihugasan ang kalibutan kaniadto. Nga naghinungdan sa pagbautismo niini. Nabautismohan kini.

¹⁶⁵ Mao nga magapabilin sa gihapon ang katukoranan niini, bisan pa nga pagasunogon kini pinaagi sa Kalayo. Pero dili niini pagahanawon ang yuta, kita n'yo, igo lamang pagahanawon ang sala nga anaa ibabaw niini.

¹⁶⁶ Matikdi n'yo dinhi, pipila kaninyo nga mga magtutuon sa Biblia, ug ilabina si Doktor Vayle nga nagatan-aw kanako. Matikdi n'yo sa Pedro, sa ika-2 nga kapitulo dinhi sa Pedro, sa ika-3 nga kapitulo, diay, gigamit niya ang pulong nga "kalibutan," ingon nga usa ka Griyegong pulong nga *kosmos*, nga nagakahulogan og, "ang sistema sa kalibutan." "Ang yuta mahanaw, ang mga butang mangatunaw sa hilabihang kainit." Kita n'yo? Wala nagapasabot nga ang yuta, ang planeta, pagahanawon. Kondili ang kalibutan, *kosmos*, ang pulitika, ang mga makasasala, ang mga sistema, ang sala, ang balatian, mga kagaw, og tanan na nga sayup, ang pagahanawon. Ang tanang butang nga kaniadto...

¹⁶⁷ Giuyog sa Dios ang kalangitan kaniadto, apan niining higayona miingon Siya nga Iyang pagatay-ogon ang yuta, ang kalangitan ug yuta... "Gitay-og Niya ang yuta," diay, "ug niining higayona Iya nang pagatay-ogon ang kalangitan." Kita n'yo? "Kay magadawat kita og Gingharian nga dili matarug." Usa kana ka Eternal nga Gingharian. Matikdi n'yo kung giunsa niya kini pagsaysay.

¹⁶⁸ Himatikdi dinhi, miingon si Pedro, "Ug mangatunaw sa hilabihang kainit, ug ang mga buhat nga ania niini mangasunog," dili ang planeta. "Ang mga buhat nga ania niini," ang mga buhat sa tawo, ang tanan nilang mga pulitiko ug ilang mga pamaagi, ug tanan nilang mga denominasyon ug mga pamaagi nga hinimo'g-tawo, mangasunog gyud tanan uban niini sa dihang pagasunogon na kini.

¹⁶⁹ “Ug—ug ang kalangitan mawagtang uban sa dakung dinagook.” Inyo bang namatikdan dinhi? “Ang kalangitan mawagtang uban sa dakung dinagook.” Paminaw! Ang tibuok yuta magakalayo, ug padilaabon ang mga gas nga anaa sa yuta ug pabuthon kini. Eksakto gayud. Kung hisgotan... Miingon ang Biblia dinhi, miingon si Pedro, “Ug ang kalangitan mawagtang, ug ang yuta, uban sa dakung dinagook.” Pagatayogon kini sa ingon-ana ka daku nga pagbuto, oh, grabe, tungod kay kinahanglan man nga mapuo ang tanang balatnan, ang tanang kadyapa, ang tanang tunok. Ang tanang butang nga kinahanglang mapuo, pagasunogon kana sa Kalayo. Ug, hinumdumi n’yo, dili kini puro lang literal nga kalayo, usa usab kini ka balaan nga Kalayo, kita n’yo, nga magawagtang kang Satanas ug sa tanan niyang, tanang mga yawa. “Ang langit ug ang yuta,” amen, “mawagtang,” mapuo usab ang tanang mga kagaw, ang tanang mga insekto, ang tanang natural nga kinabuhi nga anaa ibabaw niini ug sa palibot niini, bisan ang H₂O (ang tubig) mobuto sab gani. Palandunga n’yo kini. Kung hisgotan gayud ang grabeng dinagook!

¹⁷⁰ Sa hunahuna n’yo ba nga grabe na kaayo kadtong gamay’ng dinagook didto sa Tucson, kaniadtong giablihan Niya ang unom ka Selyo, nga mitay-og sa nasud og sa palibot nga dapit, ug nahimong hinungdan sa hisgotanan. Hulata lang ninyo pag madawat na niining yutaa ang iyang bautismo!

¹⁷¹ Abi ninyo, sa dihang dawaton na sa usa ka tawo ang bautismo sa Kalayo, kauban pud niana ang dakung kabanha. Ginahunahuna nila nga makauulaw kono, nga madungog ang mga tawo nga nagasinggit ug nagasiyagit nga ingon niana. Pero hulata lang ninyo pag madawat na niining yutaa ang iyang bautismo!

¹⁷² Oo, magasaysay kini...mobuto kining, H₂O, ang tubig, kay ang ingon sa Biblia dinhi sa Pinadayag 21, “ug wala na ang dagat,” mobuto man kini. Pagausabon pinaagi niini ang tibuok ibabaw sa tibuok yuta. Mobuto kini ug madugmok. Ang tanan nga anaa sa gawas niini, ang sa gawas nga bahin, ug gatasan ka piye nga anaa sa ilalum niini, bug-os gayud nga mahanaw. Ang mga kawanangan, ang mga gas nga anaa sa yuta karon, kon diin nila nakaplagan kining mga missile nga dili kono makalusot nianang, dakung kawanangan didto sa itaas, didto sa kawanangan nga atua ang tanang matang sa mga gas, ingon nila; ug mobuto gayud kana. Moabot ngadto niini ang balaang kapungot sa Dios, kita n’yo, ug pagalimpyohan kini, og pagausabon ang kinatibuk-ang ibabaw.

¹⁷³ Bueno, basin daghan kaninyo ang gustong isulat kini nga pulong, ang Griyegong pulong sa, “mahanaw.” Gikan kini sa pulong nga...gikinahanglan kong susihon kini. Nahunahuna ko man gud, “Unsaon kaha pagkahanaw niining kalibutana, ug sa gihapon magapuyo kita ibabaw niini?” Apan kung inyong

matikdan, ang pipila kaninyo nga gustong isulat kini, ispelington ko kini para kaninyo. Dili man gud nako malitok kini, p-a-r-e-r-e-c-h-o-m-i-a. Dili ko kabalo kung unsaon paglitok niini.

¹⁷⁴ Bueno, pag ingon niana, sa gikaingon ko na, sa dihang makuha ko... Pag nagaabot na kanako ang inspirasyon para sa usa ka butang, kung ingon-ana mobalik ùna ako aron hibaloon ang maong pulong. Karon, dinhi, dili man nako maispeling ang maong pulong, o dili nako—dili nako malitok kini. Apan, bahin niana, ginahatagan gihapon ko sa Ginoo og pamaagi. Moadto ako ug hibaloon kung unsay buut ipasabot niana nga pulong, dayon masabtan ko na. Kita n'yo? Pagkahuman, masabtan ko na gayud, kana. Kita n'yo?

¹⁷⁵ Ang mga langit ug yuta *mangahanaw*, bueno, kini nga pulong nagakahulogan og, “pagkausab gikan sa usa ka porma paingon sa usa pa.” Wala kini nagakahulogan og “pagkapuo,” nga sumala sa kahulogan sa pulong nga Ingles, *pagkahanaw*, ingon nga mapuo. Apan ang Hebreohanong pulong, o ang Griyegong pulong dinhi, wala man nagakahulogan og *pagkahanaw*; kondili nagakahulogan kini og, “pagkausab gikan sa usa ka butang paingon sa usa pa.” Tan-awa, dili nga, “aron mausab gikan sa usa ka kahimtang,” ang ginaingon dinhi, “paingon sa usa pa.”

¹⁷⁶ Karon matikdi n'yo, gigamit sab kini ni Pablo, kung buut n'yong basahon kini karon. Isulat n'yo ùna kini, mahimo ra ninyo kining basahon unya. Sa Tito 3:5, gigamit ni Pablo kining mao gihapon nga pulong, nga nagakahulogan og ang pagkatawo pag-usab sa usa ka tawo, ingon nga ang tawo gibag-o na gikan sa pagka-makasasala paingon sa pagkahimong balaan, dili gyud bug-os nga napuo. Pag gibag-o na ang usa ka tawo, wala man siya gipuo, kondili usa lang siya ka gibag-o na nga tawo. Gibag-o na siya gikan sa kung unsa siya kaniadto paingon sa kung unsa na siya sa karon, og dili ingon nga gipuo.

¹⁷⁷ Gigamit sab ni Jesus ang mao gihapon nga pulong diha sa Mateo 19:28; diay, dili nga 28:19. Bueno, sa 19:28, miingon Siya ngadto kanila, “Kamo magalingkod uban Kanako sa Ginghamian sa Akong Amahan, ingon nga nabag-o na,” nakita n'yo, “gibag-o na,” sa dihang gibag-o ka na. Gigamit Niya ang mao ra nga pulong.

¹⁷⁸ Ug gigamit Niya ang mao ra nga pulong sa dihang miingon Siya, ngadto sa nating kabayo, miingon, “Hubari ninyo ang nating kabayo ug buhii siya.”

¹⁷⁹ Mao sab gihapon ang gisulti Niya sa pagkabanhaw ni Lazarus kaniadto, “Hubari ninyo siya! Ilisi n'yo siya! Nagapus siya; buhii siya!”

¹⁸⁰ Unsa ma'y buut ipasabot niana? Ang yuta pagabuhian gikan sa pagkakapot ni Satanas. Pagabuhian kini. Pagabuhian kini gikan sa pulitika, pagabuhian kini gikan sa mga sistemang

pang-denominasyon og pang-relihiyon; aron nga magamit para sa Gingharian sa Dios, nga pagatukoron dinhi sa yuta. Apan samtang anaa pa kini diha sa mga kamot ni Satanas, sa pulitika. . . si Satanas nga mao'y tigpangulo sa yuta, siya ang nanag-iyani niini; panag-iyani niya kini, apan karon gitubos na kini ni Cristo.

¹⁸¹ Usa ka higayon kaniadto, panag-iyani niya ako, apan dili na karon. Usa niadto ka higayon, panag-iyani sab niya kadtong luoy'ng babaye, apan dili na karon. Kita n'yo, mianhi man si Jesus aron buhian ang pagkakaput niini. Iyang gibuhian ang pagkakaput sa sala, ni Satanas, sa akong kinabuhi, sa inyong kinabuhi, ug karon dili na kita iya.

¹⁸² Nadungog na ba ninyo nga pirmi kong moingon, inig magampo, “kuhaa ang imong mga kamot diha sa panag-iyani sa Dios”? Kita n'yo? Amen! Magmaaduna kamo og pagtoo aron angkonon ang inyong panag-iyani. Inyoha man kanang mga katungod. “Kuhaa ang imong mga kamot diha sa babaye! Kuhaa ang imong mga kamot diha sa lalaki!” Kita n'yo, ang pagtoo ang magabuhat niana. Oh, my! Dili nga puohon kini, kondili, igo lamang, “Kuhaa ang imong mga kamot diha niini,” aron badbaran kini, buhian kini, og mausab kini. Pagausabon kini.

¹⁸³ Pagausabon ang yuta. Pagausabon ang pulitika. Pagausabon ang mga relihiyon. Mahanaw ang mga denominasyon. Mahanaw ang pulitika. Tungod ang Gingharian sa Dios pagatukoron man.

¹⁸⁴ Atong mabasa diha sa Juan, mabasa si Juan diha sa Pinadayag 6:14, kita n'yo, “nahanaw kini maingon sa usa ka basahon nga gilukot.” Miingon ang Biblia nga ang. . . nga kini. . . miingon si Juan, “Nakita ko ang langit ug yuta nga nahanaw maingon sa usa ka basahon nga gilukot.” Si Juan, sa Pinadayag 6:14.

¹⁸⁵ Miingon si Jesus, “Ang mga langit ug yuta mangahanaw,” o, sa laing pagkasulti, “ang mga langit ug yuta pagausabon.” Kita n'yo, gigamit na usab ang maong pulong dinha mismo.

¹⁸⁶ Dili dili ingon nga mapuo. Kay, sa kaulahian, diha sa Pinadayag 21:2 hangtud 24, nakita man ni Juan ang Bag-ong Jerusalem nga nanaug sa Langit gikan sa Dios, ug napahimutang sa ibabaw niining yutaa. Mao nga wala nagapasabot nga mapuo kini. Kondili pagausabon hinoon ang mga sistema.

¹⁸⁷ Nakita sab ni Daniel ang mao rang butang. Usa ka Bato ang miigo sa kalibutan, nga gitapyas dili pinaagi'g kamot; ug ang tibuk hulagway sa mga sistema nadugmok ug nahimong sama sa uhot diha sa salog sa giukanan sa panahon sa ting-init, ug gipalid kadto sa hangin. Ug ang Bato, Mismo, nahimong usa ka dakung Bukid nga mitabon sa yuta. Karon matikdi n'yo kana nga Bukid, pagkataudaud. Ang maong Bukid mitabon sa yuta.

¹⁸⁸ Usab, atong makaplagan dinhi, diha, usab, sa Pinadayag, gikaingon nga, “Ang mga hari sa Bag-ong Yuta managdala

sa ilang dungog ug himaya ngadto niini.” Sa yuta, mapahimutang...Ang Bag-ong Jerusalem mapahimutang niining yutaa. Kita n’yo na, igo lamang kining giusab.

¹⁸⁹ Kamo mao ra gihapon nga lalaki, sa porma, nga kamo mao na kaniadtong gitawag kamo sa Dios, mao ra gihapon nga babaye. Apan, nakita n’yo, ang nahitabo, usa lamang kadto ka pagbag-o. Ang kanhing kinabuhi miagi na. Ang kanhing kailibgon miagi na. Ingon nga, kaniadto ganahan kaayo mong moinom og makahubog, ug mamalikas, ug makiglalis, ug makiglantugi, ug magbagdoy-bagdoy, ug pagka-imoral gayud, pero ang ingon-anang butang nawala na gyud. Kita n’yo? Apan karon gigamit na kamo...Kaniadto instrumento pa kamo ni Satanas; pero karon gitubos na kamo.

¹⁹⁰ Ug ingon niana usab ang mahitabo sa kalibutan, pagatubuson, sa mao gihapon nga pamaagi, usa na ka Bag-ong mga Langit ug Bag-ong Yuta.

¹⁹¹ Sama lang kaninyo, “Usa na kamo ka bag-ong linalang.” Ug ang Griyegong pulong niana, nasayod ang si kinsa man, nga ang gikaingon, “Usa na kamo ka bag-ong binuhat.” Amen! Usa na ka bag-ong binuhat nga anaa sa mao gihapong daan nga templo. Alleluyah. Matikdi n’yo karon kung unsay mahitabo dinhi. Pagkamahimayaon! Bueno.

¹⁹² Karon nahibaloan nato nga kining yutaa magkaaduna og mga hari sa yuta.

¹⁹³ Ug, usab, sa Mateo 5:5, miingon si Jesus, “Ang mga maaghop magapanunod sa yuta.” Dili gayud mamahimong, magkaaduna og usa na usab ka yuta. Kondili kini ra gihapon mismo nga yuta. Ginapaningkamotan kong maipasabot ùna kaninyo ang—ang plano sa katubsanan, sa dili pa, ako maghisgot og unsa pa man, kita n’yo. Ang bautismo sa Kalayo, ngadto niini, para lamang kana sa paglimpyo niini ug himoon kining usa ka dapit nga angaya’ng puy-an sa Iyang mga maaghop. Kita n’yo? Oh!

¹⁹⁴ Sama sa gibuhad Niya kanato, ingon nga Iyang mga linalang, nga pagapuy-an. Sa dili pa Siya mahimong mosulod, kinahanglan Niya ùna nga ihatag kanato ang bautismo sa Kalayo; ayha pa mosulod ug mopuyo ang Espiritu Santo, bautismo sa Kalayo ùna. Dayon, pag madawat mo na ang bautismo sa Kalayo, nan mahimo nang mosulod ang Espiritu Santo. Para unsa man? Sa pagsulod Niini, pagasunogon Niini ang tanan-tanan nga sukwahi sa Pulong, gikan kanimo. Kita n’yo? Dili Kini motoo sa bisan unsa pa man gawas sa Pulong, tungod kay Kini man mao ang Pulong. Kita n’yo? Kita n’yo? Kita n’yo?

¹⁹⁵ Bueno, mao kana’y among gihisgotan niadtong miaging adlaw, ang kapanghimatuoran sa Espiritu Santo. Kita n’yo? Ang kapanghimatuoran sa Espiritu Santo mao kanang mahimo mong dawaton ang Pulong; dili ang kung unsa nga sistema, kondili

ang magkaaduna og tin-aw nga pagsabot. Unsaon man ninyo pagpakahibalo nga tin-aw ang Pulong, nga nasabtan n'yo Kini? Ang makita Kini nga ginapanghimatud-an ang Kaugalingon Niini.

¹⁹⁶ “Bueno,” moingon mo, “Nakita ko *kini* nga ginabuhat man ang ingon-*ini*, ug *ingon-ana*.” Oh, oo, nagakinabuhi man sab ang mga bunglasyon sa mao ra nga paagi. Kita n'yo?

¹⁹⁷ Apan kinahanglan nga ang kinatibuk-ang Pulong gayud. Aron nga mamahimong Pangasaw-onon, kinahanglan nga kabahin ka usab Kaniya. Siya mao ang Pulong. Kita n'yo? Ug unsa man kana nga bahin Kaniya? Ang Pulong nga gikasaad alang niini nga panahon sa dihang ginatawag na Niya ang Iyang Pangasaw-onon. Kinahanglan nga kabahin ka Niana. Nasabtan n'yo ba kini? Karon, ayaw—ayaw n'yo kini pakyasa karon. Himatikdi.

Ug himoon Niya kining usa ka dapit nga angaya'ng puy-an alang sa Eternidad.

¹⁹⁸ Matikdi n'yo, dili pa kini nagapahinungod sa . . . Kining Milenyum nga paghari, nga usa ka libo ka tuig, dili pa mao ang Bag-ong Yuta. Kita n'yo, lahi man sab nga paghari ang paghari sa Milenyum. Hinoon dinha kita mopaingon, sa Milenyum, apan dili pa kana mao ang Bag-ong Yuta, ang Bag-ong Langit. Dili, dili pa. Usa lamang kana ka dapit nga pahulayanan, kita n'yo, usa ka panahon para sa kapahulayan, og dili gayud ang Bag-ong mga Langit ug Bag-ong Yuta; tungod kay, nakita n'yo, sa Milenyum aduna pa man kita'y mga butang nga dili puedeng makasulod diha Niana. Tipo kini sa kanhing ikapitong adlaw, sa Eden kaniadto; sa ikapitong adlaw, pagkahuman Niya nga gibuhat ang kalibutan. Sa ikapitong adlaw, mipahulay Siya sa Eden, ug ingon niana ang Milenyum.

¹⁹⁹ Kita n'yo, ang kalibutan karon halos unom na ka libo ka tuig, ang panuigon. Kita n'yo? Sa matag duha ka libo ka tuig nakasinati kini og—og pagkagun-ob. Kita n'yo?

²⁰⁰ Sa unang duha ka libo ka tuig, miabot ang lunop kaniadto, ug Iya kining gibautismohan sa (unsa man?) tubig.

²⁰¹ Sa misunod nga duha ka libo ka tuig, mianhi si Jesus aron limpyohan kini ug angkonon kini, gipatulo ang Iyang Dugo ngadto niini, og gitawag kini nga Iyaha. Oo.

²⁰² “Mobalik Ako pag-usab,” uh-huh, sa karon ingon nga Hari na kauban ang Iyang Rayna, ug sa ikaduhang duha ka libo ka tuig (unsa ma'y Iyang buhaton?) moanhi Siya ug ihatag ang Iyang panahon para sa kapahulayan.

²⁰³ Ug dayon pagasunogon kini, ug angkonon kini alang sa Mismong mga Iyaha; ipahimutang pag-usab dinhi niini ang Mismong mga Iyaha.

204 Ug matikdi n'yo, dili baya hingpit nga kalibutan, kining Milenyum, kondili tipo ra kini sa ikapitong adlaw. Dayon moabot ang Paghukom diha sa Maputi nga Trono. Kita n'yo, aduna sa gihapon kita'y paghukom. Anaa pa man gud kita nianang panahon, sa Milenyum. Usa kini ka adlaw, nga usa ka libo ka tuig. Lakip pa kini sa elemento sa panahon. Mao nga ayaw, ayaw pagkalibog nga kini mao na ang Bag-ong Yuta, ha, tungod kay dili pa kini ingon niana.

205 Tingali'g isulti n'yo ang ingon-ini kanako. Bueno nabati ko man gud nga tingali'g adunay moingon niini kanako, nga, “Karon, Igsoong Branham, unsa na ma'y imong buhaton karon? Nahutdan ka na man sa imong kumpleto nga tinag-pito. Unsa na ma'y imong buhaton karon? Bueno, nagatoo baya ka sa mga dispensasyon.” Bitaw, tinuod man. Nagatoo ko nga ang Dios, usab. Matikdi, himatikdi n'yo. “Nahutdan ka na og mga tipo sa dispensasyon. Tungod kay, kung aduna ka pa'y idugang nga mosobra na sa ikapitong adlaw, nan unsaon man nimo pagsaysay niana? Asa ka na man mopaingon karon?”

206 Sige, awhagon ko ang inyong pagtagad ngadto sa usa ka butang, kita n'yo. Uh-huh. Kita n'yo? Bueno, wala pa ko nahutdan—wala pa ko nahutdan og mga dispensasyon, sa karon. Aduna ko'y usa pa ka Kasulatan dinhi. Ug, hinumdumi n'yo, nga ang tanan Niini kinahanglan mamatuman gayud, ang matag tipik Niini. Kita n'yo?

207 Karon basin moingon mo, “Igsoong Branham, ginapaninguhaan pa man nimong magdugang og usa ka butang nga lagpas na kaayo nianang ikapitong adlaw, nianang ikapitong-adlaw nga igpapahulay.”

208 Sa dihang gibuhat sa Dios ang kalibutan kaniadto ug namuhat sulod sa unom ka adlaw, ug nagpahulay sa ikapito, usa lang kana ka tipo sa panahon, sa panahon. Apan, bag-ohay ko lang gisulti dinhi, nga mamahimo kitang Eternal.

209 “Kung ingon-ana asa na man ang imong pagtipo karon? Miingon ka nga usa ikaw ka tigtipo. Pero, ikaw, nahutdan ka na man lagi og mga tipo.” Wala, wala pa ako nahutdan. Hibaloon na lang nato kung mao ba gyud.

210 Moadto kita sa Levitico, dinha sa ika-23 nga kapitulo sa Levitico. Karon gusto ko nga inyong matikdan diha sa Levitico, kon diin atong nahisgotan niadtong miaging Dominggo, o niadtong. . . Kini ang nakahatag kanako og ideya, kini mismo. Ang ika-23 nga kapitulo sa Levitico, ug sa ika-26 nga bersekulo.

211 Karon hinumdumi n'yo, nga adunay pito ka adlaw nga fiesta. Ang fiesta sa mga trumpeta, ang fiesta sa—sa mga tabernakulo, ang fiesta sa pagtabyog sa binangan, ang. . . Kining tanan, nga pito ka halangdong mga adlaw nga fiesta, kana'y tipo lamang sa Pito ka Kapanahonan sa Iglesia. Ug nahinumduman pa ba ninyo kung pila ka sabbath ang aduna kaniadto tali sa usa'g

usa? Kita n'yo, dunay pito ka sabbath tali sa pentecostes ug sa mga trumpeta, nga mao ang Pito ka Kapanahonan sa Iglesia. Ug adunay pito ka adlaw nga fiesta, nga nagarepresentar sa Pito ka Kapanahonan sa Iglesia. Siguradoha n'yo nga nagakatakdo an inyong mga numero.

²¹² Moingon mo, “Bueno, karon, Igsoong Branham, wala na man. Tungod aduna ka na ma'y pito.”

²¹³ Sige, hisgotan ta ang kaulahiang fiesta, nga mao ang fiesta sa mga tabernakulo. Karon matikdi n'yo dinhi sa ika-36 nga bersekulo.

Pito ka adlaw magahalad kamo og mga halad nga hinimo pinaagi sa kalayo alang sa GINOO: sa ikawalo ka adlaw—sa ikawalo ka adlaw kamo may usa ka balaan nga pagkatigum (adunay usa pa ka balaang panahon nga moabot). . . balaan nga pagkatigum; ug kamo magahalad og halad nga hinimo pinaagi sa kalayo alang sa GINOO: ug kini mao ang balaan nga panagtigum; ug kamo dili magabuhat sa bisan unsa nga buluhaton nga inalagad.

²¹⁴ Aduna kita karon og “ikawalong adlaw.” Bueno, aduna lang ma'y pito ka adlaw, apan dinhi nagahisgot kita og bahin “sa ikawalong adlaw,” ingon nga balaan nga pagkatigum, pagkatigum. Matikdi, “Kamo dili magabuhat og buluhaton niini.” Ang ikawalong adlaw, (unsa man?) balik ra mismo ngadto sa unang adlaw. Bueno, nagahisgot kini mahitungod sa Eternidad, ingon nga nagatuyok kini sa walay paghunong. Amen. Nasabtan ba ninyo kini?

²¹⁵ Himatikdi n'yo, sa niining ikawalong adlaw usab. Sa kaulahiang adlaw, sa adlaw nga fiesta sa tabernakulo, matikdi n'yo human niana, human sa kaulahiang adlaw nga fiesta, human sa kaulahiang Kapanahonan sa Iglesia, human sa kaulahiang kumpleto nga pito ka adlaw ibabaw sa yuta, human sa Milenyum, moabot kining Balaan nga Pagkatigum.

²¹⁶ Timan-i n'yo, nga fiesta kini sa mga tabernakulo, *mga tabernakulo*, “mga dapit nga tigumanan.” Amen! Kon diin, “Sa Milenyum,” ang ingon sa Biblia, “sila magatukod og mga balay; og sila magapuyo niini.”

²¹⁷ Apan sa Bag-ong Yuta, miuna na Siya ug nag-andam na og dapit. Natukod na kini. Wala na kita'y unsa man nga kahilambigitan sa pagtukod niini. Amen. Eternal! Oh, gusto ko kaayo kana nga Pulong! My! Usa ka Balaan nga Pagkatigum, ang ikawalong adlaw. Ingon nga, aduna lamang og pito ka adlaw. Kung ingon niana ang ikawalong adlaw, nagabalik ra pag-usab ngadto sa unang adlaw, nagabalik ra mismo sa unang adlaw, ang ikawalong adlaw usa ka Balaan nga Pagka-. . . Pagkatigum.

²¹⁸ Matikdi n'yo, ang pito ka adlaw, aduna lama'y kahilambigitan sa daang paglalang, sa kalibutanong oras.

Ang pito ka adlaw, mao kana ang Milenyum, ang adlaw sa kapahulayan. Maingon nga namuhat ang Dios sulod sa unom ka adlaw, og nagpahulay na sa ikapito; nagapamuhat man usab ang Iglesia sulod sa unom ka adlaw, ug magapahulay sa ikapito, apan anaa gihapon kamo sa elemento sa panahon. Wala pa ako nagahisgot sa Eternal.

219 Apan, nakita n'yo, wala gyu'y ingon nianang butang nga sama sa walo ka adlaw; kondili nagabalik ka lang sa unang adlaw pag-usab, kita n'yo, sa unang adlaw.

220 Nagahisgot ang sabbath mahitungod sa daang kasugoan, nga mahanaw. Ang pagsaulog sa usa ka sabbath, nga "nahanaw na," o, sa gikaingon ko na nga, "giusab paingon sa usa pa." Wala kini nahanaw; giusab lang kini gikan sa daang kasugoan, mahitungod sa pagsaulog sa usa ka partikular nga adlaw sa semana.

221 Sa Isaias, sa ika-19 nga kapitulo, miingon, nagatoo ko nga sa 28:19, ang ingon, "Kini mao ang sugo ibabaw sa sugo; dinhi madiyutay, ug didto madiyutay." "Kupti ninyo kung unsa ang maayo." "Kay sa nagabungabunga nga mga ngabil ug laing mga dila Ako mosulti niining katawohan. Ug ania ang kapahulayan." Kita n'yo?

222 Nagasulod kamo ngadto sa Kinabuhi, dili nga sa pagsaulog og usa ka adlaw o landong. Miingon si Pablo, dinha sa Mga Hebreohanon sa ika-4 nga kapitulo. "Ginasaulog ninyo ang mga adlaw ug mga landong, ug mga ingon nianang butang; mao nga nabalaka ako sa inyong kasinatian." Kita n'yo, wala kita nagaagi ngadto sa kung unsa nga mga adlaw ug mga kalagdaan. "Miagi na kamo gikan sa kamatayon ngadto sa Kinabuhing Walay Katapusan," dili sa mga adlaw ug mga panahon. Miagi na kamo paingon sa Eternidad. Mao kana ang balaang pagka- . . . pagkatigum, pagkatigum, diay.

223 Ang *pito ka adlaw*, matikdi n'yo, nga "mahanaw," o, sa gikaingon ko na, nga "mausab paingon sa usa pa." Ang walo ka adlaw nagapahinungod kana sa bag-ong paglalang, kita n'yo, dili sa daang paglalang. Ang walo ka adlaw mao ang bag-ong paglalang.

224 Tungod kay, sa ikawalong adlaw man kaniadto nga nabanhaw ang atong Ginoo gikan sa mga patay. Mao kana ang inyong usa pa ka panagkatigum, ang pagkabalaan; nga walay kahilambigitan sa mga sabbath, man lang, o sa fiesta sa mga tabernakulo, sa fiesta nga *ingon-niini*, ug sa fiesta sa pentecostes. Nabanhaw si Jesus gikan sa mga patay, alang sa pagpamatarung kanato, sa ikawalong adlaw. Human sa pito ka sabbath, o pito ka adlaw, Pito ka Kapanahonan sa Iglesia, nabanhaw si Jesus gikan sa mga patay. Ang ikawalong adlaw, nga usa ka balaan nga panagkatigum, kita n'yo, mao kana ang unang adlaw.

225 Kita n'yo na, miagi, na kamo sa panahon, ug paingon na usab sa Eternidad; dili sa pagsaulog og mga adlaw, ug pagsaulog sa mga sabbath; ug bag-ong mga bulan, ug mga ingon nianang butang. “Kondili miagi *na*,” nabag-o na ang inyong kahimtang; og wala napuo. Himaya! “Kondili miagi na gikan sa kamatayon ngadto Kinabuhing Walay Katapusan.” Oh, pagkaanindot gayud ang ginatudlo kanato sa Biblia! Kita n'yo, miagi na gikan sa usa paingon sa usa pa.

226 Bueno, “miagi na,” miagi na ang daang sabbath. Nabanhaw si Jesus sa ikawalong adlaw. Usa kadto ka maalampon nga adlaw, balaan. Ug dili kadto usa ka adlaw; tungod kay ang adlaw, ang panahon, natapos na man. Mipaingon sa Eternidad. Kita n'yo, mibalik na kadto mismo sa unang adlaw pag-usab. Kita n'yo?

227 Ang Eternidad sama ra kana sa usa—usa ka lingin. Dili ka makakaplag og unsa man nga kanto niana. Dili pud ka makakaplag og hunonganan sa usa ka perpekto nga lingin. Magsige ka lang gyud og padayon. Dili ko igsapayan kung unsa na ka halayo ang imong naabtan, nagapadayon ka lang sa gihapon. Mahimo nimong hinay-hinay nga motuyok nga nakaingon *niini*; molatas sa salog, molatas sa kalibutan, molagpas sa kalibutan, pero padayon ka sa gihapong naga- . . . [Blangko nga bahin sa teyp—Ed.]

228 Ang tanang butang nga gilalang *dinhi*, gipangtuis na, og dili binuhat, ni Satanas, mangahanaw ra kini sa diha nga mobagting na ang dakung bulawanong kampanya ug pag motingog na ang Trumpeta.

229 Ug kaniadto pa sa sinugdanan, kon diin gibuhat ang haliging hikotanan didto sa Eden, sa dihang miabot ang tawo sa yuta ug nahulog siya, may usa ka gamay'ng cordero ang nag-ula sa iyang dugo, og naghisgot kadto mahitungod sa halangdong Cordero nga magaanhi aron mag-ula sa Dugo Niini. Sa Kalbaryo giugbok ang krus, nga konektado sa Daang Tugon; sila nga mga gimatarung, nanagpaabot Niini. Ug sa niining bag-ong dispensasyon, sa Pag-abot na sa Ginoo, sa Bag-ong Yuta, ang pisi sa kaluwasan (ang Dugo, ang Gahum nga nagatubos nga akong ginahisgotan, ug pinaagi sa mao gihapon nga pamaagi parehong gitubos ang tawo ug ang kalibutan) igapataas pag-usab didto mismo sa Eternidad. Ug pagaugdawon sa Linaw nga Kalayo ang tanan-tanan nga mga dautan ug ang mga dili-predestinado alang Niini. Nasabtan n'yo ba?

230 Himatikdi, nga sa ikawalong adlaw, nabanhaw si Jesus alang sa pagpamatarung kanato. Ang Eternal nga hari, nga may Eternal nga Gingharian nga kita pagabautismohan pasulod niini, pasulod ngadto sa Kinabuhing Walay Katapusan. Dili pito ka adlaw; wala kana'y kahilambigitan sa bisan unsa man nga mga adlaw. Nagapahinungod kana sa usa pa ka, Eternal, nga

moabot; nagapahinungod sa usa ka Eternal nga panahon, sa Kalibutan nga akong ginahisgotan.

²³¹ Ug, himatikdi, human sa singkwenta ka adlaw, o pito ka sabbath gikan niadto, aduna na usab og usa pa ka balaang panagkatigum. Unsa ba'y nahitabo? Mikunsad ang Espiritu Santo kaniadtong Adlaw sa Pentecostes, sa ikapitong adlaw... O, sa ikawalong adlaw, diay, ikawalong adlaw, mikunsad sa ikawalong adlaw. Nahitabo kadto human sa pito ka sabbath, eksakto mismo, pagkahuman sa Iyang pagkabanhaw, kita n'yo; busa mamahimo kanang pito ka higayon usab, nga magabalik na usab ngadto sa unang adlaw sa semana, eksakto. Kita n'yo?

²³² Mao kana ang inyong balaan nga panagkatigum, nga walay unsa mang kahilambigitan sa literal nga mga butang. Lagpas pa kini niana. Didto na kini sa Gingharian sa Dios, nga dunay Kinabuhing Walay Katapusan, para sa mga predestinado nga wala gayu'y sinugdanan. Wala kini misugod sa unsa man nga adlaw. Wala kamo naluwas sa unsa man nga adlaw. Tungod luwas na man kamo sa una pa. Amen. Igo lang mianhi si Jesus aron tubuson kana; apan luwas na gyud kamo, sa sinugdan pa lang, tungod kay aduna na man kamo'y Kinabuhing Walay Katapusan, sa sugod pa lang.

²³³ Ang isda nga trout dili man mamahimong usa ka gar o usa ka pitopito. Tingali'g kauban niya kana sa mao ra nga tubig, apan siya, sa sinugdan pa lang, usa na gyud ka trout. Nasikop lang siya sa pukot, kita n'yo, pero ingon na niana siya sa sugod pa lang. Ingon niana sab...

²³⁴ Bueno, wala pa kita nahutdan og mga dispensasyon. Di ba? Ania kita sa Kasulatan mismo. Human sa singkwenta ka adlaw, miabot kadto.

²³⁵ Kita n'yo, dili puedeng walo ang ihap sulod sa usa ka semana. Kita n'yo, dili mamahimo ang ihap, nga walo ka adlaw sulod sa usa ka semana. Dili kana mamahimo, kita n'yo, tungod kay aduna lang gyu'y pito ka adlaw sa usa ka semana. Bisan pa'g ihapon n'yo kana sa unsa mang paagi nga gusto ninyo. Dominggo man ang unang adlaw sa semana. Kita n'yo, mag-ihap ka og pito, dayon mobalik na pud ka ug magsugod pag-usab. Mag-ihap ka og pito, dayon mobalik ka ug magsugod na usab. Kita n'yo?

²³⁶ Ug nagkinabuhi kita sa tanan niini nga mga tipo dinhi, apan, pag nahiabot na kamo sa ikawalo, nan paadto na kamo sa Eternidad. Dili kamo mahiadto pinaagi'g mga kasugohan, ug mga seremonya, ug mga kalagdaan. Kondili mahiadto kamo pinaagi'g predestinasyon. Amen! Mao kana ang usa ka matuod, og balaan nga panagkatigum! Kita n'yo? Ug patapos na kita sa ikapitong kapanahonan sa iglesia, sa kapanahonan sa iglesia, sa Pentecostal nga kapanahonan. Nasabtan n'yo ba kini? Pasulod na kita nianang balaan nga panagkatigum. Pasulod na kita nianang tinuod, matuod, nga Eternidad, kon diin gitawag ang

Iglesia; dili paingon sa kung unsa nga estasyon, sa kung unsa nga denominasyon, kondili paingon gayud sa Eternidad nga kauban na ang Eternal nga Hari. Kita n'yo? Wala na kita'y ingon niana, wala na'y ingon-anang butang nga sama sa mga adlaw, ug mga panahon, ug mga ingon-anang butang. Miagi na kamo paingon sa Eternidad, kon diin kamo naggikan. Atua na kamo Didto, sa sugod pa lang. Kita n'yo?

²³⁷ Kung aduna kamo'y Kinabuhing Walay Katapusan, aduna lang ma'y usa ka porma niana, ang Dios kana, ug usa kamo ka kinaiyahan nga gipahayag. Kita n'yo? Kung kamo... Kay kung dili man, dili gyud kamo makaadto didto, sa unsa mang paagi. “Walay tawong makahimo sa pag-ari Kanako gawas kon pagadanihon siya sa Akong Amahan.” Kita n'yo? Ingon nga, “mangahanaw,” kining tanan nga mga daang butang; apan dili gyud mahanaw kini nga mga Butang, tungod kay nagapahinungod kini sa Eternidad. Eternal ang Espiritu Santo. Kung ingon niana, anaa kamo sa Eternidad, kon diin kamo atua na daan sa tanang panahon, apan karon lang ninyong nasayran kung unsa ang nahitabo.

²³⁸ Kita n'yo na, gihimo kamo alang sa usa ka Eternal nga katuyoan, tungod kay kamo man mao ang—ang kapadayagan sa usa ka kinaiyahan nga anaa sa Dios, nga naghunahuna na kaninyo ug gipahayag kamo; ug naghimo Siya ug yuta kon diin kamo pagakuhaon, ug aron himoon kamong tawo. Ug miabot man ang sala ug gituis ang Iyang pamaagi. Pero miabot gihapon kamo, bisan pa man, apan nahisalaag kamo sa kalibutan. Mao nga mianhi Siya ug gitubos kamo, ang maong kinaiyahan nga gipahayag, ug ginatubos Niya usab kining yutaa pinaagi sa mao gihapon nga pamaagi. Kung ingon niana, nagapadayon ra ang Iyang katuyoan. Kita n'yo? Oh! Alleluyah! Oh, nagahatag kana kanako og maayo gayud nga pagbati, kung palandungan n'yo lang kung unsa ang anaa sa unahan!

²³⁹ Bueno, diha sa Mga Taga-Efeso 1:10, gitawag kining... Karon, kung ginasulat ninyo kini, ang Mga Taga-Efeso 1:10, dili kini gitawag, nga usa ka dispensasyon, dili pud ikapitong adlaw. Kondili gitawag kining, “Ang kahupnganan sa panahon.” Ug sa diha nga “ang kahupnganan sa panahon” moabot na, nan mao kana ang higayon nga matapos na ang panahon. Sa diha nga wala na'y panahon, nan nagapaingon na kamo sa Eternidad, human nga matapos na ang ikapitong kapanahonan sa iglesia, ug patapos na kini; natapos na man ang kapanahonan ni Luther, natapos na ang kapanahonan sa Methodist, natapos na ang kapanahonang Pentecostal. Ug karon paingon na kamo sa (unsa man?) Eternidad; wala na ang tinag-pito, wala na ang tinag-tulo, wala na'y uban pa. Anaa na man sila sa Eternidad, kon diin wala na ang ingon-anang panahon nga may mga numero, ug mga oras, ug mga ingon-anang butang. Amen! Oh, my! Inyo na bang nasabtan karon?

²⁴⁰ O, human nga matapos na ang panahon, mawala na sab ang tanang sala, og mawagtang na, sa Milenyum, didto na sa dakung Paghukom diha sa Maputi nga Trono. (Usa ka tipo, sa Espiritu Santo.) Human nga masunog ang kalibutan ug mabautismohan kini, sa bautismo sa balaang Kalayo gikan sa Langit; mawala na sab ang tanang sala, mawala na ang tanang kagaw, mawala na ang tanang mga yawa, mawala na ang tanang tentasyon, mawala na ang tanang dautan. (Tipo sa karon.) Dayon unsa na ma'y buhaton sa Dios? Mahimo na Siyang mopuyo sa yuta, kita n'yo, tungod kay nawala na man ang tanang sala.

²⁴¹ Ingon niana usab ang Iyang buhaton sa dihang ihatag na Niya kaninyo ang bautismo sa Espiritu Santo pinaagi'g Kalayo. Mahimo na Siyang mosulod ug mopuyo kaninyo, ug makalingkod na kita sa mga Langitnong dapit diha kang Cristo Jesus, tungod kay kita anaa na man Kaniya. Dili nga kita'y "magalingkod pa." Nagalingkod na kita karon mismo diha kang Cristo Jesus. Unsaon man nato pagsulod niini? Pinaagi sa usa ka bautismo sa Espiritu Santo. "Pinaagi sa usa ka Espiritu kitanan gibautismohan pasulod ngadto kang Cristo," diin, kita karon nakasulod na. Dili nga "magasulod" pa diha kang Cristo; kondili nakasulod na kita! Siya mao ang halangdong espirituhanon nga Hari sa Espiritu nga ania sa sulod nato, tungod kay anaa na man kita diha Kaniya sa sinugdan pa lang.

²⁴² Kita n'yo, ang Dios, sa sinugdan, sa diha nga Iya kang gihunahuna ug gihunahuna ang uban usab, gihunahuna na Niya ang Iyang Kaugalingon nga mamahimong butang nga mahikap. Mao kana ang Iyang mga hunahuna. Kita n'yo? Busa, gipahayag Niya ang Iyang mga hunahuna pinaagi og Pulong. Miingon Siya, "Magkaaduna." "Magkaaduna," ug nagkaaduna gayud. "Magkaaduna," ug nagkaaduna gayud.

²⁴³ Dayon, wala magdugay, padayon Siya nga nagaingon "magkaaduna," hangtud nga miingon ang mga tawo, usa niadto ka adlaw, "Ayaw na pasultiha ang Dios!"

²⁴⁴ Miingon Siya, "Karon makigsulti Ako ngadto kanila pinaagi na usa sa ka propeta." Kita n'yo? "Sukad karon, makigsulti Ako ngadto kanila pinaagi na sa usa ka propeta."

²⁴⁵ Ug miingon ang propeta, "Adunay magaabot; adunay mahitabo," ug nahitabo kadto, ug nahitabo kadto. Ug nahitabo gayud, ug nahitabo gayud, kita n'yo, ingon niana lang. Nasabtan na ba ninyo karon?

²⁴⁶ "Ang kahupnganan sa panahon" moabot kana human nga matapos ang panahon. Mawala na ang sala, pagkahuman sa bautismo sa kalibutan, pagkahuman sa bautismo sa kalibutan mamahimo na kining usa ka dapit nga hingpit nang puy-an; wala na'y sakit, wala na'y mga kagaw; wala na'y mga tunok, wala na'y mga kadyapa; wala na'y kamatayon, wala na'y kasub-anan, wala na'y mga kagul-anan; wala na'y pagkatigulang, wala na'y unsa

man nga nagarepresentar sa kamatayon; wala na'y sayup; ang tanan husto; og wala na'y natural. Ingon-ana ang Eternal!

²⁴⁷ Bueno, gipahayag ang Iyang kinaiyahan tungod kay anaa na kini, kaniadto, sa sugod pa lang. Mao kana ang Iyang gihunahuna. [Si Igsoong Branham nagahulagway sa pisara—Ed.]

²⁴⁸ Ug dayon unsa na ma'y nahitabo? Iyang gipahimutang si Adan ug si Eva dinhi ibabaw sa yuta, ug miingon, "Magpadaghan kamo karon ug para mapuno ang yuta." Ang ilang mga lawas napahimutang na tanan dinhi, aron makakaon kamo ug maporma ang inyong lawas. Ingon niana ang Iyang paagi sa pagbuhat niini.

²⁴⁹ Pero miabot man ang sala ug gibabagan ang Iyang plano. Nagpadayon gihapon kini, sama ra usab, nga nagapadayon ang panahon.

²⁵⁰ Apan unsa ma'y gibuhath ni Jesus? Mikanaug ang Dios ug gipahayag ang Iyang Kaugalingon diha sa porma sa usa ka Lalaki, nga usa ka tawo; gihatag ang Iyang kinabuhi, imbis nga magpabilin dinhi. Ingon nga, Siya mao ang Hari, apan gitugyan Niya ang Iyang Kaugalingon aron tubuson ang tanang uban pa. Nasabtan n'yo ba?

²⁵¹ Ug sa diha nga matapos na kining tanan, dayon ipahibalik na kini, ug ang katuyoan sa Dios matuman na. Atua na usab ang Eternal nga Hari kauban ang Iyang Eternal nga mga ginsakupan, nga nadayag sa tawhanong lawas, nga eksakto gayud sa kung unsa ang Iyang plano niini kaniadto; mawagtang na ang sala; mawala na ang yawa; og bug-os gyud nga matapos ang tanan.

²⁵² Unsa ma'y magpahinabo niini? Kining yutaa sa karon dili pa man angayan nga mamahimong dapit nga pahimutangan sa Langit. Tungod tan-awa n'yo kining, sala. Gikinahanglan ùna nga malimpyo kini.

²⁵³ Wala man usab og lalaki, walay tawo, walay babaye, batang lalaki, o batang babaye man, dili ko igsapayan kon si kinsa pa siya, ang angayan nga motindog sa pulpito, o bisan sa pag-angkon nga usa ka Cristohanon, kon dili ùna napuno sa Espiritu Santo. Wala sab kamo'y katungod nga mosalmot sa panihapon sa Ginoo, o unsa man nga komunyon, paghugas-sa-mga-tilil, o sa bisan unsa, gawas kon nalimpyohan na kamo sa Balaang Kalayo sa Dios.

²⁵⁴ Wala gyu'y tawong may katungod nga magwali gawas kon kamo, sama ni Moises, nahinagbo ùna ang Dios didto niadtong sagrado nga yuta, diin atua ang Haliging Kalayo, og kon diin hingsayran niya kung asa gyud siya. Kita n'yo?

²⁵⁵ Matikdi n'yo kung sa unsang paagi, kung sa unsang paagi kita makaadto. Human nga mabautismohan na sa Kalayo ang kalibutan, ang tanang mga kagaw mawala na, og himoon kining

usa ka dapit kon diin ang Langit angayan nang ipahimutang dinhi sa yuta.

²⁵⁶ Tipo, sab sa karon, nga nagalingkod kita sa Langitnong mga dapit diha kang Cristo Jesus; nga miagi na gikan niining, pagkamahugaw nga sama sa luoy'ng babaye kaniadto, paingon sa pagkahimong nadayag nga kinaiyahan sa Dios. "Kita karon mga Anak sa Dios," dili nga kita *mamahimo pa lang nga anak*. Kondili kita mao ang mga kinaiyahan sa panghunahuna sa Dios. Kita n'yo?

²⁵⁷ Karon moingon mo, "Bueno, tan-awa kining sacerdote. Dili diay siya anak sa Dios?" Napamatud-an na kaniadto nga siya dili anak. Tungod wala man niya maila ang unsa? Miingon ba siya nga, "Nagatoo ako sa Biblia"? Oo. Apan wala gyud niya maila ang nadayag nga Pulong alang niadto nga panahon. Aduna lang siya og intelektuwal nga kahibalo gikan sa usa ka grupo nga nag-una kaniya kaniadto.

²⁵⁸ Ug mao ra gihapon sa karon! Kita n'yo? Nasayod ko nga masakit kana, apan mao kana ang Kamatuoran.

²⁵⁹ Mao kadto ang Pulong, nga eksaktong gilitok alang niadtong panahona; ug, siya, bisan pa usa siya ka eskolar, bisan pa usa siya ka inila nga tawo, apan dili gyud niya Kadto maila. Ngano man? Tungod bisan unsa pa siya ka makinaadmanon, o unsa man, pero sa gihapon wala man siya'y representasyon sa pagkapinili-nang-daan. Kita n'yo?

²⁶⁰ Ang mga gipili-nang-daan mao lamang ang makaila niana; sila lamang gayud. Ug maila lang ninyo kana. . . Tungod kay, tan-awa, nagapamatuod kana sa pagpili-nang-daan. Tungod kay, kung aduna ka'y Kinabuhing Walay Katapusan, nan siguradong kabahin gyud ka sa Dios sa tanang panahon, tungod Siya lamang ang Bugtong Eternal. Nasabtan n'yo ba? Oh, my! Palandunga n'yo kana.

²⁶¹ Karon matikdi n'yo kung unsa ang mahitabo sa panahon sa mahimayaong Milenyum. Wala na ang tanang sala, og magsugod na ang Milenyum nianang tungora, panahon na kana nga ipuwesto na sa Balaang Espiritu ang kaugalingon Niini.

²⁶² Sama lang sa Iyang ginabuhat kanato, "nagaagi tà gikan sa kamatayon ngadto sa Kinabuhi," nagapuyo tà sa Langitnong mga dapit diha kang Cristo, diha sa Iyang mahimayaong Presensiya. Bisan ang pisikal nga kamatayon mawala na usab nianang panahona; maingon nga nawala na karon ang espirituhanong kamatayon.

²⁶³ Wala na ma'y ingon-anang butang sama sa espirituhanong kamatayon sa karon, para sa—usa ka—para sa usa ka nabautismohan na nga balaan sa Dios. "Bisan siya mamatay, mabuhi siya. Ang tanan nga buhi ug nagatoo Kanako dili na gayud mamatay." Ang tibuok Kasulatan, mamatuman gayud Kini. Kita n'yo? Dili na kamo mahimong mamatay.

Tungod aduna man kamo'y Kinabuhing Walay Katapusan. Kana ang bugtong butang, nga gihimo sa Manunubos aron maila ninyo kana. Ug ingon na Niana kamo sa una pa, ug mao kana'y hinungdan nga nakita ninyo ang adlaw nga inyong gikinabuhian. Pila ba ang nakakita niini? Ipataas n'yo ang inyong kamot. Kita n'yo? Salamat. Kita n'yo? Ang maong adlaw nga atong gikinabuhian, inyo gyud kining naila.

²⁶⁴ Bueno, ang ingon sa Methodist, "Sa diha nga nakasinggit ka, naangkon mo na Kini." Pero daghan man kanila ang nanagsinggit ug wala nakadawat Niini.

²⁶⁵ Ang ingon pud sa Pentecostal, "Sa diha nga nakasulti ka og laing mga pinulongan, naangkon mo na Kini." Daghan man sab ang nanagpanulti og laing mga pinulongan, pero wala man nakadawat Niini.

²⁶⁶ Tan-awa kung unsa ka daghan, ang matang sa pagka-pormal sa mga Fariseo kaniadto, apan sa dihang nahipadayag na ang Pulong, wala nila Kadto hiilhi. Kita n'yo? Kita n'yo na?

²⁶⁷ Ug kung kamo mao ang Pangasaw-onon, ang Pangasaw-onon kabahin man sa Bana. Ug kung. . . Ang bugtong paagi nga maila ninyo Kini, mao ang maila sab ninyo kung unsa kamo nga bahin diha sa Bana (sa maong Pulong) kamo mismo, kay kon dili nan dili n'yo gayud maila nga kamo mao ang Pangasaw-onon. Pila man ang nakasabot niana? Kita n'yo? Kita n'yo? Kinahanglan ninyong maila ang inyong puwesto.

²⁶⁸ Dili pud ninyo mahimong maila ang puwesto sa uban. Unsa kaha kung—unsa kaha kung miabot si Moises kaniadto nga dala ang mensahe ni Noe? Ug bisan kabahin niadto si Noe, dili na gihapon kadto magpulos. Unsa kaha kung—kung—kung—kung mianhi si Jesus kaniadto nga dala ang Mensahe ni Moises? Dili na sab kadto magpulos. Kita n'yo, tungod lahi na man gud kadto nga kapanahonan, lahi na kadto nga propesiya, og lahi na nga bahin sa Pulong ang gikinahanglan nga mamatuman kaniadto. Anaa man sila sa lahi na nga adlaw sa semana. Mao nga, ang buluhaton sa Martes dili puedeng buhaton sa Miyerkules. Ug ang sa Miyerkules kinahanglan buhaton ra sab sa Miyerkules. Kita n'yo? Ang sa Sabado kinahanglan buluhaton ra pud sa Sabado. Kita n'yo na?

Ug, sila, nakaila kono sila kaniadto, "Oh, si Moises, aduna man kami og Moises."

²⁶⁹ Miingon si Jesus, "Kung nakaila kamo kang Moises, nakaila unta kamo Kanako, kay siya man mao ang naghigot mahitungod Kanako. 'Ang Ginoo nga inyong Dios magpatindog og usa ka propeta nga sama kanako.'" Nasabtan n'yo ba ang maong ideya? Oh, pagkanindot gyud! Kita n'yo?

²⁷⁰ Dayon miingon si Jesus, diha sa Juan 14, "Sa diha nga Siya, ang Espiritu Santo, moabot na, igapahinumdom Niya kaninyo kining mga butanga, kita n'yo, igapahayag kaninyo ang adlaw

nga inyong gikinabuhian. Ug dayon, ang usa pa ka butang nga maila ninyo Siya, igapahayag Niya ang mga butang nga umalabot,” kita n’yo, kita n’yo, magabalik mismo sa pagka-propeta, “sa dihang moabot na Siya.” Kita n’yo?

²⁷¹ Sa Bag-ong Yuta ug Bag-ong mga Langit, dili na gayud mongitngit pa, pagmoabot na kining Bag-ong Yuta. Ang yawa pagagapuson... hinoon si Satanas, binuhian pa siya sa karon; siya man ang magsusumbong. Apan sa Bag-ong Yuta, pagagapuson na siya ug igatambog ngadto sa Linaw nga Kalayo, sa niining balaan nga Kalayo.

²⁷² Dayon, sa niining Bag-ong Yuta, ato kining susihon karon sa pipila ka gutlo. Sa niining Bag-ong Yuta, ang kalangitan dili na gayud mongitngit pa; dili na, tungod ra man gud kana sa tunglo kaniadto, kita n’yo. Dili na gayud mongitngit pa tungod sa mora’g nagakasuko nga mga panganod. Dili na sab kini pagapaliron sa hangin nga sama niana. Dili na. Dili na pagabalion sa hangin ang mga kahoy, ug pagagub-on ang mga kabalayan, ug pabalintongan ang mga butang. Ang kilat ug ang kasuko dili na gayud magangulob gikan dinha kang Satanas, ug mopatay og tawo nga nagalakaw sa dalan, o kaha mosunog og usa ka bilding. Kita n’yo? Dili, dili na gayud. Dili na magkaaduna pa og mga bagyo nga nagapanghapay, o mga unos ug mga alimpulos, nga nagapanggun-ob og mga kabalayan, ug nagapamatay og gagmay’ng mga bata, ug mga ingon-anang butang. Huh-uh, dili na gyud magkaaduna pa. Ang nagasulay sa pagpangguba, wala na kana didto. Gitambog na man si Satanas.

²⁷³ Unta aduna pa kita’y oras karon. May ginalaktawan na ako nga mga Kasulatan, karon, aron nga dili kaayo tà madugay. Kinahanglan pa man gud nakong mag-ampo para sa mga may sakit.

²⁷⁴ Ang mga langit ug yuta nagtagbo na; ang Dios ug ang tawo nahipasig-uli na. Nagsugod na ang usa ka napahibalik nga Eden; kita n’yo, wala na ang tanang tunglo.

²⁷⁵ Sama lang, usab nga nawala ang tanang tunglo sa sala sa dihang gidawat kamo sa Espiritu Santo. Kita n’yo, dili kamo ang midawat Niini; kondili gidawat kamo Niini, kita n’yo, tungod kay kinaiyahan Kini sa Dios. Kita n’yo, kung Kining Espiritu Santo, nga nagakahulogan og, Espiritu sa Dios; ug kini mao ang kinaiyahan, ang hunahuna sa Dios, nga midawat kaninyo tungod kay gitagana na man kamong daan alang niana nga katuyoan. Kita n’yo? Bisan pa, nga natawo kamo sa sala; apan tungod nga ang Dios aduna na niana nga kinaiyahan, ug ania gipahayag n’yo ang inyong kaugalingon dinhi ibabaw sa yuta, ug mao nga mikanaug Siya ug giangkon kamo. Kita n’yo, napahibalik na kamo *dinhi*; *dinhi* man gyud kamo nahisakop. Kita n’yo? Kita n’yo, nawad-an na og gahum ang sala. Husto kana. Ang pangibog sa kasal-anan nawagtang na gikan sa inyong kasingkasing,

sa dihang misulod ang Balaang Espiritu. Usa na kamo ka nahipasig-uli nga tawo.

²⁷⁶ Ug dayon sa diha nga mahipasig-uli na ang yuta, pinaagi sa mao rang butang, nan wala na'y mga pagtunglo, wala na'y mga unos, wala na'y mga hangin, wala na'y mga bagyo—mga bagyo, diay. Nahipasig-uli na kamo; ang tawo ug ang Dios nagtagbo na. Ang Bag-ong Yuta magasul-ob na pag-usab og pang-Eden niya nga katahum. Ang Bag-ong Yuta igapahimutang na, siya, human sa iyang bautismo sa Kalayo.

²⁷⁷ Hunahunaa lang ninyo, magakalayo ang yuta ug masunog. Ang mga butang nga anaa niini mangatunaw sa—sa hilabihang kainit. Ang mga buhat sa yuta mangasunog. Ang tanang tubig mobugwak; modilaab kini ug mangbuto ang tanan-tanan. Mangbuto ang tanang butang. Mangbuto ang mga bulkan ug, manglupad ang nagabaga og mainit nga linanay'ng mga bato, liboan ka milya diha sa kawanangan. Ang tanang kagaw. . . Pagalimpyohan mismo sa Balaang Espiritu sa Dios ang matag tipik sa tanang kasal-anan ug tanan-tanan na. Ang tanang yawa pagagapuson ug igatambog na ngadto sa Linaw nga Kalayo, sa nagaugdaw nga Kalayo, ang Kalayo nga kapungot sa Dios.

²⁷⁸ Wala na didto'y mapintas nga mananap nga mopatay kaninyo. Pag molakaw ka sa dalan, sa mga tanaman sa bulak, wala na didto'y unsa man nga bitin nga mositsit kanimo ug mopaak kanimo, nga dala ang makamatay nga lala niini. Oh, my! Dili ba pagkaanindot gayud? Paminaw mo. Sa nianang Bag-ong Yuta wala na'y gagmay'ng dalag nga puntod ang ihapnig, sama sa lubnganan; wala na'y ingon niana didto.

²⁷⁹ Ang tawo ug ang Dios nag-uban na; ang Pangasaw-onon ug ang Pamanhonon. Ang mga langit ug yuta naghinangopay na; mikanaug na ang Dios aron mopuyo ipon sa mga tawo. Ang Iyang tabernakulo anaa na uban kanila.

²⁸⁰ Dili na magkaaduna pa og sala, wala na'y kasub-anan. Wala na'y luha nga modagayday sa aping sa usa ka inahan, tungod sa iyang anak. Amen. Wala na gyud, didto nianang Bag-ong Yuta. Wala na. Gitubos na man kini. Naangkon na Niya kini, ug alang usab sa mga Iyaha nga gitubos na gikan niini. Kita n'yo?

²⁸¹ Ug, ania, kabahin kamo nianang yutaa. Husto ba? Ug sa dihang gitubos Niya kamo, gitubos sab Niya ang yuta pinaagi sa mao gihapon nga pamaagi, ug magkauban na kamo pag-usab. Oh, pagkatataw gayud niini. Kita n'yo? Kinahanglan kamong tubuson tungod kay kabahin man kamo niana. Ug kung wala mitulo ang Dugo nganha kaninyo, nan wala pa kamo natubos; wala pud kamo gitawag. Dayon pagalimpyohan Niya kini; ingon niana mismo ang Iyang buhaton pinaagi sa Kalayo. Bisan pa, nga gipatulo na ang Dugo, kinahanglan gihapon kining malimpyohan pinaagi'g Kalayo, husto kana, aron mahimong usa ka puloy-anan sa Dios.

282 Hinoon gitukod na man sa Dios ang Iyang puloy-anan, sa potensyal. Ngani ang Ginghamian sa Dios anaa man mismo sa yuta sa karon, sulod sa mga kasingkasing sa Iyang mga balaan. Ingon nga sila mao ang Iyang mga kinaiyahan nga Iyang gisugdan kaniadto sa sinugdan pa lang. Bueno ang Iyang mga kinaiyahan gitubos na man. Pero unsa pa ma'y Iyang ginahulat? Ang tubuson ang yuta, aron mapahimutang ang Iyang mga kinaiyahan ngadto niini, aron bug-os nga tumanon ang Iyang gitagana-nang-daan nga plano. Nasabtan n'yo ba?

283 Matikdi n'yo, wala na'y mga lubnganan, wala na'y mga luha, wala na'y pagpinatyanay, wala na gayud. Dili na kini mahumod tungod sa luha o sa dugo. Dili na. Dili na sab magkaaduna pa og mga gubat. Dili na. Wala na'y tingtugnaw nga mga panganod. Wala na'y mabugnaw nga niyebe diha ibabaw sa dughan niini; wala na gyu'y mahulog ngadto niini. Dili na sab pagapaigon sa mainit nga adlaw, ang mga sagbot. Alleluyah! Bisan ang disyerto usab makapamulak na og mga rosa. "Kanang karaang, tunokon nga disyerto magapamulak, sama sa usa ka rosa, usa niana ka adlaw," mao kana ang gisulti sa Dios; sa dihang matubos na kini, og sa dihang madawat na niini ang iyang bautismo sa Kalayo. Aduna pa og tanang matang sa mga cactus ug tunokon nga mga tanum ug tanan na nga anaa dinha sa karon, apan aduna ma'y moabot nga bautismo sa Kalayo para niini.

284 Sama ra sa tawo, kaniadtong aduna pa siya'y pagdumot, pagkamadinauton ug pagpakiglantugi diha sa kinasuloran niya; pero sa dihang miabot na ang bautismo sa Kalayo, gilimpyohan gyud siya niini. Wala na'y pagpangabugho, wala na'y unsa man; kini'y hingpit gayud nga usa ka puloy-anan sa Dios. Ug, hinumdumi n'yo, nga ang Iyang mga ginsakupan mao ang motagbo Kaniya didtong dapita. Amen! Oh, daw sa unsa ka...

285 Dili kana usa lamang ka sugilanon; kondili Kamatuoran gyud kana. Mao kana ang gisulti sa Dios. Mao kana ang Iyang gisaad. Mao kana ang pagaadtoan sa Pangasaw-onon. "Bisan ang disyerto," ingon Niya, "magapamulak, og mamahimong usa ka rosa."

286 Si Satanas, ang sala, ug mga makasasala, mawala na, hangtud sa kahangturán. Bug-os kining tanan nga mawala; og mopaingon kini ngadto sa Eternidad. Ug ang tanan nga gipangtuis, ang bantugang arkanghel nga atua didto usa niadto ka adlaw, si Satanas, nga mao'y namuhát niining tanang kadautan, pagapuohon na. Hinumdumi ninyo, ang Biblia miingon, "Kung dili pagabuhaton nianang kalag ang sumala sa Iyang, giingon nga buhaton, nan pagalaglagon gyud Niya kana nga kalag."

287 Apan, nakita n'yo, dili man Niya mahimong laglagon ang Iyang Kaugalingon ug magpabilin nga Dios ra sa gihapon. Busa, kung kanang maong kalag iya sa kalibutan, nan kinahanglan

kanang pagalaglagon. Apan kung Eternal kana, kauban sa Dios, nan wala kana'y sinugdanan, tungod kay kabahin man kana sa Dios ug dili gayud mahimong malaglag. Amen! Pagkaanindot gayud! Daw sa unsa—daw unsa ka mapasalamaton, ang Iglesia nga makita kana!

²⁸⁸ Mga higala, ang tanan ninyong mga nabuhat ania ra dinhi mismo. Mao kini ang ginapaningkamotan kong isulti. Pero gilaktawan ko lang ang uban niini tungod kay gusto ko man nga balikan kini pag-usab.

²⁸⁹ Gani kining mga butanga, si Satanas, ang mga makasasala, mawala na man, sa Eternidad; og dili na gyud motungha pa. Ang tanan... Kita n'yo, si Satanas dili gayud makalalang. Kung makalalang man siya, nan Dios diay siya. Kita n'yo? Ang mahimo lang niya mao ang tuison kung unsay gilalang na. Kita n'yo? Ug mao nga ang tanang gipangtuis, ang mga pagpangtuis, pagawalaon. Ug ang kamatayon mao man ang pagtuis sa kinabuhi; ug kon mawala na ang pagpangtuis, nan dili na magkaaduna pa og kamatayon. Ang pagkatigulang sab mao'y ilhanan sa kamatayon; ug kon wala na'y pagkatigulang, nan mosulod na ang kinabuhi. Mawala na pud ang tanang mga ilhanan sa pagpangtuis ug tanan nang uban pa. Ang mga tunok ug mga kadyapa nga mao'y ilhanan sa sala, "pagatunglohon ang yuta kauban nila," ug mangawala na sila. Ang balatian nga nagaabot, tungod niana; mawala na usab. Ang kamatayon pagawalaon pud. Ang pagpinatyanay matapos na usab.

²⁹⁰ Wala gayu'y makadangat nianang yutaa gawas sa pagkabalaan, og mga Tinubos. Oh, my! Oo. Oh, maayo gayud ang gibati ko. ng Dios, ug ang Iyang mga linalang; ug ang Iyang mga binuhat sa niini nga paglalang gitubos pinaagi sa Kaugalingon Niyang Dugo. Gilimpyohan usab pinaagi sa Kaugalingon Niyang proseso sa paglimpyo; ang Iyang proseso nga nagapatay sa mga kagaw, og nagapatay sa sala!

²⁹¹ Sama ra usab kung aduna ta'y limpyohan, ang pinakamaayong panglimpyo nga aduna kita mao ang kalayo. Mahimo n'yong kuhaon ang unsa mang butang ug limpyohan kana pinaagi'g mga bula sa sabon ug tanan na niining mga kemikal nga ilang ginaingon, pero aduna sa gihapon kana'y kagaw. Apan pabukali gani kana pinaagi'g kalayo sa makausa!

²⁹² Ug sa dihang limpyohan na sa balaang Kalayo sa Dios ang yuta pinaagi'g mga Kemikal; gilalin na Niya ang Iyang Pangasaw-onon, nga mao'y makasulod sa Langit uban Kaniya, samtang nagakahitabo kining pagpanglimpyo. Ug mobalik ra pag-usab ibabaw sa yuta, nga usa na ka Bag-ong mga Langit ug usa ka Bag-ong Yuta. Ang mabugnaw nga panahon sa tingtugnaw dili na makadaut niini. Ang mainit nga mga panahon sa ting-init dili na makadaut niini. Ang mga disyerto

magapamulak na sama sa usa ka rosa. Nawala na ang sala ug mga makasasala.

²⁹³ Ang Dios, ug ang Iyang mga linalang ug binuhat, magkauban na nga magapuyo sa hingpit nga panaghiusa. Maingon nga ang mga langit ug ang yuta bana ug asawa, mao man usab si Cristo ug ang Iglesia, ug magtagbo silang tanan diha sa usa ka labing mahimayaon nga plano sa katubsan ug pagadalhon na pag-usab ngadto mismo sa sabakan sa Dios. Nasabtan n'yo ba?

²⁹⁴ Ug, sa Bag-ong Yuta, adunay usa ka Bag-ong Siyudad. Oh, pagkanindot gyud! Karon paminaw mo og ayo. Ayaw n'yo kini kalimti. Nga, si Jesus miingon, diha sa Juan 14, Siya moadto aron sa pag-andam. "Dili magkaguol ang inyong mga kasingkasing." Kaniadtong paadto na Siya, "Adunay katuyoan ang Akong pag-adto. Mitoo kamo sa Dios," ingon Siya, "tumoo usab kamo Kanako." Pero wala nila nakita kaniadto nga Siya mao ang Dios. Miingon, "Mitoo kamo sa Dios, karon tumoo usab kamo Kanako. Ug Ako moadto aron sa pag-andam og Dapit alang kaninyo. Sa Balay sa Akong Amahan adunay daghang puloy-anan; sa Gingharian sa Akong Amahan adunay daghang palasyo." Atua didto si Cristo karon, nga nagatukod niining Bag-ong Jerusalem. Karon paminaw mo og ayo. Ayaw na mo paglakaw-lakaw. Ayaw, ayaw n'yo kini sipyata. Anaa si Cristo sa Langit, karon, nga ginaandam ang Bag-ong Jerusalem.

²⁹⁵ Maingon nga gilalang sa Dios ang kalibutan kaniadto sulod sa unom ka adlaw, gibuhat ang kalibutan sulod sa unom ka adlaw, o unom ka libo ka tuig. Sumala sa giingon ni Pedro, "Ayaw ninyo paghikalimti," nabasa man nato sa Kasulatan, "ang usa ka libo ka tuig usa ka adlaw."

²⁹⁶ Ug si Cristo miadto na ug nagaandam og usa ka Dapit, nga dugay nang ginatukod sulod sa daghan, daghang linibo ka tuig, para sa pag-andam og usa ka Dapit. "Ug kung Ako moadto ug mag-andam og Dapit, mobalik Ako pag-usab, ug dawaton kamo; nga kung asa Ako, atua usab kamo." Matikdi n'yo ang Manunubos ug ang mga Tinubos!

²⁹⁷ Unta aduna pa kita'y oras karon. Ako na man gud namarkahan dinhi, ang gisulti ni Solomon bahin, "niining babaye, nga Pangasaw-onon." Oh, ato na lang kining laktawan; tungod udto na man gud kaayo, kita n'yo. Balikan ko ra kini, pag-usab. "Sa dihang gipanguha niya nga minyoan ang babaye, apan nagsaad na man kini nga makigminyo sa usa ka lalaki nga magbalantay sa mga karnero." Tingali'g naghunahuna ang uban nga usa kadto ka awit nga iyang gikanta. Oh, dili. Si Solomon man mao ang manununod sa trono ni David, sa yuta, apan gipakita pud nga ang maong gingharian kinahanglang mahanaw. Usa kadto ka tipo ni Cristo nga nahigugma sa Pangasaw-onon. Kita n'yo?

298 Matikdi n'yo nga si Jesus miingon, sa Juan 14 ha, “moadto ug mag-andam og Dapit.”

299 Oh, unsa kaha'y hitsura niana? Inyo na bang nahunahuna karon, Pangasaw-onon, kung unsa kaha ang hitsura niana? Ingon nga giandam ug gidisenyo kana sa Balaanong Arkitekto. Unsa kaha'y hitsura niana nga Siyudad? Karon, hisgotan nato ang mahitungod niana sa makadiyut. Ang Balaanong Arkitekto ang nag-andam niana, og nagdisenyo niana. Ug, ania, giandam Niya kana pinaagi sa maampingong mga kamot, alang sa Iyang hinigugmang Pangasaw-onon. Unsa gyud kaha ang mahimong hitsura niana?

300 Mahunahuna n'yo ba ang usa ka lalaki nga may kasarang, nga minyoan ang iyang mapangasawa, kung giunsa niya pagtukod ug paghan-ay ang tanang butang nga eksakto gayud nga sumala sa gusto sa babaye, og sa kung unsa gyu'y gusto sa babaye? Amen.

301 Bueno, gidisenyo sab sa Balaanong Arkitekto ang Bag-ong Siyuyad, kon diin Siya magapuyo kauban ang Iyang Pangasaw-onon, nga sumala gayud sa gusto Niini. Dili ikatingala nga miingon ang apostoles, “Wala makita sa mata, wala hidunggi sa dalunggan, ni misantop sa kasingkasing sa tawo.” Atong tanawon kung mahimo ba nato kining masusi og ayo sa makadiyut lamang, og hibaloon ta kung unsa ang mahimong hitsura niana.

302 Gidisenyo kini sa Balaanong Arkitekto alang sa Iyang Hinigugma. Kita n'yo? Oh, siguradong pagkaanindot gyud niana nga dapit, ingon nga, ang Balaanong Kinaiyahan, usa ka Balaanong Arkitekto ang nagdisenyo niana alang sa usa ka Balaanong kinaiyahan nga Balaanong gitagana-nang-daan kaniadto pa sa usa ka Balaanong Dios Nga—Nga mao'y Tag-iyu sa Balaanong Kinabuhi! Unsa gyud kaha ang hitsura niana nga Siyudad! Palandunga n'yo kana.

303 Hinumdumi n'yo, dili pa kana mao ang Langit. Tungod ingon si Juan, “Nakita ko kini nga nanaug gikan sa Langit.” Maanaa kana sa yuta mismo. Kita n'yo?

304 Mao nga kining yutaa dili gyud ingon nga mapuo; gitubos na man kini nga yuta. Wala sab miingon ang Dios nga magpatungha Siya og usa ka bag-ong henerasyon; kondili pagatubuson ra Niya ang mga ania dinhi. Dili Siya magpatindog og usa ka bag-ong henerasyon; kondili pagatubuson ra Niya ang mga ania na dinhi. Dili pud Siya magbuhat og bag-ong kalibutan; kondili kini ra gihapon mismong ania dinhi. Pagasunogon lang Niya kini, og limpyohan kini, sama sa gibuhat Niya kaninyo. Kinahanglan man gud nga magpabilin ra ang Iyang mga plano hangtud sa kahangturan. Karon, tan-awa, mamahitabo kana.

305 Hinumdumi, nga dili pa kana mao ang Langit. “Mokanaug kana gikan sa Langit.” Usa kana ka Dapit nga puloy-anan, usa ka Dapit nga pagapuy-an, og pahimutangan sa Iyang puloy-

anan. Sama, ni Juan kaniadto, sa isla sa Patmos, dinhi sa Pinadayag 21, nakita niya kana nga “nanaug.” Nakita ni Juan ang maong Siyudad nga, “nanaug gikan sa Langit,” ingon sa usa ka salampati, nga sama sa iyang nakita.

³⁰⁶ Ania ang Dios, nga nanaug sa Iyang yutan-on nga tabernakulo, si Jesus, diha sa . . . “nagakunsad gikan sa Langit.” Si Jesus sa nabautismohan na, sa gilayon mihaw-as. . .

³⁰⁷ Sa dihang natagbo Niya ang propeta! “Ang Pulong nagaabot ngadto sa propeta.” Ug Siya man mao ang Pulong. Ug atua nagatindog ang propeta, nga ginapanghimakak ang tanan nilang denominasyon kaniadto, og tanan na. Ug, sa dihang nakita sa propeta ang Pulong, sa gilayon miduol ang Pulong ngadto kaniya.

³⁰⁸ Ug nangangha kaayo ang propeta, ingon niya, “Ako ang gikinahanglan nga pagabautismohan Nimo. Nganong Ikaw na hinoon ang mianhi kanako?”

³⁰⁹ Miingon si Jesus, “Itugot lang kini, kay kini mao’y angay kanato (nasayod na kita sa mensahe) aron sa pagtuman sa tibuok pagkamarung. Ako mao ang Halad; kinahanglan Kini nga mahugasan.” Gitugotan Siya sa propeta.

³¹⁰ Sa diha nga mihaw-as na Siya gikan sa tubig, miingon ang propeta, “Nakita ko ang kalangitan nga naabli.” Nakita kadto sa maong propeta. Nakita niya ang kalangitan nga naabli.

³¹¹ Ug ania nagaabot, nagakunsad gikan sa Langit, ang porma sa usa ka Salampati; ug usa ka Tingog, ang nagaingon, “Ang Akong bahin kini sa yuta nga Akong gitubos, ug gikan niini nga bahin sa yuta pagatubuson Ko ang uban pa nga bahin niini, kay Siya mao ang Akong Pulong nga nahipadayag.” “Ug ang tibuok kalibutan, gilutok Ko kini aron motungha pinaagi sa Akong Pulong,” Mga Hebreohanon 11. “Ug gikuptan kini ni Satanas hangtud niining panahona, apan mianhi Ako aron tubuson kini. Pagkadaku nga bahin niini ang naglangkob sa Iyang lawas, ug mianhi Ako aron mopuyo niini.”

³¹² Miingon si Juan, “Nakita ko ang balaang Siyudad, ang Bag-ong Jerusalem nga nanaug gikan sa Langit, ingon sa usa ka Pangasaw-onon nga gidayandayanan alang sa iyang Bana.” Ug asa man kana mapahimutang? Sama ra gayud sa napahimutangan niini didto; ibabaw sa yuta.

³¹³ Si Jesus ang bahin nianang yuta nga gikunsaran sa Espiritu Santo, (husto ba kana?) ug nagpabilin na Kaniya hangtud sa kahangturan. Dili gayud Kini mahimong mobiya Kaniya. Anaa Kini dinha sa kanunay. Siya ug ang Dios Usa ra man. Mao nga kanunay na gyud nga magpabilin!

³¹⁴ Ug busa nakita ni Juan ang balaang Siyudad, ang Bag-ong Jerusalem, nga nagakunsad sama sa usa ka kometa, o usa—usa ka salampati, nga nanaug gikan sa Langit ug

napahimutang sa ibabaw sa tibuok yuta, nga gitubos, (aron buhaton ang unsa?) aron angkonon ang matag kinaiyahan nga mao'y hinungdan nga Iyang gibuhat ang yuta. Ang matag lalaki nga girepresentar sa Eternidad, ug ang matag babaye usab, gitubos na nianang higayona. Siya'y bug-os na nga gilimpyohan ug gisunog pinaagi'g Kalayo.

³¹⁵ Si Jesus, sa nagasilaob nga mga tentasyon Kaniya sa kamingawan kaniadto, sulod sa kuwarenta ka adlaw. Human niadto, matikdi n'yo, nahiangam na Siya alang sa Iyang ministerio niadtong panahona.

³¹⁶ Palandunga n'yo kini, ang Espiritu Santo nga nagakunsad sa yuta, si Jesus, ug kadtong balaan nga Dugo! Karon matikdi n'yo, ug nanghinaut ko nga dili ra unta kini ingon ka halawom para kaninyo, kita n'yo. Ang balaang Dugo nga gilalang sa Dios; ang Dugo, ang Kinabuhi, nga binuhat sa Dios. "Si Jesus mao ang sinugdanan sa mga binuhat sa Dios." Oh! Nasabtan n'yo ba? Ang Dios, nga binuhat sa paglalang. Siya'y Espiritu. Ang Biblia miingon, "Siya mao ang sinugdanan sa mga binuhat sa Dios." Sa unsang paagi man Siya nagsugod? Sa tagoangkan sa usa ka babaye. Nga unsa? Ingon nga ang babaye wala . . .

³¹⁷ Sama kanila nga mga tawong buta nga dili gayud makita ang "binhi" sa serpente dinhi mismo. Kita n'yo? Gipahimutang si Eva dinhi sa yuta, ug, sa wala pa siya nahilabtan ni Satanas, o sa unsa pa man, gisultihan na sila sa Dios, "Magpadaghan kamo ug para mapuno ang yuta." Husto kana, apan misulod man dinhi si Satanas. Ug, kung anak kadto ni Adan, nan asa man . . .

³¹⁸ Si Adan direkta man nga kaliwat gikan sa Dios. Ug makuha n'yo mismo ang kinaiyahan sa inyong ginikanan.

³¹⁹ Ug sa diha nga matawo kamo pag-usab, makuha n'yo ang Kinaiyahan sa inyong Ginikanan, sa Langit. Ug ang inyong Ginikanan sa Langit mao man ang kinaiyahan sa Pulong . . . O, ang Pulong diay mao ang kinaiyahan sa inyong Ginikanan. Kung ingon-ana, unsaon man ninyo pagpanghimakak Niini, isip baylo sa usa ka denominasyon? Oh, my!

Nagalaum ko nga dili n'yo kini pakyason. Tungod nasayod gyud ko nga gikan kini sa Dios.

³²⁰ Si Jesus. Ania Siya nagaabot, nagakunsad; ug atua sab si Jesus, ang kinaiyahan sa Dios.

³²¹ Bueno, "ang tawong babaye," ang maong babaye. Himatikdi. Miingon ang Dios, "Tungod kay gibuhat nila ang ingon-ini," miingon, "Ibutang Ko ang panagkaaway sa taliwala sa imong Binhi ug sa binhi sa serpente." Husto ba kana? Ug ang babaye wala ma'y bisan unsa nga binhi. Nahunahuna n'yo ba kana? Aduna siya'y semilyahanan, pero walay binhi. Kita n'yo, mao nga napahimutang na dinha sa serpente ang iyang "binhi" kaniadto.

322 Kung ingon niana, nga walay binhi ang babaye, nan kinahanglan niyang magpabilin aron magkaaduna og Binhi.

323 Nakita n'yo, pinaagi sa pagpakighilawas, nga naggikan kang Satanas, ang serpente, dili pa kaniadto usa ka mananap nga nagakamang; kondili aduna siya'y mga tiil kaniadto, giwagtang lang ang iyang tiil gikan kaniya. Ngani siya kaniadto mao ang pinaka-malalangon, ang bugtong mananap nga makahimo—makahimo sa pagpakighilambigit sa babaye kaniadto.

324 Pero sa karon dili na kana mahimo sa binhi sa usa ka hayop, ug wala na'y uban pa nga makahimo. Gisulayan na nila. Pero dili gyud kana magsilbi. Kita n'yo, ang binhi sa kinabuhi gikan sa usa ka laking hayop dili man masagol ngadto sa tawong babaye. Dili gayud mamahimo.

325 Apan kadto mao ang pinakaanggid nga linalang. Kita n'yo, pero dili na gyud nila makaplagan ang ingon-adto nga matang tali sa usa ka chimpanzee ug usa ka tawo. Kita n'yo, sa matag usa, sa diha nga nag-uswag kana, gikan sa mga langgam, ug ug paingon sa mga unggoy, ug uban pa, og paingon sa chimpanzee, dayon adunay usa nga “nawala.” Kadto mao ang serpente, dili nga usa ka bitin; nawala na man gud ang tibuok niyang porma, tungod kay gitunglo man siya.

326 Bueno, wala gitunglo sa Dios si Adan; mahimong nabuhat niya ang mao gihapong butang, apan Iyang gitunglo ang yuta og, “mga tunok ug mga kadyapa.”

327 Wala pud Niya gitunglo si Eva, apan miingon nga si Adan na ang mamahimo niini nga “tigpangulo.” Mao nga sukad kaniadto, dili gyud mahimong sulayan sa babaye ang unsa man nga pagpangwali o ang bisan unsa, tungod si Adan man ang iyang tigpangulo. “Ug sa tanang adlaw sa imong kinabuhi, ug sa kasakit, ug ikaw maghimugso og . . . kinabuhi ngadto sa yuta.” Apan ingon Niya, “Ibutang Ko ang panagkaaway sa taliwala sa imong Binhi . . .”

328 Karon, ingon nga ang babaye walay unsa man nga binhi, wala gyud siya sukad nagkaaduna og binhi, busa, kinahanglan niyang makadawat og usa ka Binhi sa kung unsa nga paagi. Mao nga gihatagan siya sa Dios og usa ka Binhi, dili pinaagi'g pagpakighilawas, kondili pinaagi sa paglalang.

329 Dili ba ninyo makita mga tawong buta nga kadto mao ang “binhi” sa serpente? Oh, my! Naunhan kaniadto ni Satanas si Adan; mao kadto ang “binhi.”

330 Apan nakadawat ang babaye og usa ka Binhi. Unsa man kadto? Ang Dios Mismo. “Siya mao ang sinugdanan sa mga binuhat sa Dios.”

331 Karon tan-awa n'yo kaniadtong nahimugso si Seth, o si Abel, usa siya ka matarung nga tawo, sama sa iyang amahan. Mao man usab si Seth.

332 Pero asa ba naggikan kadtong dautan nga lalaki; nga mamumuno, og bakakon? Kita n'yo, kita n'yo na kung asa kadto naggikan? Siguradong usa gyud kadto ka “binhi,” tungod kay usa man siya ka binhi; usa ka tawo si Cain.

333 Oh, hain na kaha sila nga mga tawong buta? “Gibutahan sila sa dios niining kalibutana.” Bueno, dili ikatingala, nga miingon si Jesus nga walay si kinsa man ang makakita niini. Nakita n'yo na?

Moingon mo, “Ngano man nga dili nila kini makita?”

334 Miingon si Jesus usa niadto ka higayon, ngadto sa Iyang tinun-an, “Kaninyo gihatag ang paghibalo sa Ginghamarian sa Dios, apan dili kanila.”

335 Ug mao kana'y hinungdan nga gikan pa kamo sa kinse ka gatus ka milya, kita n'yo, “Kaninyo gihatag ang paghibalo sa Ginghamarian.” Tan-awa, aduna pa gani og mga tawo nga gikan pa sa South Africa ug sa uban pang lugar, sa niining ulahi nga takna sa diha nga nagakaporma na ang Pangasaw-onon nga mosulod sa Ginghamarian.

Wala lang gyud ko'y igong oras. Himatikdi. Matikdi karon, kita n'yo.

336 Karon nakita na ba ninyo ang maong “binhi” sa serpente kaniadto, kita n'yo na kung giunsa niya kadto pagbuhat? Tukma gayud, kita n'yo. Karon miingon ang uban kanila . . .

337 Bueno, sama niadtong lalaki didto sa Tucson niadtong miaging adlaw, nga naninguhang. . . Ah, basin diay og makapaminaw siya niini nga teyp. Apan, kung mao man, dong, aduna ko'y gustong isulti kanimo.

338 Sa dihang miingon siya, “Ang ingon man ni Eva,” mao kini ang ilang ginapahinungdan, “Nakabaton ako og usa ka anak gikan sa Ginoo, o usa ka lalaki gikan sa Ginoo.” Aba, walay pagduhaduha. Tungod aduna ma'y balaod ang Dios.

339 Ania, pagkuha mo og usa ka binhi ug itanum kana dinha sa usa ka umahan kon diin adunay trigo, ug pagtanum pud mo og mga kadyapa dinha. Dili ko igsapayan, tungod buhion man kana nga binhi sa mao ra nga adlaw ug mao ra nga ulan. Adunay balaod ang Dios, ug kana nga balaod dili gyud mahimong mapakyas.

340 Dili ko igsapayan kung ang usa ka—kung ang usa ka . . . kon ang pinakadautan nga babaye sa siyudad ug ang pinakadautan nga lalaki, ug dili pa gyud sila minyo ug tanan na, magkaaduna man og—og relasyon, ug mag-ipon sila ug makabaton og anak; nan kana nga anak siguradong mahimugso gyud pinaagi sa balaod sa Dios, tungod kay wala ma'y ubang paagi. Kung dili man, nan ginahimo n'yong magbubuhat si Satanas, ug kung ingon niana siya'y usa diay ka dios. Oh, pagkabuta gayud ninyo! Kita n'yo, tungod kana sa balaod sa Dios, sigurado gayud.

³⁴¹ Kung makabaton man kamo og anak, dili ko igsapayan kung kana ba'y Esau, Jacob, kung kinsa man kana, o kon si kinsa man nga tawong mahugaw'g-dungog, kung kana ma'y Judas, siguradong mahimugso gyud kana pinaagi sa Dios. Tungod aduna ma'y balaod ang Dios.

³⁴² Ang Biblia miingon, "Nagasiidlak ang adlaw sa mga matarung ug sa mga dili-matarung; nagakahulog ang ulan sa mga matarung ug dili-..." Sa Mga Hebreohanon sa ika-6 nga kapitulo, ug nagaingon kana nga, "Ang—ang ulan sa masubsob gayud nagakatagak ibabaw sa yuta, aron bisbisan kini, ug iandam kini alang sa gitagan-an sa pag-ugmad niini, kabalo na mo, aron panginabuhian; apan ang mga tunok ug mga kadyapa nangabuhi pud pinaagi sa mao ra nga ulan, sa mao ra nga sidlak sa adlaw." Tungod kay, balaod man sa Dios, nga mahinog ang matag binhi, aron nga mamunga ang matag binhi sa matang niini.

³⁴³ Busa, siguradong mamunga gyud kadto og "binhi" sa serpente. Ug wala—wala kadto nakababag sa Dios; tungod niadto natuman hinoon ang Iyang kinatibuk—ang plano, tungod niadto nahimo Siyang usa ka Manunubos. Makita unta kini sa bisan kinsa man nga buta, gawas lang kon gililong gyud kini. "Pero ang dios man sa kalibutan" ang naglilong niini kaninyo. Klaro man kaayo unta kini sama sa unsa mang butang nga makita ninyo. Ingon niana ka klaro. Ingon ka klaro ang "binhi" sa serpente. Karon himatikdi.

Apan, "Si Jesus mao ang sinugdanan sa mga binuhat sa Dios."

³⁴⁴ Bueno unsa ba'y ginabuhat sa babaye? Ingon nga, ang binhi nagagikan man sa lalaki. Karon mapanghimakak n'yo ba kana? Wala diha sa babaye ang maong kinabuhi, wala gayud. Kondili Kondili ang anaa lang kaniya mao ang itlog, nga usa ka semilyahanan.

³⁴⁵ Sama lang kung aduna ka'y umahan ug daruhon mo kini pag-ayo, ug—ug espreyhan kini, ug espreyhan aron mangatangtang ang tanang mga kagaw niini. Ug aron nga wala—wala na gyu'y sagbot o unsa man ang mahimong motubo dinha; ug dayon abonohan mo usab, og magpugas og pipila ka maayo nga binhi dinha. Kung may moabot man nga kaaway ug magpugas og lahi nga binhi, pahinogon gihapon sa mao ra nga balaod sa Dios ang maong duha ka binhi.

³⁴⁶ Bueno, wala man gyud tuyoa sa Dios nga mamaingon niana, kita n'yo. Apan unsa ba ang nahitabo?

³⁴⁷ Kita n'yo, ang semilya gikan sa lalaki mao ang nagadala sa hemoglobin, nga mao ang dugo. Anaa sa dugo ang maong kinabuhi. Ug kung kamo'y... Naobserbahan ko na kana, sa pagpang-hybrid og mga baka ug mga ingon-anang butang. Nasaksihan na namo ni Igsoong Shakarian kana, ug ang

mga doktor ug uban pa, nagatan-aw pud kung giunsa kadto pagbuhat, sa mga chemist. Kita n'yo? Dayon ania ang semilya gikan sa babaye, nga usa ka bahin sa mga itlog. Ania pud ang semilya gikan sa lalaki, nga usa ka bahin sa mga binhi.

³⁴⁸ Wala *kini'y* ni usa ka tipik nga binhi sa sulod niini. Usa kini ka binuhat lang gikan sa lalaki. Mao kana ang paagi nga nahitungha dinhi ang tawong babaye, sa sinugdan kaniadto, ug usa lamang siya ka semilyahanan. ng usa ka itlog; aduna *kini'y* matambok nga semilyahanan alang niining maong kinabuhi. Ug mosulod kini nga kinabuhi ug mokamang. Aduna *gyu'y* misteryo, kung daw sa unsa nga . . .

³⁴⁹ “Tingali,” moingon mo, “bueno, ang unang magkatagbo. Ang tanang uban pa niini mangamatay ra.” Bueno, unsaon, og kinsa man ang magbuot niana? “Bueno, ang pinaka una.” Kana bang usa diha sa atubangan; ang unang itlog ba diha sa atubangan, ug ang unang binhi? Dili, dili.

³⁵⁰ Tingali'g ang usa ka itlog kana; nga anaa, sa luyo nga bahin, o sa tungatunga nga bahin sa semilya, og motunga pud ang usa ka binhi ug tagboon kana. Nagapakita lang nga adunay usa ka kaalam ang nagabuot kung kini ba'y pula og buhok, itum og buhok; kung kini ba'y gamayon, o dakuon; lalaki ba o babaye. Kita n'yo? Wala kamo'y, wala *gyud* kamo'y unsa man nga mahimo mahitungod niini; dili kana magpulos. Mahimo man ninyo kancang isagol, ug tanan na, wala gihapon kana'y bisan gamay'ng kalahian. Ang Dios man ang nagabuot niana. Ug dili madugay, dunay usa ka gamay'ng binhi ang mokamang pasulod diha nianang semilyahanan, nga itlog. Dayon aduna na'y usa ka gamay'ng may ikog, mora'g, ingon niana, ang magalangoy-langoy dinha; nga maporma, ug dinha magsugod ang dugokan sa bata.

³⁵¹ Unsa man ang babaye kung ingon niana? Wala siya'y binhi. Aduna lang siya'y semilyahanan aron modawat sa binhi. Busa ang . . .

³⁵² Kita n'yo, miadto ang kaaway. Samtang miadto ang maayong magpupugas, nga nagapugas og maayong Binhi; ug misunod sab kaniya ang kaaway, nga nagapugas og dautan nga binhi. “Apan nagakahulog ang ulan sa mga matarung ug sa mga dili-matarung; ang adlaw usab.” Mao nga siguradong motubo *gyud* kana tanan.

³⁵³ Miingon si Jesus, “Pasagdi ninyo nga managtubo sila pagdungan. Nianang adlawa pagabugkason man sila, ang mga bunglayan.” Ug ginabugkos na gani sila karon, diha sa dagkung mga organisasyon; paingon sa dakung pagbugkos sa, World Council of Churches. Ug unsa man ang katapusan? Ang pagsunog. Apan pagadalhon ang trigo ngadto sa dapa. Kita n'yo? Pero, pareho silang nangabuhi pinaagi sa mao rang butang, sa mao ra nga tubig, sa mao ra nga ulan.

354 Ang usa ka punoan sa citrus, nga usa ka—nga usa ka punoan sa orange, magapamunga, siguradong; magapamunga kini, og prutas nga granada, kung isumbak kini ngadto niini. Mamunga sab kini og lemon. Mamunga pud kini og kahil. Kita n'yo? Apan dili kini usa ka orange, hinoon nabuhi kini pinaagi sa mao ra nga kinabuhi nga anaa sa maong punoan nga orange.

355 Ang mga denominasyon naisumbak man usab ngadto sa Punoan. Tungod kay, kung nagapamahayag sila nga “mga Cristohanon,” nangabuhi pud bitaw sila pinaagi niana. Si Caifas usab kaniadto; nasayod na kamo kung unsa siya, ug bisan pa niadto nagpropesiya man gihapon siya. Kita n'yo? Kita n'yo na, nangabuhi sila pinaagi niana.

356 Oh, unta makapahigayon kita og usa ka semana, aron nga matun-an gyud nato kini nga hilisgotanan, ug mapaklaro kini og ayo para dili gyud kamo—kamo mapakyas nga makita kini. Karon laktawan ko lang ùsa ang pipila niining mga butanga.

357 Karon matikdi n'yo. Ania, ang maong mga kamot nga nagdisenyo niana alang sa Iyang Hinigugmang Pangasaw-onon, gidisenyo kana nga may malulot nga gugma alang sa Iyang Pangasaw-onon.

358 Hinumdumi n'yo nga mikunsad kang Jesus ang Espiritu Santo, ingon nga, si Jesus kabahin sa yuta. Ngano man? Ang binhi sa Dios, ang Kinabuhi sa Dios, gidisenyo man sulod sa tagoangkan sa usa ka babaye (husto ba?), nga mao ang yuta. Oo. Ug dayon misulod ang Kinabuhi sa Dios, busa, “Siya mao ang sinugdanan sa mga binuhat sa Dios.” Kita n'yo? Ug dayon ang Dugo sa Dios, nga atua misulod pinaagi sa maong binhi; sa dihang giula kadto didto sa Kalbaryo, gipatulo kadto ibabaw sa yuta. Para unsa man? Aron tubuson ang yuta. Bueno, gipamatarung na kini; gipabalaan na kini; gitawag na, ug giangkong na; ug karon pagadawaton na niini ang bautismo sa Kalayo, ug pagalimpyohan para kang Jesus ug sa Iyang Pangasaw-onon.

359 Ug kamo kining uban pa nga mga bahin nga gikuha gikan niining yutaa. Sa yuta, kabahin kamo sa yuta; ang inyong lawas. Ang inyong kalag mao ang kabahin sa Dios, nga usa ka kinaiyahan sa Dios, nga napasundayag sa usa ka lawas dinhi ibabaw sa yuta. Mao nga pagatubuson sab ang lawas.

360 Bueno, gitubos ang kalag, tungod kay anaa man kini sa kasal-anan. Busa mikanaug ang Dios, pinaagi sa proseso sa pagpamatarung, pagpabalaan, bautismo sa Espiritu Santo, ug gitubos ang inyong kalag.

361 Ug kamo, ingon nga kabahin kamo sa yuta, gitubos sab kini pinaagi niana. Anaa na kamo karon sa maong proseso. Nagapadayon ra kana mismo. Gipamatarung ang inyong lawas ilalum sa bautismo ni Noe kaniadto. Amen! Ug, ang inyong unod, usab sa dihang gipatulo ang Dugo kaniadto didto. Ug

pagalimpyohan ang yuta pinaagi'g Kalayo, ang dapit kon diin kamo magapuyo, pinaagi sa bautismo sa Espiritu Santo; aron mahimong usa ka Puloy-anan ni Cristo ug sa Iyang Pangasaw-onon, ang Bag-ong Jerusalem.

³⁶² Matikdi kini nga Siyudad; sa yuta, tungod ipahimutang man kini ibabaw sa yuta. Karon makita na ninyo sa ingon ka tataw sumala sa gikaingon ko na, ang. . .kini nga pagkausab, tungod pagausabon man ang yuta. Dili man gud Niini mahimong puyan kini nga ingon pa niini ang kahimtang niini sa karon. Dili mahimo nga ang iglesia. . .O, dili puedeng magpadayon ang kalibutan, human sa Milenyum, kon wala pa kini giusab. Kita n'yo? Aron nga magkaaduna og ingon niana nga Dapit dinhi, kinahanglan ùna nga bag-ohon kini.

³⁶³ Sama lang, nga kinahanglan natong mausab pinaagi sa Iyang balaan nga Kalayo, aron nga mahan-ay tà ug mahimong usa ka Dapit nga Iyang mapahimutangan sa kinasuloran nato; kana mao, ang Espiritu Santo.

³⁶⁴ Matikdi n'yo karon, aduna gayu'y halapad nga lawak diha sa Bag-ong Yuta. Uh-huh. Kita n'yo, halapad kaayo nga lawak! Pagausabon kini, tinuod kana, pinaagi'g Kalayo, apan wala na ang dagat. Matikdi n'yo, ang maong Siyudad kinse ka gatus ka milya kwadrado.

³⁶⁵ Karon paminaw mo og ayo samtang ginahulagway nato kini nga mga sukod. Buut kong papason ùna ang pisara, sa makadiyut lang.

³⁶⁶ Ania ang usa ka halawom nga kapadayagan gikan sa Dios. Dinhi, mohunong lang ùsa ko dinhi. Wala ni usa sa niining ubang. . .Hisgotan ko ra ang uban pa nga bahin niini, kon itugot sa Ginoo.

³⁶⁷ Matikdi karon ang maong yuta nga. . .Bueno, ablihi n'yo ang Basahon sa Pinadayag, og makita ninyo kon giunsa niya kana pagsukod pinaagi'g mga maniko ug mga kilometro. Baynte-tres ka gatus. . .Busa karon hingsayran nato nga ang—ang maong Siyudad dunay sukod nga, “kinse ka gatus ka milya” kwadrado.

³⁶⁸ Nasayod ba mo kung unsa ka halayo ang maabtan niana? Gisukod ko kana, niining semanaha. Moabot kana nga gikan sa Maine hangtud sa Florida, ug gikan sa sidlakang kabaybayonan hangtud sa unom ka gatus ka milya ang kalay-on, sa kasadpang bahin sa Mississippi. Sa laing pagkasulti, katunga sa Estados Unidos, para lamang sa maong Siyudad.

Moingon mo, “Wala gihapo'y igong lawak.”

³⁶⁹ Pag wala na ang dagat nan aduna gayu'y igong lawak, tungod kay ang halos upat ka ikalimang bahin niini anaa man sa tubig. Husto ba kana? Paugahon gayud ang dagat tungod sa mga pagbuto, og pabuthon sab ang yuta. Oh, grabe! Timan-i

n'yo, kinse ka gatus ka milya kwadrado, pagkahalapad gyud nga Siyudad! Ug, tungod, timan-i n'yo, wala na man gud ang dagat.

³⁷⁰ “Ug pareho ra ang kalapdon ug ang katas-on.” Kung ingon-ana kinse ka gatus ka milya sa *niini* nga direksyon, kinse pud ka gatus ka milya sa *niana* nga direksyon; kinse ka gatus ka milya; ang distansya sa kalapdon ug sa katas-on. Kinse ka gatus ka milya, hunahunaa n'yo kana, nga nagasidlak nga bulawan. Ug ang maong Siyudad adunay pader sa palibot niini.

³⁷¹ Karon, bueno, wala gyud nagapasabot nga, tungod kay pareho og sukod. . . Ang gikaingon, “Ug ang mga paril ug ang patukoranan pareho og sukod,” wala kana nagapasabot nga usa kini ka cube o kaha kwadro. Aduna man gud og usa pa ka hiyograpikal nga pagsukod, nga ang mga sukod magkapareho gihapon, kana mao ang, sa piramide. Kwadrado, “nahimutang nga kwadrado,” ug ang mga paril magkapareho ra.

³⁷² I-drawing ko ùsa kini. Kita n'yo: distansya, kalapdon, og katas-on. Paingon mismo kita sa maong butang, sa ingon ka sigurado gayud. Kita n'yo? Matikdi n'yo, ang mga sukod *niini* nga anggulo pareho ra gayud, ang tanan niini, ang distansya ug ang—ang katas-on. Adunay usa pa ka pareho nga pagsukod, ang piramide, nga nagapamatuod niini.

³⁷³ Kini, tungod nga ingon-niana kini, eksakto kining nagakatakdo sa ilhanan ni Enoch didto sa Egipto, ang piramide. Nagakatakdo ba? Si Enoch, sa wala pa ang paglaglag sa kalibutan pinaagi'g lunop, kaniadtong paingon na sa pagpamatarung, nagpatungha siya og usa ka ilhanan, ug sa sulod niining piramide dunay pito ka ang-ang paingon sa lawak sa hari. Matikdi n'yo ang ikapitong ang-ang, kung natun-an na ninyo ang mga sukod sa piramide, dunay nagagawas dinha aron dalhon ang kinsa man nga miabot, og aron ipresentar ngadto sa hari. Matikdi kung kang kinsa nga puwesto ang anaa dinha, ug makita ninyo ang maong adlaw nga inyong gikinabuhian, diha sa piramide.

³⁷⁴ Bueno, naghimo ang Dios og tulo ka Biblia. Karon, adunay pagtudlo mahitungod sa piramide nga walay kapuslanan, apan aduna gyu'y tinuod nga piramide. Kita n'yo? Matikdi n'yo. Bueno, ang Dios, ang unang Biblia. . . naghimo Siya og tulo. Ang tanang butang kinahanglan anaa gyud sa tutulo.

³⁷⁵ Nagaanhi si Jesus sa tulo ka higayon. Siya mianhi na, kaniadto, aron tubuson ang Iyang Pangasaw-onon; sa sunod nga higayon, aron kuhaon ang Iyang Pangasaw-onon; sa sunod na pud nga higayon, kauban na ang Iyang Pangasaw-onon. Kita n'yo?

³⁷⁶ Karon matikdi n'yo kung unsa ka maanindot. Kita n'yo? Ug sa niining piramide dunay pito ka ang-ang, ug ang lawak na dayon sa hari. Ug ania na kita sa ikapitong kapanahonan sa iglesia, sa dili pa magalingkod ang Hari sa Iyang Trono.

Ug, hinumdumi n'yo, nga ang piramide wala pa sukad-sukad nagkaaduna og batong-pangtaklub sa ibabaw niini.

³⁷⁷ Ang unang Biblia sa Dios anaa sa kawanangan, nga mao ang Zodiac; nagsugod kini ug nagapadayon sa matag kapanahonan. Ang una, ang sugod sa Zodiac, mao ang usa ka birhen; sa ingon-anang paagi Siya unang mianhi, kaniadto. Ang kaulahiag hulagway sa Zodiac mao ang Leo nga leon; ang ikaduhang Paganhi. Sa wala pa kana adunay nag-krus nga isda, nga mao ang kapanahonang kanser; nga atong gikinabuhian karon.

³⁷⁸ Adunay piramide human niana, nga eksaktong gipamatud-an, ni Enoch. Wala lang kita'y igong panahon para maghisgot niana, apan, sa umaabot nga adlaw, pinaagi sa tabang sa Dios, akong ipakita kaninyo, og tukma nga ihulagway ang kahimtang sa panahon nga atong gikinabuhian. Kita n'yo?

³⁷⁹ Matikdi n'yo, apan kining hiyograpikal nga pagsukod nga aduna kita karon, ingon nga magkapareho ra ang mga sukod, wala nagapasabot nga kana usa—usa gyud ka cube. Matikdi n'yo, takdo kini niadtong sa Egipto. . . o sa ilhanan ni Enoch kaniadto sa Egipto.

³⁸⁰ Sa panahon na sa paglimpyo sa yuta, pinaagi sa bautismo sa Kalayo, mangbuto ang bulkan, sama sa pagbuto niining yutaa, nga magpatungha og usa ka Bukid nga mora'g pormang piramide. Kita n'yo? Halapad kaayo ang lawak aron mabuhat kana! Mausab na kining tibuok yuta. Mausab pud ang tibuok ibabaw niini. Nasabtan n'yo ba? Magpatungha kana og usa ka Bukid nga mora'g pormang piramide.

³⁸¹ Mahimo kining tukma gayud sa Pulong kung mahitabo kini, og mahitabo man gyud kini. Karon matikdi n'yo, kay, sa Isaias 65:25, diin bag-ohay lang natong gibasa, miingon man Siya.

Sila dili modaut ni molaglag sa bisan kinsa diha sa tibuok nakong bukid nga balaan, nagaingon ang GINO.

³⁸² Oh! “Sa tibuok Kong Bukid nga balaan!” Timan-i n'yo, kanunay kanang usa ka “Bukid.”

³⁸³ Kung tul-id man ang mga paril pataas-ug-paubos, nan ang maong Siyudad makita lamang sa gawas. . . o sa sulod diay, ang Trono makita lamang sa sulod; apan matikdi kon makita lang ba kana diha sa sulod.

Ug karon makita na nato ang saad sa Isaias 4:5. Basahon ùsa nato kini.

³⁸⁴ Nagdali ba mo? [Nagaingon ang kongregasyon, “Wala.”—Ed.] Ayaw, ayaw intawon mo pagdali. Kita—kita—paingon na kita karon sa—sa usa ka pinasahi nga butang, mao nga hataas—hataas gyud unta nga—nga oras ang gikinahanglan aron nga masabtan gyud ninyo kini mismo. Tungod kay, gusto sab nako nga klarohon kini. Ug dayon kon balikan na nato kini pag-usab, akong—akong ipakita kaninyo nianang higayona kon unsa—kon

unsa ang atong ginahisgotan, kon unsa gyud kini, sa atong sunod nga pagtuon mahitungod niini, sa ubang higayon.

³⁸⁵ Oh, dalaygon ang Ginoong Jesus! Matikdi n'yo dinhi, kon daw sa unsa nga dili gayud mapakyas ang mga Pulong. Karon tan-awa n'yo dinhi sa Isaias. Naisulat ko na kini dinhi, pangitaon ko lang ùna, sa makadiyut. Isaias 4:5. Karon paminaw mo, nagahisgot siya mahatungod sa Pag-abot sa Ginoo, kon daw sa unsa nga mamahimong imoral na kaayo ang mga kababayan-an. Oh, ingon siya, "Pito ka babaye. . ." Paminaw mo. Ato kining basahon. Tan-awa n'yo dinhi.

Ug ang pito ka babaye mopugong sa usa ka lalaki niadtong adlawa, nga magaingon, Kami magakaon sa among kaugalingong tinapay, . . . magasul-ob sa among kaugalingong bisti: hinganli lamang kami sa imong ngalan, kuhaon mo kanamo ang among kaulawan.

³⁸⁶ Mao kana ang katapusang panahon, kon diin kita nagapuyo karon; kaminyoon, panagbulag, ug prostitusyon, ug unsa pa man.

Niadtong adlawa ang sanga sa GINOO mahimong matahum ug mahimayaon, . . . ang bunga sa yuta mahimong halangdon uyamot ug madanihan. . . kanila nga . . . naluwas gikan sa Israel. (Unsaon kaha ninyo paglingkawas ang tanang hukom sa silot! Kita n'yo?)

Ug mahinabo, nga kadtong mabiyaan didto sa Sion, ug kadtong mahibilin sa Jerusalem, paga . . . (Atong tanawon). . . sa Jerusalem, pagatawgon nga balaan, bisan ang tagsatagsa nga mahasulat uban sa mga buhi didto sa Jerusalem, kita n'yo:

Kon diin mahugasan na sa Ginoo ang kahugawan sa anak nga babaye sa Sion, (hinumdumi, kana sa kanunay ang Pangasaw-onon, kita n'yo). . . ug malimpyohan na ang dugo sa Jerusalem (mao pud kana ang mga nahibilin nga mga Judio, ug ang Pangasaw-onon usab, kita n'yo). . . ug sa taliwala nini adunay espiritu sa justicia, kalayo . . .

³⁸⁷ Mao kana sa kanunay ang paghukom sa Dios, sa diha nga buhaton na Niya ang Iyang katapusang paghukom. Tawgon ùna kamo, matarungon kamo, ug dalhon kamo ngadto sa katubsan; dayon moabot kaninyo ang Iyang paghukom, ug pagalimpyohan sa Espiritu Santo ug Kalayo ang sala. Pagkahuman Iyaha na kamo.

³⁸⁸ Ingon niana usab ang Iyang buhaton sa yuta, sa diha nga pagahinloan na Niya kini pinaagi'g Kalayo, "ug pinaagi sa espiritu sa kainit." Karon matikdi n'yo. Paminaw mo! Andam na ba kamo?

Ug buhaton sa GINOO sa ibabaw sa tibuok nga puloy-anan sa bukid sa Sion, ug sa ibabaw sa iyang tigumanan, ang usa ka panganod nga aso sa maadlaw, ug usa ka kasidlak sa... kalayo sa magabii: kay sa ibabaw sa tibuok himaya igabuklad ang usa ka tabon.

³⁸⁹ [Si Igsoong Branham nagahulagway sa pisara—Ed.] “Ang Ginoo, nianang adlaw, sa ibabaw niana, magabuhat og Kalayo nga Kahayag aron mosiga sa maadlaw.” Ug nagpadayon pa kini ug miingon, “Kini mamahimong usa ka silonganan, usa ka pahulayanan, usa ka dalangpanan.” Matikdi n’yo, tukma gayud kini sa ginasulti sa Biblia, eksakto. Kon tul-id man ang mga paril pataas-ug-paubos, nan dili n’yo kana makita. Kinahanglan nga nakahandag kana. “Sa tibuok Kong Bukid nga balaan...” “Buhaton Niya kining Kahayag sa ibabaw niini nga Bukid, ug mamahimo kanang usa ka tabon/panalipod.” Oh, ginaawit nato ang maong awit:

Oh, kanang Siyudad sa Bukid sa Sion,
Ingon nga usa ka magpapanaw, apan
gihigugma ko kana sa gihapon;
Karon ug sa tanang mga kapanahonan,
Pag makadangat na ako nianang Siyudad
didto ibabaw sa Bungtod. (Kita n’yo?)

³⁹⁰ Matikdi n’yo, didto mismo sa ibabaw sa Bukid sa Sinai mikanaug ang Dios, kaniadtong nakigsulti Siya sa Israel sa usa ka Haligi nga Kalayo. Mikanaug Siya sa ibabaw sa usa ka bukid, sa Bukid sa Sinai.

³⁹¹ Didto sa Bukid sa Pagkabalhin usab, kaniadtong Iyang gimantala nga, “Kini mao ang Akong Anak nga pinalangga; patalinghugi ninyo Siya,” mikanaug Siya sa Haligi nga Kalayo ug nagadan-ag nga kahayag, didto ibabaw sa maong bukid, sa atubangan nila Pedro, Santiago, ug ni Juan. Ug, didto, girepresentar Siya ni Moises ug ni Elias; ang maong gilalin, ug ang gibanhaw nga patay. Himaya!

³⁹² Ang Bag-ong Siyudad ug ang Bag-ong Yuta; ang bag-ong binuhat; ang Siyudad didto sa Bungtod, nga sa ibabaw niana anaa ang Trono. [Si Igsoong Branham nagadrowing og mga hulagway sa pisara para sa sunod nga mga pipila ka parapo—Ed.] Ang Trono *dinhi* dapit, sa ibabaw; ug ang mga lumolupyo, ang tanan anaa sa kinatibuk-an, niini nga Bukid.

³⁹³ Ug ang paril sa palibot niini, adunay dose ka patukoranan. Ug ang tagsa-tagsa niana adunay bato nga atua sa dughan ni Aaron kaniadto, nga nagrepresentar sa dose ka banay sa Israel.

³⁹⁴ Ug, sa mga ganghaan, aduna sila’y upat ka ganghaan nga napahimutang nga eksaktong sama gayud sa templo didto sa kamingawan, sama sa balong-balong sa kamingawan kaniadto. Matikdi nga ang matag ganghaan, adunay—adunay apostoles, tulo sa matag bahin, nga mao ang dose ka apostoles. Ang

matag. . . Ug usa ka gatus ug kuwarenta'y-kuwatro maniko ang kahabogon niana. Ang usa ka gatus ug kuwarenta'y-kuwatro maniko eksakto man nga duha ka gatus ug dise-sais ka piye, busa ang kada usa nianang dagkung mga bato halos baynte ka piye diay ang katas-on, ang tabon-sa-dughan nga atua sa maong ganghaan, nga naglangkob nianang paril nga nakapalibot sa Siyudad.

³⁹⁵ Bueno kining, Siyudad, wala kini napahimutang ibabaw sa paril, tungod kay ang usa ka siyudad, nga kinse ka gatus ka milya, dili man mahimo nga ingon-niana. *Dinhi* niini nga paril kamo mosulod, sama sa mga ganghaan sa karaang Jerusalem. Mosulod kamo agi sa maong paril, pasulod dinha.

³⁹⁶ Ug ang tagsa-tagsa niini, adunay dose ka patukoranan, ug ang tagsa-tagsa aduna pu'y esmeralda ug nagkalainlaing mga bato, nga nagrepresentar sa dose ka banay sa Israel.

³⁹⁷ Ug ang mga apostoles, ang matag usa kanila, sa ibabaw nianang usa ka dakung, lunlon-mutya nga ganghaan, nakasulat ang ilang ngalan. Ug dili ba miingon man si Jesus, "Magalingkod kamo sa dose ka trono, sa paghukom sa dose ka banay sa Israel"? Si kinsa ba ang nagalingkod sa may ganghaan, aron mohukom, sa diha nga mosulod na sila sa Siyudad? Oh, my! Mao na kana. Ang mga hari sa yuta nga magasulod sa Siyudad, managduol atubangan sa apostoles nga maghuhukom, maingon sa gikasaad ni Jesus. Oh, my!

³⁹⁸ Sa niini nga Trono, sa ibabaw niini, nga kinse ka gatus ka milya ang kahabogon, makita sa tibuok kalibutan ang Kahayag sa kalibutan, si Jesus, nga nagalingkod sa Trono sa ibabaw sa kalibutan, ibabaw sa Iglesia, ibabaw sa Bukid sa Sion; nga kinse ka gatus ka milya, nga katunga pud sa kalapdon sa Estados Unidos, ug ingon gyud ka habog hangtud nga makita ninyo Siya sa tibuok kalibutan, kinse ka gatus ka milya ang kahabogon.

³⁹⁹ Ug sa kinatibuk-an *niini*, mao ang mga Tinubos. Ang mga balay didto lunsay'ng mga bulawan. Halapad ang mga dalan didto, ug mga parke, ug mga tanaman. Ug ang Suba sa Kinabuhi nagagula, nagadagayday gikan sa Trono, ug nagaagas paingon sa gagmay'ng mga bung-aw ug, oh, hangtud sa mora'g nahagagdan-hagdan nga mga bahin. Ug magapamulak sab ang Kahoy sa Kinabuhi sa matag nataran; ug magapamunga sa mga bunga Niini, napulo'g-duha ka higayon sa usa ka tuig, lahi-lahi pa gyud ug bunga matag bulan.

⁴⁰⁰ Ug ang mga hari sa yuta managpanuol ngadto niini ug managdala sa ilang mga pagpasidungog. "Ug ang mga dahon alang man sa pag-ayo sa mga kanasuran," pag ang mga hari magkinabuhi na didto nga malinawon. Pag manggawas sila, magakuha sila og usa ka punoan, usa ka dahon nga ingon *niana*. Sama sa salampati nga mibalik, niadtong natapos na ang kapungot sa Dios, ug nagdala og dahon sa holly ngadto

sulod sa arka. Busa pagmoadto na ang hari, aron sa pagdala sa iyang paghimaya ngadto sa lawak sa Pangasaw-onon dinhi sa sulod sa Siyudad, magtunol siya og usa ka dahon sa iyang katapad nga hari, ug moingon, “May pakigdait na kita hangtud sa kahangturan.” Amen! Tungod sa pagkaayo sa mga kanasuran! “Nasulbad na ang tanan. Kaniadto nagapakig-away kita alang sa dugo sa usa’g usa, igsoon. Ug kita kaniadto naghigugmaay man, ug dayon magsinggitay na; ug magpinusilay, ug mangsunog bisan og mga bata, og tanan na. Apan karon aduna na gyu’y kalinaw, og kaayohan.” Dili pagkaayo sa balatian; tungod natapos na man kana tanan. Kondili pagkaayo sa kanasuran! Amen!

⁴⁰¹ Siyudad nga adunay Trono sa ibabaw niini. Pinadayag 21:23, “Ug sila dili na magkinahanglan og kahayag, kay ang Cordero ug ang Ginoong Dios man mao ang Kahayag didto.” Kita n’yo? Ang Ginoong Dios mao kadtong Haligi nga Kalayo nga nagasunod kaniadto sa mga anak sa Israel latas sa kamingawan. Ug Siya molingkod na sa Trono, sa nianang hingpit nga Gingharian. . . sa dihang ang panahon. . . “ang Gingharian igatugyan na ni Jesus ngadto sa Amahan, aron ang Dios mahimong tanan, ug ngadto sa tanan.” Magalingkod si Jesus dinhi sa Iyang Trono, ingon nga atong Joseph. Ug ang Hari mao kanang Kahayag nga maanaa ibabaw sa Bukid sa Sion, ug ang Iyang balaang Kahayag magakaylap sa tibuok Siyudad. Alleluyah!

⁴⁰² Kinse ka gatus ka milya ang kahabogon, ug kinse ka gatus ka milya kwadrado, nga ang mga paraiso sa Dios anaa natukod sa kinatibuk-an nianang Siyudad; mga dalan, og halapad nga mga dalan! Basaha ninyo ang Pinadayag 21, tan-awa n’yo kon dili ba kana husto. Kita n’yo, “Sila dili na magkinahanglan og kahayag didto, kay ang Cordero man mao ang Kahayag.” Ug makita mismo ang Trono, nga napahimutang, kinse ka gatus ka milya.

⁴⁰³ Dili gyud kini tul-id nga nagabarug nga nakaingon *niini*. Medyo nakahandag kini, sama sa piramide. Kung katunga ang kalay-on niana, nan mamahimo nga nagabarug kana nga nakaingon *niini*, nakita n’yo, gikan sa usa ka siyudad ngadto sa usa pa. . . karon kung inyong matikdan, gikan sa usa ka bahin sa maong Siyudad ngadto sa usa pa.

⁴⁰⁴ Mahimo ko pa nga magdugang og diyutay’ng butang dinhi kung gusto ninyo. Namatikdan ba ninyo ang gamay’ng grupo dinhi? Mga ingon niana lang nga bahin, ang gilangkoban niana. Georgia, California, hangtud sa Saskatchewan; gikan sa Kansas, hangtud sa batohon nga utlanan nga kabaybayonan sa Maine; mao kana ang gilangkoban niana. Mga ingon niana pud ang girepresentar dinhi mismo, mga kinse ka gatus ka milya kwadrado.

Oh, gikan pa sila sa Sidlakan ug Kasadpan,

Gikan pa sila sa halayong dapit,
 Aron magkumbira uban sa Hari; aron
 mokaon... (Sa unsa man? "Ang tawo
 dili mabuhi sa tinapay lamang." Kondili sa
 Tinapay, nga Pulong!)... aron mokaon ingon
 nga Iyang mga bisita;
 Pagkabulahan gayud niini nga mga
 magpapanaw!

Sa kalibutan, makaingon ko nga, wala pa ako sukad
 nakakita og mga tawo nga sama nila.

Oh, ang makita ang Iyang balaang dagway
 Nga nagasidlak tungod sa Balaanong
 Kahayag;
 Mga gipanalanginang umalambit sa Iyang
 grasya,
 Ingon nga mga mutya nga magasidlak diha sa
 Iyang purongpurong.
 Oh, si Jesus haduol nang moabot,
 Ang atong mga problema nianang tungora
 mawala na.
 Oh, unsa kaha kung ang atong Ginoo moabot
 na niining higayona?

⁴⁰⁵ Dili na magdugay. Ang tanan-tanan tukma gayud. Ang sa
 hiyograpiya, ang Sodoma, ang mga mensahero; ang tanan-tanan
 tukma gayud nga nakahan-ay na. Kita n'yo? Unsa ma'y buut
 ipasabot niana? Hunahunaa lang ninyo, paingon na ta niining
 usa ka gamay'ng tabernakulo, nga kinse ka gatus ka milya
 kwadrado, mao gihapon nga sukod.

⁴⁰⁶ Ngano man nga grabe gyud ang paghunahuna ug kahingawa
 sa Dios nianang gamay'ng dapit sa Palestina, kita n'yo, sa
 dihang gamay lang man unta kana nga luna? Tungod dinha
 man gud mapahimutang ang templo. Dinha man motungha
 ang Bag-ong Jerusalem, dinha mismo. "Ang Olivo, ang Bukid
 sa Olivo mapikas, matunga kini pa-tuo ug pa-wala," oo, pag
 moulbo na ang yuta gikan sa kinauyokan niini. Dili, nga sama
 sa ginaingon nila, nga matunga kono kini nga nakaingon *niini*.
 Kondili moulbo kini, "Niadtong adlawa pag itunob na Niya ang
 Iyang balaan nga mga tiil sa pagtindog didto ibabaw sa Bukid."
 Matikdi n'yo, ibabaw sa Iyang Trono, nga kinse ka gatus ka milya
 ang kahabogon!

⁴⁰⁷ Hinumdumi n'yo, nga gisulayan Siyang tintalon ni Satanas,
 usa niadto ka higayon, sa ibabaw sa usa ka bukid. Kita n'yo?

⁴⁰⁸ Ang Bag-ong Siyudad adunay dose ka patukoranan, sumala
 sa ato nang nahisgotan, ingon nga ang mga patriarca dose usab;
 usa ka gatus ug kuwarenta'y-kuwatro maniko; ingon sa tabon-
 sa-dughan nga atua ni Aaron kaniadto; dose ka ganghaan nga
 perlas, og ngalan sa dose ka apostoles.

409 Motindog si Jesus, ingon nga Pangulong-bato, sa Trono, pag mapurongpurongan na Siya sa Iyang mga balaan ingon nga, “ang Hari sa mga hari, ang Ginoo sa mga ginoo.” Ug Siya man mao ang Pangulong-bato.

410 Wala lang nako nadala ang akong pitaka. Apan kung inyong tan-awon diha sa inyong pitaka, kung aduna kamo’y usa ka kuwartang dolyar, anaa dinha ang selyo sa Estados Unidos; ang usa ka agila diha sa usa ka bahin, nga adunay mga bangkaw, ang coat of arms usab, mora’g ingon-ana; ug sa pikas bahin, anaa dinha ang piramide, nga sa ibabaw niini adunay usa ka mata nga makakita-sa-tanan diha. Kita n’yo, wala sila nasayod kaniadto sa kung unsay ilang ginabuhat. Ug dinha sa ibabaw dunay nakasulat nga Latin, ug inyong makita nga ang ginaingon niini, kini’y “ang halangdon nga selyo.” Wala gyud sila nasayod sa kung unsay ilang ginabuhat. Si Caifas kaniadto wala man sab nasayod nga nagapropesiya diay siya.

411 [Si Igsoong Branham nagahulagway sa pisara—Ed.] Mao kini ang Halangdon nga Selyo. *Ania* usab, kita n’yo, ang maong Siyudad. Dili kini ingon nga usa ka pinahigda nga cube nga nakaingon *niini*, kita n’yo, kondili nakahandag kini aron nga makita kini. Ug sa niining balaan nga Bukid sa Ginoo, mokanaug ang Ginoo sa ibabaw sa Iyang Bukid; *ania* Siya. Mao kana’y hinungdan nga wala usa gipahimutang ni Enoch kaniadto ang batong-pangtaklub. Kita n’yo? Mao kana’y hinungdan nga moabot na karon ang Batong-pangtaklub. Ug motungha sab ang maong Bukid, ug mao kana ang Bukid sa Ginoo.

412 Ug *dinhi* magapuyo ang mga Tinubos. Sa *niining*, halapad nga mga dalan ug luag nga kadalanan, mora’g ingon-ana, ug sa mga parke, ang Suba sa Kinabuhi magadagayday, magaagas paingon dinha. Ug ang matag balay ginama gikan sa masidlak nga bulawan. Ug ang kadalanan usab ginama gikan sa bulawan. Ug atua pud didto ang mga kahoy sa Kinabuhi, ug magapamunga’g dose ka matang sa mga bunga. Ug ang mga hari ug ang mga dungganong tawo managdala sa ilang pasidungog ug paghimaya ngadto sa mga ganghaan. Ug ang mga ganghaan dili pagasirhan inig magabii, tungod kay wala man didto’y kagabhion.

Sa nianang Siyudad kon diin ang Cordero mao ang Kahayag,

Sa nianang Siyudad kon diin wala na didto’y kagabhion;

Aduna ako didto’y puloy-anan, kon diin wala na’y kabudlayan ug kabalaka,

Oh, paingon mismo ako sa kon diin ang Cordero mao ang Kahayag.

413 Dili ba ninyo makita nga ang mga lungsod, mga siyudad, mga kabalayan, og ang mga pinuy-anan sa karon, naga—

nagapahinungod niana mismo? Kining tanang mga natural nga butang usa ra man ka landong.

414 Ipananglitan n'yo ang usa ka anino, sama sa akong kamot, diha sa halayo. Sa dili pa magkaaduna og—og positibo...o negatibo, kinahanglan aduna ùna og positibo. Ug, makita ninyo, ang maong anino, nga daw sa aduna ko'y usa ka dosena nga mga tudlo, apan sa dihang magpahiduol na kamo niana, kana—magkatipon kana sa usa na lang, ug dayon mawala na ang anino og paingon na sa kamot.

415 Ug mao usab, sa makadaghang higayon, nga gahunahuna ang mga tawo nga aduna kono'y tulo o upat ka Dios. Pagkahalayo gayud sa inyong ginatan-aw nga didto pa sa nahaunang mga repormasyon kaniadto. Kita n'yo? Pangduol na mo karon ug, inyong makita, hangtud nga matan-aw n'yo pagayo nga dunay Usa ra diay. Eksakto gayud.

416 Aduna usab og usa ka Pangasaw-onon; dili nga usa ka dosena, nga mga denominasyon. Kondili usa ra ka Pangasaw-onon, kana mao ang mga Pinili, gikan sa matag...gikan sa—gikan sa yuta nga mga gitagana-nang-daan ngadto niini, sila nga mga nakaila sa ilang puwesto sa Ginghamarian.

417 Sa niining maong Trono, matikdi n'yo, nga ingon gyud ka habog! Ang Bag-ong Siyudad; nga dunay mga patukoranan; dose ka ganghaan; si Jesus, nga mao ang Pangulong-bato; ang mga apostoles, ang magahukom; sa dose ka banay.

418 Ang piramide ni Enoch wala gayu'y anino sa bisan unsa man nga oras sa adlaw. Nakaadto na man ko sa Egipto, didto sa mga piramide. Ingon kini ka hingpit sa hiyograpikal nga pagkapuwesto niini, ug tungod usab sa hingpit nga sukod sa iyang hiyometrikal nga pagkatukod; mao nga, bisan asa man ang adlaw, wala gayu'y anino palibot sa maong piramide. Kita n'yo na kung unsa kini?

419 Ug wala na didto'y kagabhion. Tungod Siya nga anaa ibabaw sa Bukid, pagapalibotan Niya kini sa Iyang himaya. Ang Iyang Himayang Kahayag maatua man didto sa tanang panahon. Mao nga wala na didto'y kagabhion. Si Jesus, ang Pangulong-bato!

420 Karon matikdi n'yo. Busa, managlakaw ang mga Tinubos diha sa Kahayag. Ngani ginaawit man nato sa karon, “Manglakaw kita diha sa Kahayag, sa nianang matahum nga Kahayag.” Aduna gyu'y sa kung unsa man sa atong kinasuloran nga nagapanawag. “Miagi na gikan sa kamatayon ngadto sa Kinabuhi.” Tungod kay nagahulat man kana. Kita n'yo? Mao kana ang kinaiyahan, nga atong ginabati.

421 Tinuod gayud, nga kini mao...Andam na ba kamo? Kini mao ang Siyudad nga gipangita kaniadto ni Abraham. Kita n'yo? Ingon nga usa ka propeta, nasayod gyud siya nga ang maong Siyudad anaa sa kung asa man. Mao kana ang ginaingon sa

Biblia. Ug mao nga gibiyaan niya ang siyudad nga iyang gipuy-an kaniadto, ug miadto siya; matikdi n'yo kung asa siya miadto, didto mismo kon asa kini mapahimutang. Kita n'yo? “Nangita siya og usa ka Siyudad Kinsang magtutukod ug magbubuhat mao ang Dios,” kita n'yo, ingon nga usa ka propeta.

⁴²² Si Jesus miadto aron sa pag-andam, og usa ka Balaanong Siyudad, pinaagi sa Balaanong mga kamot; Balaanong Arkitekto, alang sa usa ka gipalit na nga Balaanong katawohan, alang sa usa ka gitagana-nang-daan nga katawohan. Miadto Siya aron sa pag-andam.

⁴²³ Nangita si Abraham alang niini. “Ug iyang gipamahayag nga siya’y usa ka magpapanaw ug usa ka lumalangyaw, kay nangita man siya og usa ka Siyudad Kinsang magtutukod ug magbubuhat mao ang Dios.” Ang maong propeta, nasayod gyud nga anaa kini sa kung asa man! Nakita ni Juan kini nga nanaug, apan nagdahum si Abraham nga anaa na kini sa yuta niadtong panahona mismo. Ngano man? Natagbo man niya si Melquisedec, nga mao’y Hari niini, ug gihatagan niya Siya og ikapulo. “Nga walay amahan, ni walay inahan. Siya walay sinugdanan sa kinabuhi ni walay katapusan sa kinabuhi.” Natagbo Siya ni Abraham, ug miambit sila og komunyong didto mismo sa maong luna kon diin pagatukoron ang maong Siyudad, sa balaan nga Bukid sa Ginoo, kon diin magapuyo ang mga Tinubos. Oh, pagkanindot!

⁴²⁴ Kana nga panahon wala na gyu’y paghunong. Dili pa karon, tungod anaa pa man gud kita sa panahon; pero dili madugay mopaingon na kita sa Eternidad.

⁴²⁵ Oh, balaan nga Bukid! Didto masidlak nga bulawan ang mga dalan, halapad nga mga dalan; ug mga kabalayan, ug mga parke. Kung gusto ninyong basahon kini, sa Pinadayag 21:18. Atua sab didto ang Kahoy sa Kinabuhi; nga may dose ka nagkalainlaing matang sa bunga, usa ka matang sa matag bulan, ang igapamunga niini. Ang mga tawo nga magakaon niini nga mga bunga, lahi-lahi sab ang ilang pagkaon matag, matag bulan.

⁴²⁶ Ug kini’y—kini’y gikan sa . . . para lamang sa mga mananaug. Nasayod ba kamo niana? Dili kini para sa mga denominasyon.

Moingon mo, “Seryoso ka ba niana, Igsoong Branham?”

⁴²⁷ Atong ablihan sa Pinadayag 2, sa makadiyut lang, ug tan-awon kana. Pinadayag 2:7. Atong hibaloong karon kon Kamatuoran ba gayud kana o dili. Ang Pinadayag 2:7 mabasa nga ingon niini.

Ug ang adunay igdulongog, kinahanglan magpatalinghug sa sulti sa Espiritu . . .

⁴²⁸ Karon, timan-i n'yo, nga wala Siya nagapakigsulti ngadto sa mga Judio ha. Kondili para kini sa Iglesia, nga Gentil.

*Ang adunay igdulongog, kinahanglan
magpatalinghug sa ginaingon sa Espiritu ngadto
sa mga iglesia; Ang makadaug, pakan-on Ko sa kahoy
sa kinabuhi, nga anaa sa taliwala sa paraiso sa Dios.*

429 “Ang mga mananaug lamang, nga nakadaug sa mapintas nga mananap, og nakadaug sa iyang marka,” nga mao ang Katolisismo, Protestantismo, og denominasyonalismo, “ang mga nakadaug sa mapintas nga mananap, sa iyang marka, og sa letra sa iyang ngalan.” “Magkaaduna siya og katungod sa Kahoy sa Kinabuhi, og katungod sa pagsulod sa mga ganghaan kon diin walay bisan unsa nga mahugaw ang makasulod.” Kita n’yo? Paladunga n’yo kini. Karon, sa makadiyut na lang ha, samtang magpadayon pa kita og diyutay. Ang Kahoy sa Kinabuhi para lamang sa mga mananaug.

430 Ang mga dahon didto alang man sa pagkaayo sa mga kanasuran. Sa ato pa, ang mga hari nga nagapuyo didto, managdala sa ilang pasidungog, sa diha nga dalhon nila ang ilang pasidungog ug itanyag kana sa atubangan sa Trono sa Dios. Sama lang niadtong atua sa gawas, ang napulo . . . nanagdala kaniadto ang napulo’g-usa ka banay, ang matag usa kanila, og ikapulo ngadto kang Levi, kita n’yo. Sa dihang dalhon na nila ang ilang pasidungog ngadto sa . . . pagmogikan na sila sa gipanalanginan nga yuta, didto pa sa sulod, moagi sila sa Kahoy sa Kinabuhi, magakuha og usa ka dahon sa holly . . . o usa ka dahon sa Kahoy sa Kinabuhi, ug dungan sila nga manggawas. Wala na didto’y gubat. Ang tanan-tanan malinawon na. Ang mga dahon mao ang handumanan, sa pagkaayo sa kanasuran.

431 Ang mao ra nga Kahoy, dili sama ni Adan, nga iyang . . . Aduna ma’y usa ka Kahoy sa Kinabuhi sa tanaman sa Eden kaniadto, nga mahimong padayon unta siya nga mokaon didto kung wala unta siya nahulog. Kadto nga Kahoy sa Kinabuhi ang nagapahinumdam kaniya, sa tanang panahon kaniadto, nga ang iyang bag-ong . . . ang iyang pagkabatan-on nagapadayon sa gihapon. Kita n’yo?

432 Mao ra usab sa mga kanasuran. Ang mga dahon didto alang man sa pagkaayo sa mga kanasuran; himatikdi, dili para sa balatian ha. Hinoon magkaaduna kamo og mao ra nga mga katungod nga nabatonan ni Adan kaniadto, sama sa da- . . . sa salampati nga may dala nga dahon sa holly, kining tanan . . . ang matag hari magakuha og usa ka dahon.

433 Himatikdi, ang Suba sa Kinabuhi, tingali’g daghang gagmay nga mga sapa ang naglangkob niana. Karon, sa niini nga yuta . . .

434 Magatapos na ko sa pipila na lang ka minuto. Sa niini nga yuta . . . O, mohunong na lang sa ako. *Ingon-ani* pa man gud ka daghan ang mga sinulat ko, bueno mga traynta pa ka panid. Oo. Tan-awa n’yo.

435 Sa niini—sa niini nga kinabuhi, wala pa gyud ko’y bisan unsa man nga nakita sukad-sukad nga makapahupay gayud nga sama sa pag-adto sa kabukiran ug makakaplag, nianang sapa nga nagadagayday, ang tinubdan niana nga nagahatag og kinabuhi, maingon sa akong giwali niadtong miaging gabii. Kon kapoyon ka ug uhawon, moadto ka lang sa daplin sa usa ka maanindot nga sapa; kon diin sa kinahiladman niana wala na’y mga kagaw nga makaabot, gatasan ka piye ang kalawmon sa yuta, nagabugwak dinha ang lunsay, mahinlo, nga tubig nga nagahatag og kinabuhi. Nagapasalamat kita niana. Gamay ra kana. Pero, ang yuta daghan kaayo og mga sapa nga may pangpalagsik nga tubig. Pag nagakauhaw kamo ug himalasyon na, pag-inom mo gikan nianang maayo, og mabugnaw nga tubig, kana’y—makatabang kana kaninyo para mabuhi.

436 Apan tan-awa n’yo kon asa nagagikan kining Usa. Gikan sa Trono, dinha mismo nagagikan ang tinubdan sa Kinabuhi. Nagagikan mismo ilalum sa Trono sa Dios, kon diin nagalingkod ang Dios.

437 Kining tanan, ang kinatibuk-an niining yutaa, kini nga yuta dinhi nga atong ginapuy-an sa karon; ang matag usa, Cristohanon man o pagano, aduna gyu’y mga templo. Nahunahuna n’yo ba kana? Ang mga kaiglesiahan, silang tanan.

438 Apan kining Usa wala gyud ni usa ka templo. Ang Biblia miingon, “Ug walay templo didto. Apan ang Ginoong Dios ug ang Cordero mao ang templo niini.” Ang Cordero mao ang Kahayag. Ang Cordero mao mismo ang Templo. Ang Cordero mao mismo ang Trono. Ang Cordero mao ang Kinabuhi. Siya mao kana nga Templo. Kita n’yo, kining tanan nga mga templo dinhi adunay butang nga ilang ginasimba; apan, sa niining maong Siyudad, Siya mismo ang butang-silimbahon. Kauban Niya ang Iyang mga katawohan. Ang Iyang Espiritu nga Kahayag magakaylap sa maong Siyudad nga piramide.

439 Sama ni Pedro ug ni Juan, didto ibabaw sa bukid. Midan-ag ang Kahayag ibabaw sa bukid, ug misulti ang usa ka Tingog, miingon, “Kini mao ang Akong Anak nga pinalangga.”

440 Sa Pinadayag 21:3 ug 4, “Ang tabernakulo sa Dios anaa uban sa mga tawo.” Nagpuyo ang Dios sulod sa tawo, sa pagtubos kaniya, pinaagi niining tulo ka proseso. Bueno pagatubuson sa Dios ang yuta ug mopuyo sa yuta, kauban ang Iyang mga ginsakupan sa yuta, nga Iyang gikuha gikan sa yuta. Ug tungod sa sala nahulog kini, apan ang...kinahanglan man Niyang ipadayon kadto. Busa Iyang gipadala si Jesus kaniadto aron tubuson ang nalaglag nga yuta, diin kita kabahin niini. “Walay bisan usa ka buhok sa inyong ulo ang mawagtang.” Mao kana ang giingon ni Jesus. Miingon Siya, “Pagabanhawon Ko kini sa kaulahiing adlaw.” Kita n’yo? Ngano man? Tungod kabahin man kamo sa yuta.

441 Kon inyong namatikdan, aduna ko'y diyutay'ng pagpakatawa mahitungod sa akong asawa nga miingon kanako nga nawad-an na kono ko og buhok. Pero giingnan ko siya nga wala gyud ko nawad-an ni usa niini.

Ingon siya, "Nan asa na man diay ang mga niini?"

442 Ingon ko, "Kon asa man gikan ang mga niini sa wala pa ako nagkaaduna niini." Kon asa man ang mga niini, nga usa ka materyal; kon asa man kini, nan nagahulat ra kini kanako. Kita n'yo? Husto kana. Moadto ra ako kanila, usa niana ka adlaw.

443 Kining tigulang na nga lawas, nga nagapangunot na ug nagakunhod na, ug nagatikubo na ang mga abaga, ug nagasakit na ang mga tuhod, ug—ug pagaw na ang tutunlan. Okey lang kana. Mahimo n'yo kining ilubong sa dagat, apan pagapukawon ra ako sa Trumpeta!...?...Oo, sir. Mangausab kita, usa sa niining mga adlaw. Kabahin ako niining kalibutan nga gitubos. Anaa kamo sa kalibutan, apan walay kahilambigitan sa *kosmos*. Anaa kamo sa lahi nga kahimtang, usa ka tinubos na nga kahimtang.

444 Matikdi, "Ang tabernakulo maanaa uban sa mga tawo." Matikdi n'yo, "Ang unang mga butang nangagi na." Kini, kini nga yuta, nahanaw na. Nagapasabot nga mokanaug na ang Langit aron mopuyo kauban sa tawo. Kita n'yo? Ang Langit ug yuta naghangop na.

445 Tukma gayud niadtong mikunsad sa maong bahin sa yuta ang Salampati, nga mao si Jesus; Siya'y abog sa yuta, ingon nga Tawo. Ang Dios, nga nagagikan sa usa ka gamay'ng binhi sa Kinabuhi, pinaagi sa mamugnaon nga gahum. Ug ang Dugo nga anaa niadtong... Ang Kinabuhi nga anaa niadtong Dugo mikayab na balik ngadto sa Dios, apan ang maong Dugo gipatulo ùna ibabaw sa yuta, aron angkonon kini.

446 Tungod sa dugo nga nakasulod, nga gikan sa selulang binhi nga iya ni Cain, kita n'yo; mao nga mibalik Siya pinaagi sa mamugnaon nga gahum sama lang niadtong Iyang gibuhat kang Adan, sa paglalang kang Adan, ania ang Ikaduhang Adan. Ug tungod sa pagdaut niadtong selula, kon diin (ang sala) gidaut ni Cain kadto nga selula sa dugo sa matarung, kita n'yo, karon kini nga Selula sa Dugo... Tungod kay, gipatay niya si Abel, pero nahimugso man si Abel pinaagi'g pagpakighilawas.

447 Apan kining Usa wala nahimugso pinaagi'g pagpakighilawas. "Kini mao ang binuhat sa Dios, ang sinugdanan niini," ug gitubos Niini ang yuta. Ug ang tanang calcium, potash, petrolyo, og cosmic light, nga naglangkob kaninyo, gitubos usab. "Walay ni usa ka buhok ang madaut. Ug pagabanhawon Ko kini sa kaulahiing adlaw."

448 Dayon unsa na man? Mikanaug ang Dios aron mopuyo sa yuta. Ingon nga, kabahin Siya niini, ang Kaugalingon Niyang lawas. Gibanhaw Niya kini alang sa pagpamatarung kanato, ug

gipamatarung kita pinaagi sa pag-too niana ug pagdawat niana. Matikdi n'yo sa mga tipo, si Jesus nahimong . . . Sa tipo, si Jesus nahimong tawo; ang Dios . . . o gitagana-nang-daan aron mopuli sa tawo, aron tubuson kita, aron himoon kining tanang butang nga posible.

Matikdi, gawas sa maanindot nga mga paril niini, sa niining Siyudad.

⁴⁴⁹ Karon nasabtan na ba ninyo “ang Siyudad”? Kita n'yo, usa kana ka balaan nga Bukid. [Si Igsoong Branham nagahulagway sa pisara—Ed.] “Walay modaut ni molaglag sa bisan kinsa diha sa tibuok Kong Bukid nga balaan, nagaingon ang Ginoo.” Ang Siyudad dili usa ka cube. Kondili usa kana ka Bukid. Ug ang—ang kalapdon ug ang katas-on, pareho ra og sukod, kita n'yo; kinse ka gatus ka milya sa *niini* nga direksyon, kinse pud ka gatus ka milya sa *niana* nga direksyon, kinse ka gatus ka milya ang tibuok palibot; ug kinse pud ka gatus ka milya ang kahabogon. Busa usa gayud kini ka dakung Bukid, sama sa piramide, ug ang maong Siyudad anaa ibabaw sa Bukid. Himaya!

⁴⁵⁰ Mao kana, atua ang mga paraiso sa Dios, ang Kahayag sa kalibutan, ang hingpit nga Ginghamian. Dili nga ikapitong adlaw; kondili ang maong Eternal! Kita n'yo? Dili sa Milenyum; kondili sa Bag-ong Yuta na! Kita n'yo?

⁴⁵¹ Pag anaa na ang yuta sa Milenyum, bisan nagaagi kini sa pagpabalaan nga proseso, kinahanglan gihapon kini nga sunogon. Kita n'yo? Ingon nga, gitubos na sa Dugo ang mga tawo, nagapakita nga kini handumanan nga . . . nga nabayran na ang bili, diha nianang usa ka libo ka tuig. Apan bisan pa niana kinahanglan gihapon kining limpyohan pinaagi'g Kalayo; sama lang kaninyo, nga Iyang mga delegado sa niini nga Siyudad, mga ginsakupan.

⁴⁵² Busa kung mamatay man kamo o kung mabuhi kamo, unsa ma'y kalahian niana? Kung moabot man Siya karon, o moabot Siya usa ka gatus ka tuig pa, o kaha usa ka libo ka tuig pa, nan magpahulay lamang ako hangtud nga moabot na ang akong pagkausab.

⁴⁵³ Busa, tigulang nga lalaki ug tigulang nga babaye, ayaw kamo pagkadiskurahi. [Si Igsoong Branham nagahulagway sa pisara—Ed.] Kung usa kamo ka representasyon *dinhi*, sa niini nga kinaiyahan sa Dios; *kini*, ang Dios; kung nakabaton kamo niini, kung girepresentar kamo *dinhi*, nan dili kamo mahimong . . . Anaa na kamo sa Eternal. Ug kung nakalatas kamo gikan sa ikapitong adlaw, paingon sa ikawalo, nan nakasulod na kamo sa pagka-Eternal pinaagi sa bautismo sa Balaang Espiritu, nahiapil na kamo *Niini*. Karon, kung nagasalig lang kamo sa usa ka sensasyon, o paglukso-lukso, o, “Ginahimo ko ang *ingon-ini*. Ginasaulog ko ang ikapitong adlaw. Wala ako

nagakaon og karne,” ug mga ingon nianang butang, mahanaw man kana, sa gihapon. Kita n’yo? Apan *Kini* mao ang Eternal. Kita n’yo? Kini mao ang Eternal, ang Fiesta human sa fiesta sa mga tabernakulo. Kita n’yo?

⁴⁵⁴ Ang fiesta sa mga tabernakulo mao man ang kaulahiing fiesta, ang ikapitong fiesta. Ngani karon nagasimba na kita sa ilalum sa fiesta sa mga tabernakulo, ang ikapitong kapanahonan sa iglesia.

⁴⁵⁵ Sa Milenyum, magapiyesta na kita sa fiesta sa mga tabernakulo, usab, sa ikapitong adlaw.

⁴⁵⁶ Apan, pagkahuman, na sa ikapitong adlaw, aduna kita’y Balaan nga Panagkatigum, nga magabalik na ngadto sa Eternal. Sa unsa nga paagi? Pinaagi sa Maong Eternal nga mianhi ug gitubos kita ug gipabalik kita, og ginapaila kanato nga kabahin kita *Nini*.

⁴⁵⁷ Bueno unsaon man ninyo pagpakahibalo nga kamo kabahin diay? Pinaagi, niining, maong Pulong alang niini nga panahon, ang saad alang niini nga adlaw. Unsa man kini? Ang pagpasig-uli balik ngadto sa unang adlaw, pabalik ngadto sa una. “Ug iyang pabalikon ang mga kasingkasing sa mga anak balik ngadto sa mga amahan,” ang pagpasig-uli ngadto sa tinuod nga pentecostal, dili sa mga sensasyon; ug igapadayag ang panggabii nga Kahayag, ang mao sa gihapong Anak nga nagpakita og pang-buntag nga Kahayag, maingon sa gikasaad na para niini nga panahon. Amen ug amen!

⁴⁵⁸ Asa na ba kita, mga higala, asa na man kita? Nagahulat na lang nga maihiklin, aron ang Pinadayag 11 mahimo na nga... maipaila ngadto sa mga Judio; husto gayud, taliabot na ang Pagsakgaw.

⁴⁵⁹ Matikdi n’yo, gawas sa mga ganghaan sa mga paril, nga napahimutang sa kinatibuk-ang bahin sa Bag-ong Yuta, ang mga nasud magapuyo na diha sa Eternal nga pakigdait. Karon unsa na man? Ang dungganong mga hari managdala sa ilang paghimaya ngadto niini. Wala na’y sala didto. Wala pu’y mga babaye nga mugbo og buhok ang makasulod niana nga Siyudad. Maigarantiya ko kana kaninyo. Wala na’y nagasul-ob og purol, nagapanigarilyo nga mga makihilawason, mga bigaon, o mga bakakon, mga nagasimba’g-dios-dios, o kung unsa man sila, dili gayud makasulod niana nga Siyudad. Dili, tungod mawala na man kana tanan. Mawala na sab ang sala. “Walay bisan unsang makapahugaw sa pagkabalaan niini ang makasulod didto.” Mao kana’y Iyang giingon. “Ang tanan nahanaw na, hangtud sa kahangturan.”

⁴⁶⁰ Matikdi ang mga kaumahan niini ug ang palibot sa mga ganghaan niini:

Ang oso mamahimo nang maaghop, ang lobo
mamahimo nang maaghop;

Ug ang leon magahigda kauban sa karnero;
 Ug ang hayop nga ihalas, pagaagakon sa usa
 ka bata;
 Mausab ako gikan sa kung unsa ako nga
 pagka-linalang.

⁴⁶¹ Bisan niining kamatayon nga nagapamuhat sa akong may-kamatayon nga lawas, ingon nga nagakatigulang na, mausab gihapon ako.

⁴⁶² Nadungog n'yo na ba ang maong kanta? “Ang oso mamahimo na nga maaghop. Ang lobo mamahimo na nga maaghop.” Dili siya molukso, ug motindog ug maninguhang patyon ka. Kondili makigkuyog na siya kanimo sa paglakaw dinha sa kadalanan.

Kinsa ba ang magapanunod niana? Ang mga Tinubos. Kinsa man kana sila?

Matikdi n'yo, mahimo ko lang itudlo kini pinaagi og mga pagtipo. Matikdi, Igsoong Lee.

⁴⁶³ Kinsa ba ang nanggawas kauban ni Noe nga propeta ngadto sa bag-ong yuta? Kadtung mga kauban niya nga misulod sa arka. Husto ba? Mao kadto ang mga nanggawas didto. Kita n'yo? Kadtung mga misulod nga kauban ni Noe, pinaagi sa iyang mensahe, mao ra sab kadto ang mga nanggawas ngadto sa bag-ong yuta human niadtong bautismo sa tubig.

⁴⁶⁴ Ang si kinsa mang nagasulod kauban ni Jesus karon. Unsaon man ninyo pagpakasulod ngadto Kaniya? Pinaagi sa usa ka Espiritu; ug Siya mao ang Pulong. Ingon nga nahimo kamo nga kabahin Niya. Nan unsa man kamo nga bahin diha Kaniya? Ang Pulong nga buhi sa niini nga panahon, nga nakaila. Magalakaw kamo kauban Niya sa Milenyum. Mao na kana ang higayon nga manggawas kamo. Matikdi, dili ingon nga usa ka bag-ong henerasyon. Kondili gibalhin lang!

Moingon mo, “Oh, Igsoong Branham!” Oh!

⁴⁶⁵ Matikdi n'yo, kung mahimo sa Dios nga kuhaon si Elias ug lalinon siya, baynte-singko ka gatus ka tuig kaniadto, aron ipahibalik siya sa yuta pag-usab, aron mahimong propeta para sa mga Judio, unsa pa kaha ka labaw ang mahimo Niya para sa Pangasaw-onon!

⁴⁶⁶ Human nga migawas na si Noe sa arka, matikdi n'yo kung unsay gisulti ngadto kang Noe pagkahuman niya nga nakalatas sa baha, sama lang sa kang Adan kaniadto. Human nga migawas na siya, ngadto sa bag-ong yuta; ang giingon, “Magpadaghan kamo ug para mapuno ang yuta,” pagkahuman na sa maong lunop. Matikdi n'yo, “magmabungahon, para mapuno ang yuta,” sama kang Adan kaniadto.

Karon makita n'yo dinhi sa ingon ka eksakto. Karon paminaw mo og ayo.

467 Si Adan kaniadto kinahanglan “magpadaghan ug para mapuno ang yuta.” Husto ba? Si Noe sab kaniadto, sa bag-ong yuta, (human nga gilaglag ang kalibutan), kinahanglan “magpadaghan ug para mapuno ang yuta.” Nasabtan n’yo ba? Karon dili ba ninyo makita kung unsa ang “binhi” sa serpente? Unsa ba ang mipuno sa yuta? Nasabtan n’yo ba kini? Maayo. Nasabtan na ninyo karon kon sa unsang paagi nga nakaduol si Satanas kang Èva kaniadto. Mao kana kon nganong naghari ang kamatayon sukad niadto. Ug ang kalangitan, ang yuta, mananap, og kawanangan, bug-os gyud nga gitunglo sa Dios tungod niadto. Mao nga gitunglo, tungod kay nakauna man niadto si Satanas.

468 Mao nga mianhi si Jesus aron tubuson kini pabalik sa Amahan. Aron nga mabuhat kini, nahimo Siya nga kabahin niini; maingon sa bag-ohay lang nakong gihisgotan. Ug gikan niadto mismong abog (ang maong bahin nga si Jesus, Mismo) nga gitubos, og pinaagi Kaniya gitubos ang tanang kinaiyahan sa Dios kauban sa yuta.

469 Siya mao ang gilitok nga Pulong. Kabahin Niya kita nga mga tinubos. Kung ingon-ana, makaila gyud unta kamo! Kita n’yo?

470 Nanag-angkon ang mga Fariseo kaniadto nga nakaila kono sila. Apan, nakita na man ninyo ang akong unang paghulagway, ingon niadto lamang sila tungod sa pagka-intelektuwal. Pero wala man nila maila ang Pulong sa dihang nahipadayag Kadto sa atubangan nila mismo. Miingon hinoon sila, “Kini nga tawo usa ka dautang espiritu.”

471 Karon, niining panahona, ginatawag pud kita nga mga mini nga propeta. Gibansagan kita og tanan nang mahugaw nga ngalan nga mahimong ibansag kanato, sa relihoyoso nga mga tawo, kita n’yo, sa mga inila ug makinaadmanon nga mga tawo. Kita n’yo, wala gayud nila mahisabti. Kita n’yo?

472 Ngani ang bautismo sa tubig dili pa man igo aron sa paglimpyo sa yuta; mao man usab kanila. Ang pagpabalaan, sa Dugo, ang nagpabalik niini, og giangkon kini. Apan ang bautismo man sa Kalayo ang naglimpyo niini; sama usab sa gibuhat para sa Iyang Pangasaw-onon. Ang pagpamatarung, pagpabalaan, og bautismo sa Espiritu Santo.

473 Walay gikasaad nga magpatungha og usa ka bag-ong kaliwatan, sa gikaingon ko na, hinoon nagsaad Siya nga tubuson ang mga nahulog. Sila nga mga—mga gitagana-nang-daan, nga makapanunod niini maingon sa Iyang gisaad. Ug Siya man mao ang walay-pagkausab nga Dios; nasayod kita niana.

474 Hinumdumi n’yo, nga gilalin sa Dios si Elias, og human sa maong pagsakgaw, ug sa maong paglalin, ipahibalik na usab siya taliwala sa iyang katawohan, aron buhaton ang katungdanan ingon nga usa ka propeta sa taliwala sa iyang katawohan; dili magdugay buhaton na Niya kana. Ug gipapabilin man siya nga,

buhi, sulod sa baynte-singko ka gatus ka tuig. Motungha siya pag-usab.

⁴⁷⁵ Matikdi usab, gibanhaw Niya si Moises gikan sa mga patay. Asa man ang iyang lubnganan? Aduna ba'y makapangita niana? Basaha n'yo ang Basahon ni Judas. Kita n'yo? Si Satanas... Ang Arkanghel nakiglantugi kaniadto sa arkanghel, nga si Satanas, miingon, og nangahas... "ang Ginoo magabadlong unta kanimo," sa pakiglantugi bahin sa lawas ni Moises. Ug atua nagtindog sila Pedro, Santiago ug si Juan nga nagatan-aw kaniya, didto sa Bukid sa Pagkabalhin, didto mismo sa yuta kon diin ipatungha ang maong Bukid nga puy-anan. Kita n'yo?

Ug mianhi Siya aron tubuson kini.

⁴⁷⁶ Kita n'yo, atua mismo didto ang gisakgaw nga Iglesia niadtong tungora, nga girepresentar; didto usab silang mga nangatulo, nga girepresentar. Asa man dapit? [Si Igsoong Branham nagahulagway sa pisara para sa sunod nga mga pipila ka parapo—Ed.] Sa maong Siyudad; didto ibabaw sa bukid. Kita n'yo?

⁴⁷⁷ Atua mismo sila Pedro, Santiago, ug si Juan, nga nagatan-aw; tulo, ingon nga saksi. Atua usab si Elias, si Moises, ug si Jesus; ingon nga Langitnong saksi. Kita n'yo?

⁴⁷⁸ Ug didto si Moises, ang patay, nga gibanhaw. Didto sab si Elias, ang gisakgaw, nga buhi sa gihapon. Ug pareho silang girepresentar sa ibabaw niining balaan nga bukid.

⁴⁷⁹ Ug, didto usab si Jesus, ang Manunubos. Ang Dios niadtong tungora, nga anaa sa ibabaw Niya nga sama *niini*, gilandongan Siya, og miingon, "Kini mao ang Akong Anak nga pinalangga."

⁴⁸⁰ Hinumdumi ninyo, nga miingon si Jesus, mga usa ka adlaw sa wala pa kadto, ingon Siya, "Sa pagkatinuod magaingon Ako kaninyo, nga adunay pipila nga nagabarug karon dinhi, nga dili pa mamatay, hangtud nga makita na nila ang Ginghamarian sa Dios nga natukod sa gahum."

⁴⁸¹ Unsa man kadto? Ang gibanhaw nga mga patay ug ang gisakgaw nga mga balaan, nga magkauban, gilalin pagtingub sa pagsugat Kaniya diha sa kawanangan. Samtang gilandongan Siya sa Dios, ug didto nagatindog pud si Jesus sa niini nga landong, nga may nagaingon, "Kini mao ang Akong Anak nga pinalangga, nga Kaniya Ako gayud may kalipay," ang mismong kahan-ayan sa Bag-ong Ginghamarian. Oh, igsoong lalaki, igsoong babaye!

⁴⁸² Ang kamatayon dili nagapausab kaninyo. Kondili ang inyong puloy-anan lamang ang ginausab sa kamatayon. Kita n'yo?

⁴⁸³ Kon nadumduman n'yo, si Samuel, kaniadtong namatay siya ug duha na ka tuig nga nakalubong, atua na gani siya sa Paraiso. Ug gitawag siya sa balbal sa Endor, ug naila siya ni Saul; ug

nakaila usab ang, balbal, ug mihapa kini. Wala gyud siya nausab, bisan gamay. Siya ang mao sa gihapon nga Samuel, human nga duha ka tuig na nga namatay, ug siya'y usa gihapon ka propeta. Ingon siya, "Ugma mapukan ka sa gubat, uban sa imong anak nga lalaki, ug niining mao ra nga oras ugma sa gabii ikaw mahiuban na kanako." Ug mao gyud kadto ang nahitabo.

⁴⁸⁴ Kita n'yo na? Ug pag mobalik na si Moises, ug si Elias, para sa Pinadayag 11, sila'y mga propeta sa gihapon. Alleluyah!

⁴⁸⁵ Ug didto, sa maong Yuta, sa Siyudad kon diin ang Cordero mao ang Kahayag, maila gihapon ta ka, Igsoong McKinney. Maila ko gihapon kamo, mga igsoon ko, nga mga mutya sa akong purong-purong. Sa dihang magsingabot na sila gikan sa Sidlakan ug sa Kasadpan, paingon sa Siyudad; nga kinse ka gatus ka milya kwadrado, nga mapahimutang didto, ug ang maong Siyudad natukod nga kwadrado. Pag atua na kamo didto sa balaan nga Bukid, kon diin magalingkod ang Dios ibabaw sa Bukid, ug si Jesus anaa na sa Trono. Ug motingog ang bulawanong trumpeta sa diha nga mohawa na si Jesus, aron magalakaw-lakaw sa tibuok Paraiso, ug mangluhod ang mga anak sa Dios ug magasimba Kaniya, ingon nga nanghibalo nga sila'y gitubos na. Kita n'yo? Amen! Alleluyah!

Usahay mobati gayud ako og kamingaw nga makauli na sa Langit,

Ug ang himaya ako na Didtong masud-ong:
Daw sa unsa nga kalipay pag makita ko na ang akong Manluluwas,

Didto nianang maanindot nga Siyudad nga bulawan!

Paingon na ako nianang maanindot nga Siyudad

Nga giandam sa Ginoo . . . [Blangko nga bahin sa teyp—Ed.]

⁴⁸⁶ Miingon si Isaias, diha sa Isaias 9:6, "Ug ang Iyang pakigdait ug ang Iyang kauswagan walay katapusan. Ang kagamhanan igatungtong sa Iyang mga abaga; ang Iyang Ngalan pagatawgon nga Magtatambag, Principe sa Pakigdait, ug Dios nga Makagagahum, ang Amahan nga Walay Katapusan. Ug ang kagamhanan igatungtong sa Iyang mga abaga; ug ang Iyang kauswagan ug ang Iyang pakigdait walay katapusan." Bisan ang mga hayop atua usab didto. Oh, pagkanindot gyud!

Ang oso mamahimo nang maaghop, ug ang lobo mamahimo nang maaghop;

Ug ang leon magahigda na tapad sa karnero,
Ug ang hayop nga ihalas, pagaagakon na sa usa ka bata;

Ug mausab na ako, mausab ako gikan sa kung unsa ako nga linalang sa karon.

487 Pagmoabot na kana nga Adlaw, tungod moadto man ako sa maong Siyudad. Paingon na ako nianang maanindot nga Siyudad! Mabati ko karon sa tibuok kong kasingkasing ang Gahum sa pagtubos.

488 Kung dili man, nan gisayangan ko lang ang akong kinabuhi; nagtudlo lang diay ko sa uban og mga malimbongong butang. Apan sa diha nga motan-aw ako ug makita ang Iyang saad alang niining adlaw, ug makita Kini nga gipanghimatud-an; ug motan-aw ko sa niining kinse ka gatus ka milya kwadrado nga kongregasyon nga ania dinhi, mga Pinili nga gitawag gikan sa mga denominasyon ug mga kaliwatan ug mga kredo ug mga ingon-anang butang, nga nanagkatigum; samtang makita ko ang Pulong nga ginapanghimatud-an ang Kaugalingon Niini, nasayod ako, sa wala gayu'y pagduhaduha, nga ang mga mutya sa akong purong-purong mao ang pinakamadan-ag sa tanang butang sa kalibutan, nianang Adlaw.

489 Moabot gyud ang panahon! Mga higala, wala kita nagakatigum dinhi sa walay kapuslanan. Ngani nagahulat na lamang kita alang niana nga panahon. Ulahi na gyud, kaayo, apan si Jesus haduol pa kaayo, sa gihapon. Ug, ang Himaya Niya, pagkaanindot gayud. “Ang Iyang Ngalan pagatawgon nga Magtatambag.” Ang maong Siyudad, makita n’yo ba kini? Dinha magapuyo ang Pangasaw-onon ug ang Pamanhonon, ug dili na gayud. . .

490 Karon, kung nagahunahuna kamo nga pagkanindot kaayo pag nagabiyaha kita og gatusan ka milya aron motambong dinhi ug mokaon sa Iyang Pulong, usa lang gani kini ka landong, unsa pa kaha kung mopuyo na kita sa maong Siyudad uban Kaniya! Pag managsilingan na ta ninyo, ug pag mangaon na kita gikan niadto nga mga kahoy, ug magalakaw kita niadto nga mga dalan, pag molakaw na kita niadtong mga dalan nga bulawan paingon sa tuboran, para moinom gikan sa tuboran, og magalakaw ngadto sa mga paraiso sa Dios, samtang nagapalibot ang mga Anghel sa yuta, nga nanag-awit og mga alawiton, oh, pagkaanindot gayud niana nga Adlaw! Bililhon kana kaayo. Daw sa gansangon man ang dalanon, usahay nagakalisud pa gani, apan, oh, mahupay ra gayud kana pag makita ko na Siya, mahupay ra gayud. Unsa ra man kanang mga dautan nga pagbansag ug mga ingon-anang butang nga ilang gipanulti, unsa ra man kana pag makita ko na Siya didto sa maanindot, maanindot nga Siyudad sa Dios?

491 Iduko nato ang atong mga ulo.

Paingon na ako nianang maanindot nga
Siyudad
Nga giandam sa akong Ginoo alang sa
Mismong mga Iyaha;

Kon diin ang tanang mga Tinubos sa tanang
 kapanahonan
 Manag-awit og “Himaya!” palibot sa Maputi
 nga Trono.
 Usahay mobati ako og kamingaw nga makauli
 na sa Langit,
 Ug ang kahimayaan niini nga Didto ako nang
 masud-ong:
 Daw sa unsa nga kalipay pag makita ko na ang
 akong Manluluwas,
 Didto sa maanindot nga Siyudad nga bulawan!

492 Didto sa isla sa Patmos, nakita kana ni Juan!

493 Minahal nga Jesus, kini nga paglaum, ang akong paglaum
 wala natukod sa kung asa pa man, Ginoo. Mao kana ang inahan
 sa akong kasingkasing; kana nga Siyudad, og ang halangdon
 nga Hari. Dios, ayaw intawon itugot nga adunay usa dinhi ang
 malaglag, kung mahimo unta. Hinaut nga masusi namo pag-usab
 ang among mga kinabuhi, karon, Ginoo, samtang nagahulat sa
 Pag-abot sa Ginoo. Diin, silang tanan nga mga Tinubos, nga atua
 kaniadto sa dakung coliseum sa Roma, kon diin kadtong mga
 Cristohanon nga gipangkaon sa mga leon, mamangon gikan sa
 abog sa umaabot nga adlaw!

494 Wala na’y mga lubnganan sa kilid sa bungtod didto sa
 Himaya. Wala na’y kuptanan sa pultahan nga pagasab-itan sa
 pungpong sa mga bulak. Wala na didto’y luha nga motulo. Wala,
 wala na. Wala na’y mabaga nga kasagbotan. Wala na sab didto’y
 mga unos nga mohampak. Pagkamahimayaon gayud didto.

495 Tabangi kami, Ginoo. Kung aduna ma’y usa dinhi...nga
 tinawag alang niining Panihapon sa Kasal sa Cordero, sa niining
 usa ka libo ka tuig nga paghari sa Milenyum, ug dayon mosulod
 na sa Siyudad pagkahuman sa Honeymoon. Ang Milenyum pag-
 Honeymoon lang gyud. Dayon Siya, ang Pangasaw-onon, dalhon
 na ang Iyang...dalhon na Pauli sa Pamanhonon ang Iyang
 Pangasaw-onon. Iyaha na man kadto. Ang Pamanhonon Niya;
 ang Iyang Pangasaw-onon. Oh, Siya miadto na aron sa pag-
 andam og Balay, sukad niadtong nagsaad Siya nga makigminyo.

496 Hinaut nga magmatinuuron kami Kaniya Nga mao ang
 Pulong, kay Siya man ang Pulong. Bisan unsaon pa sa uban sa
 pagpaninguhang biaybiayon kami, aron ipahilayo kami Niini;
 Ginoo, ipaduol pa ako.

For sometimes I grow homesick for Heaven,
 And its glory I there shall behold:
 What a joy that will be when my Saviour I see,
 In that beautiful City of gold!

497 Ang umalabot nga Puloy-anan sa Pamanhonon ug
 Pangasaw-onon! Siya mobalik...[Blangko nga bahin sa
 teyp—Ed.]...para sa pang-Kasal nga Panihapon; mahitabo

kana sulod sa tulo ka adlaw ug tunga. Dayon mobalik na usab, sa Milenyum, sa among honeymoon. Ug pagkahuman Iyang—ipakita na Niya ang Siyudad. Sama sa pamanhonon nga ginasorpresa ang pangasaw-onon, daw sa unsa nga motindog og mangangha gayud ang matahum nga pangasaw-onon samtang nagatan-aw sa iyang umalabot nga puloy-anan! Ug pinaagi sa pagtoo, karon, Ginoo, makita na namo kana didto. Mapahimutang kana dinhi mismo niining yutaa. Gisaad Mo man kana.

⁴⁹⁸ Ang Imong Iglesia bug-os nang pagatubuson, usa sa niining mga adlaw. Ug pagatubuson usab ang Imong kalibutan, og ang tanang uban pa nga gagmay'ng mga bahin. Apan una Mo nang gitubos ang Imong katawohan, ang ilang mga lawas nga gigama gikan sa kalibutan.

⁴⁹⁹ Tabangi kami, Dios. Kung aduna ma'y usa dinhi nga dili pa gyud ingon ka sigurado niana, Ginoo, hinaut nga ila na kanang dawaton karon mismo.

⁵⁰⁰ Nasayod ko nga udto na ug mainit gayud, apan, mga higala, dili man tà pirming maania dinhi. Dili sab ko pirmi nga mahimo ninyong pastor. Mao nga siguradohon na gyud nato.

“Aduna ba'y paagi, Igsoong Branham?”

⁵⁰¹ Oo, mga nahimong kabahin sa Pulong, kabahin sa Pulong sa karong panahon. Dili man puede nga mamahimo mong kabahin sa Pulong sa panahon ni Moises; tungod nahuman na man kadto nga bahin, mao kadto ang mga tiil. Ania na kita karon sa Ulo. Kini mao si Cristo. Dili nga panahon sa mga bukton, sa kang Luther kaniadto, dili. Kondili mao na kini ang panahon sa Ulo. Si Cristo, ang Pangulong-bato, nga mopahimutang na sa Lawas.

⁵⁰² Kung nabati ninyo nga dili pa gyud kamo ingon ka sigurado bahin niini, sa kon asa man ninyo mahimo, ipataas lang ninyo ang inyong kamot aron akong makita. Ang tanang uban pa ipapabilin lang nga nakaduko ang inyong ulo. Panalanginan kamo sa Dios.

⁵⁰³ Moingon, “Hinumdumi ako sa pag-ampo, Igsoong Branham. Gitinguha ko gayud nga makaadto didto! Ako—dili ko gustong masayloan kana, Igsoong Branham. Ako—nagasusi na ako, og buhaton ko ang tanan nga mahimo ko, apan iampo ako karon, mahimo ba?” Panalanginan kamo sa Dios.

⁵⁰⁴ Samtang ginahunahuna n'yo kini karon, pag-ampo lang, og moingon, “Dios. . .” Anaa ra kana sa kaugalingon n'yong kasingkasing. Kita n'yo, kung aduna kamo'y mabati nga nagabira, nagalihok sa inyong kasingkasing, mao na kana. Ang kinaiyahan kana nga gapaninguhang maipahayag ang kaugalingon niini.

I'm bound for that beautiful City
My Lord has prepared for His Own;

Where all the Redeemed of all ages
 Will sing "Glory!" around the White Throne.
 Sometimes I grow homesick for Heaven,
 And the glories I There shall behold:
 What a joy that will be when my Saviour I see,
 In that beautiful City of gold!

⁵⁰⁵ Langitnong Amahan, kuhaa kami karon, Ginoo. Tugoti ang Halangdong Magbalantay, ang Halangdong Magbalantay nga Manunubos, ang Halangdong Magbalantay nga mibiya sa Himaya, ingon nga nasayod nga may pipila ka mga kinaiyahan nga nangahisalaag diha sa dagkung mga walog sa kasal-anan, kon diin ang mga lobo ug mga—mga hayop nga sa gilayon pagakan-on ra kanang gamay'ng karnero; apan gibiyaan Niya ang mga bulawanong pasilyo, mikanaug sa yuta ug nahimong usa kanamo, aron nga Iyang maipahayag ang gugma sa Dios para kanamo. Didto Niya nahikaplagan sila, ang uban kanila nga anaa sa mga denominasyon, ang uban sab kanila anaa sa balay sa prostitusyon, ang uban kanila anaa sa kadalanan, nga mga buta, ang uban kanila anaa sa gagmay'ng mga dalan ug dagku nga dalan, apan gitubos gyud Niya ang matag usa nga mga gitagana-nang-daan sa Amahan nga Iyang pagatubson.

⁵⁰⁶ Ug gisugo Niya kami, nga among ikinabuhi kining bahin sa Pulong alang sa among mga kapanahonan. Ug nakita namo ang dakung repormasyon ni Luther, niadto nga kapanahonan; ug sa kang Wesley; ug sa Pentecostal. Karon ginahulat na namo ang Pangulong-bato sa Siyudad. Oh Dios, naila mismo namo ang kapanahonan ug ang saad nga gikahatag kanamo alang niining panahon, daw sa unsa nga ipasig-uli Kini pag-usab. "Pahinogon sa pang-gabii nga Kahayag ang bunga niini. Ug mahitabo nga adunay adlaw nga dili mahimong adlaw o gabii, kon pagatawgon, apan motungha ang Kahayag sa panahon sa kagabhion."

⁵⁰⁷ Ang mao ra nga mahimayaong Anak sa Dios nga nagpadayag sa Iyang Kaugalingon sa tawhanong lawas dinhi ibabaw sa yuta, ang nagpahitabo sa maong saad sa ingon ka eksakto, nga nagpabuta sa mga mata sa mga Fariseo ug mga Saduceo ug mga Herodian, ug uban pa.

⁵⁰⁸ Ug sa karong panahon nagakahitabo kini pag-usab, ang Pulong nga nadayag sama sa kung unsa Kini kaniadto. Ang maong Pulong, nga nasayod sa tinago sa kasingkasing, nga eksakto gayud sa nahitabo kaniadto, sumala sa gikaingon sa Kasulatan, nga dili mahimong mapakyas. Tabangi kami, Dios, nga maamgo gyud kana.

⁵⁰⁹ Tabangi karon kining mga nagpataas sa ilang mga kamot. Hinaut nga mas hugtan pa nila ang bakus; isul-ob unta nila ang Maayong Balita sa pakigdait; isul-ob ang tibuok hinagiban sa

Dios; isul-ob ang salukot; og dad-on ang kalasag nga pagtoo; og magmartsa na, sukad karon. Itugot kini, Ginoo.

⁵¹⁰ Diyutay na lamang nga panahon, kami pagatawgon na, dayon moabot na ang Pagsakgaw. Usa ka gamay ra kaayo nga pundok, sama ni Enoch, ang pagalalinon.

⁵¹¹ Dayon, “ang mga nahibilin sa binhi sa babaye, nga nagabantay sa mga sugo sa Dios,” ang mga Judio, “ang mga adunay pagpanghimatuod mahitungod kang Jesus Cristo,” ang Gentil usab, pagagukdon nga mora’g mga iro, “ug ihalad ang ilang kinabuhi tungod sa ilang pagpanghimatuod.”

⁵¹² Dayon, usa ka mahimayaong buntag, magsugod na ang Milenyum, para sa—sa pagsugod sa Honeymoon.

⁵¹³ “Ang tanang uban pa nga mga patay dili mabuhi hangtud nga matapos ùna ang usa ka libo ka tuig.” Dayon, sa katapusan na sa usa ka libo ka tuig, magkaaduna og Paghukom, nga nagapakita nga atua si Ham sa arka kaniadto. Ug atua sa gihapon si Ham sa mga nahibilin. Ang mga nakapatalinghug Niini ug misalikway Niini kinahanglang pagahukman.

⁵¹⁴ Karon, itugot kini, Ginoo, nga dili kami mahiapil kanila, kondili mahiapil gayud sa pagtawag ngadto sa pang-Kasal nga Panihapon. Tungod, naila man namo si Jesus sa among taliwala karon. Mosulod kami uban Kaniya; pagawas sa kalibutan, pasulod Kaniya. Tugoti kami nga makalakaw nianang maong Siyudad, moadto nga uban Kaniya.

⁵¹⁵ Nagakatigulang na ko, Ginoo. Wala na ako’y daghang mga wali nga igawali. Apan nagasalig gayud ako Kanimo. Nagapaabot ako nianang Siyudad, sama sa akong amahang si Abraham kaniadto. Aduna gyu’y Butang sa kinasuloran ko nga nagaingon nga taliabot na kana. Mao nga gapaningkamot ako sa bisan asa man, Ginoo, nga ipakaylap ang Kahayag ug tawgon sila. Ayaw itugot nga adunay usa sa mga niini, Ginoo. . .

⁵¹⁶ Pagkaanindot gayud, nga gipadayag Mo kadto kanako, kaganina. Mga kinse ka gatus ka milya ang gilangkoban, nga may usa lang *dinhi* ug *didto*, ania magkauban karon, nga nagkatigum sa usa ka gamay’ng lugar, og nanagpaabot sa pagtungha nianang Siyudad. Ginapamahayag namo nga kami’y mga magpapanaw ug mga lumalangyaw lamang. Mga sinalikway usab kami. Ang mga pagano, ang kalibutan, nangatawa ug nanagbugalbugal; ang relihiyosong mga denominasyon nanagbiaybiay; apan dili gyud kami matarug sa mga ingon-anang butang. Himoa kami nga kabahin sa Pulong, Ginoo, nga dili gayud matarug. “Mahitabo sa kaulahiing mga adlaw.” Hinaut nga kami kana, Ginoo, hinaut nga mahiapil kami kanila. Amo kining ginapangamuyo sa Ngalan ni Jesus. Amen.

⁵¹⁷ Nagatoo ba kamo niini? Ipataas nato ang atong mga kamot nga nakaingon *niini*.

I'm bound for that beautiful City
 My Lord has prepared for His Own;
 Where all the Redeemed of all ages
 Will sing "Glory!" around the White Throne.
 Sometimes I grow homesick for Heaven,
 And glories I There shall behold:
 Oh, what a joy that will be when my Saviour I
 see,
 In that beautiful City of gold!

⁵¹⁸ Karon, kung magkauban kita nga mopuyo niana nga Siyudad, makiglaman lang sa kang kinsa man, og moingon, "Panalanginan ka sa Dios, magpapanaw. Taga asa man ka? Louisiana, Georgia, Mississippi? Usa ako ka magpapanaw, usab. Nagapaabot pud ako niana nga Siyudad."

⁵¹⁹ Nagapaabot ako nianang Siyudad, didto, Igsoong Neville. Paingon na kita nianang lugara...?...Igsoong Capps, nagapaabot gyud ako niana nga Siyudad, sa gihapon, unyang gabii.

And its glories I There shall behold:
 What a joy that will be when my Saviour I see,
 In that beautiful City of gold!

Oh, the bear will be gentle, and the wolf will
 be tame;
 And the lion shall lay down by the lamb, oh,
 yeah;
 And the beast from . . . will be led by a child;
 And I'll be changed, changed from this creature
 that I am, oh, yeah.

Oh, there will be peace in the valley for me
 some day;
 Oh, there will be peace in the valley for me . . .
 (Husto! Oo!)
 There'll be no more sorrow, no more sadness,
 no more trouble I'll see;
 And there will be peace in the valley for me.

⁵²⁰ Ang atong dili-makita nga Hari, niining buntaga, mahipadayag gayud. Dili na nako makita si Bill Dauch ingon nga nubenta'y anyos ang panuigon. Dili na pud ko ninyo makita ingon nga singkwenta'y anyos. Tungod, mausab na man ko, nianang Adlawa.

And when the beast from the wild, will be led
 by a child;
 But I'll be changed, changed from this creature
 that I am.

⁵²¹ Dili ba mo malipay? Wala na unya'y mga uban; wala na'y nagkatikubo nga mga abaga. Kondili katahum na, wala-na'y-

kamatayon, og mamahimo gayud nga sama na sa Iyang porma, magadan-ag nga labaw pa sa adlaw. Oh, pagkaanindot gayud!

. . . for me, O Lord, I pray;

There'll be no sadness, no more sorrow, no more
trouble I'll see;

And there will be peace in the valley for me.

⁵²² Mao kana'y hinungdan nga ania kita dinhi. Pila man kaninyo ang nagkinahanglan og kusog para sa pagpanaw? Itugot unta kana sa Dios para kanato! Pila man kaninyo ang dunay balatian sa inyong lawas, samdan nga mga sundalo? Usa ka dosena, o sobra pa. Nagatoo ba kamo nga ania Siya, ang dili-makita nga Hari? Ang mga butang nga makita; ang mga dili-makita nahipadayag man pinaagi sa mga makita. Siya mao sa gihapon kagahapon, karon, ug hangtud sa kahangturan, gawas lang sa pisikal nga lawas. Karon, kung ang Iyang Espiritu ang nagwali niini pinaagi kanako, nan buhaton gayud Niya ang mga buhat nga Iyang gipangbuhat kaniadtong ania pa Siya dinhi. Oh, pagkaanindot gayud!

I am bound for the promised land,
I am bound for the promised land;
Oh, who will come and go with me?
I am bound for the promised land.

All over those wide extended plains
Shines one Eternal Day;
There God the Son forever reigns,
And scatters night away.

Oh, I am bound for the promised land,
I am bound for the promised land;
Oh, who will come and go with me?
I am bound for the promised land.

⁵²³ Lima ka gatus ang miubog didto sa suba, niadtong unang adlaw nga nagpakita ang Manulonda sa Ginoo, aron panghimatud-an, nga natagbo ko Siya, sama sa Iyang gibuhad kaniadto sa Bukid sa Sinai. Miubog ako sa suba, ug gatasan ang nanag-awit nianang mao gihapon nga awit para sa bautismo. Ania na sab Siya, nagakunsad, ang mao gihapong Haligi nga Kalayo nga makita ninyo dinha sa retrato; nga mikunsad, didto mismo sa may suba, ug miingon, "Maingon nga si Juan Bautista gipadala aron sa pag-andam sa Iyang unang pag-abot, kini nga Mensahe mao ang magaauna sa ikaduhang Pag-abot." Kita n'yo? Mao kana, kita n'yo.

Oh, who will come and go with me?
I am bound for the promised land.

⁵²⁴ Ang mao mismong Haligi nga Kalayo ania uban kanato. Nasayod ba mo niini? Gibuhad Niya ang uban kanato alang sa usa ka butang, ug ang uban usab alang pud sa uban nga butang. Kung kamo, nga walay ni usa ka pagduhaduha, motoo nga Siya

ania sa taliwala sa bilding, nagatoo ko nga pamatud-an sab Niya ang Iyang Kaugalingon nganha kaninyo. Makapalipay ba kana kaninyo? Kung dili man nako maduolan ang matag usa . . . Hapit na man gud mag-alas dos, apan kung kamo . . . Igo pa lang nakalabay ang ala una, diay. Kung motoo kamo, nan mokunsad gyud Siya nganhi kanato! Hain na man ang atong pagtoo? Kita n'yo, kinahanglan ninyo kanang toohan. Kung dili n'yo kana duhaduhaan, bisan gamay, nan mamuhat gyud kana.

⁵²⁵ Ako—naila ko ang Balaanong Presensiya sa Persona ni Cristo, Nga mao ang Pulong. Ug sa miingon ang Biblia, “Ang Pulong mao’y . . . mas gamhanan kay sa espada nga duhay-sulab, ug nagadulot Kini sa kinauyokan sa bukog, ug nagatugkad sa mga hunahuna nga—nga anaa sa kasingkasing, ginapadayag ang tinago sa kasingkasing.”

⁵²⁶ Ania. Bueno, wala pa ako mahibalo niining mga butanga, pila na ka tuig ang milabay. Ug sa dihang gisulti ko kadto, nga wala nanghibalo niini, matikdi n'yo kung unsay Iyang gibuhat. Ingon Siya, “Karon gunitan mo sa ilang kamot ang mga tawo, ug, ayaw paghunahuna og unsa man, isulti mo lang kung unsa nga kahimtang ang gisulti kanimo. Kung tumor ba, o unsa man.” Dayon miingon, “Mahitabo nga dili mo na kinahanglang buhaton ang ingon-ana.” Kita n'yo? Kita n'yo? “Pagailhon Niini ang mismong butang nga anaa sa kinasuloran nila.” Nagkaaduna man gud kita og tanan nang matang sa mga pagsundog-sundog, nasayod kita niana, nga halos limbongan na ang Pinili kon mahimo pa. Pero matikdi n'yo kon ang tanang uban pa nga butang nagakatakdo ba sa Pulong, kung ingon-ana masayran ninyo kon kana’y husto ba o dili. Apan, bisan pa man, nagapabilin gyud si Jesus nga mao sa gihapon kagahapon, karon, ug hangtud sa kahangturan.

⁵²⁷ Pila man ang ania dinhi nga mga may sakit, ug nasayod nga dili ko kamo igkaila? Ipataas ang inyong kamot, og moingon, “Ako—nasayod ko nga wala ka makaila kanako.” Oh, sa tanaw ko, halos, sa tibuok bilding mismo. Ang bugtong butang nga kinahanglan n'yong buhaton mao ang toohan lang kini.

Only believe, only believe,
All things are possible, only believe;
Only believe, only believe,
All things are possible, only believe.

⁵²⁸ Miingon si Jesus, “Maingon sa nahitabo kaniadto sa mga adlaw sa Sodoma, mao man usab ang mahitabo sa diha nga ang Anak sa tawo igapadayag na sa yuta sa kaulahiing adlaw. Sa diha nga ang Anak sa tawo igapadayag na, o, ipadayag ang Iyang Kaugalingon sa kaulahiing adlaw.” Bueno, dili sa nangaging mga adlaw, sa tunga-tunga nga mga adlaw; kondili sa kaulahiing adlaw, kita n'yo, Siya magapadayag. Ug ania na

kita karon sa kaulahi-ang mga adlaw. Sama gayud sa Sodoma, ang tanan-tanan, ang mga mensahero, managsama gayud.

⁵²⁹ Unsa ba'y nahitabo sa—sa diyutay'ng nahibilin nga mga tinawag pagawas uban sa pundok ni Abraham? Adunay Usa nga miabot sa taliwala nila, nga anaa sa tawhanong lawas; nga girepresentar sa tawhanong lawas, miinom uban kanila, mikaon uban kanila, sa mao rang pagkaon nga ilang ginakaon, og tanan na. Mitindog Siya sa taliwala nila, og gisulti ang Mensahe. Dayon miingon Siya, "Pagabuhaton Ko kining dakung butang."

⁵³⁰ Ug nagsige'g hunahuna si Abraham, "Mao na ba kaha kini? Dugay na akong nagapangita og usa ka Siyudad. Mao na ba kaha kini ang Hari?"

⁵³¹ Ug miingon Siya, "Nganong giduhaduhaan man kini ni Sarah?" Nga anaa kaniadto sulod sa balongbalong, sa likod Niya.

⁵³² Miingon si Abraham, "Ginoong Dios, Elohim!" Tungod kay, gitugkad man Niya ang mga hunahuna ni Sarah.

⁵³³ Miingon si Jesus nga mahitabo kana pag-usab sa diha nga igapadayag na Siya sa kaulahi-ang adlaw, ang Pangulong-bato nga magasulod na sa Lawas. Aron tubuson ang . . . Kana mao ang mga tinubos, og moanhi Siya aron kuhaon na ang Mismong mga Iyaha. Ania Siya uban kanato.

⁵³⁴ Karon, aduna lang og mga usa ka dosena nga mga kamot, o kaha sobra pa, ang naipataas. Nagatoo ko nga mahimo sa Dios nga ayohon ang matag usa kaninyo. Oo. Nagatoo ko nga nagatoo sab kamo. Tungod wala ko gatoo nga mahimo sa usa ka tawo nga maania sa ingon niini nga dapit nga wala man la'y . . . sa ingon niini nga panahon, ug sa ingon niini nga kahimtangan, nga wala man la'y masayran, mailhan nga usa ka butang.

⁵³⁵ Gusto ko nga mag-ampo kamo. Gusto ko nga hibaloon n'yo ùna kung unsay problema kaninyo, sa—sa—sa inyong kasingkasing, kita n'yo, ug dayon magsugod sa pag-ampo, moingon, "Ginoong Jesus, ipadayag kini. Ako—nagapakig-istorya ko Kanimo kung unsa ma'y problema kanako. Ug karon ipadala Mo ang Imong Balaang Espiritu ngadto kang Igsoong Branham, aron tumanon kung unsay iyang gisulti nga Kamatuoran, sa niining Mensahe nga iyang gihisgotan mahitungod Kanimo, nasayod ko nga Kamatuoran kini. Karon, ipadayag kini kanako, Gino. Makigsulti Ka kanako."

⁵³⁶ Bueno medyo nagkayagaw na, dinhi ug sa palibot. Busa mag-ampo lang, ug magtoo gayud sa tibuok n'yong kasingkasing, nga igatugot kini sa Dios.

⁵³⁷ Karon gusto kong motan-aw kamo kanako, ug mag-ampo. Sama lang sa gisulti ni Pedro ug ni Juan kaniadto, "Tan-aw kanamo." Adunay gitinguha ang maong tawo, ug madawat na

niya kadto. Ug aduna sab kamo'y gitinguha, ug nagatoo ko nga madawat na gayud ninyo kini. Ingon siya, "Tan-aw kanamo."

⁵³⁸ Ingon siya, "Salapi ug bulawan, wala ako'y bisan unsa; apan ang ania kanako, igahatag ko kanimo."

⁵³⁹ Karon, bisan pagpang-ayo, wala ako. Kanang tanan anaa ra kang Cristo. Apan kung unsa ma'y anaa kanako, nga usa ka gasa sa Dios, hatagan ko kamo, pagtoo aron toohan Siya. Karon, sa Ngalan ni Jesus Cristo, ang matag usa kaninyo mamaayo na. Toohi n'yo kini. Kita n'yo? "Kung mahimo mong toohan!"

⁵⁴⁰ May babaye nga nagalingkod dinha, nga nagatan-aw kanako. Nagahilak siya, kaganina lang, nga nagaampo. Aduna siya'y sakit sa thyroid nga nagapahasol kaniya. Wala ako makaila kanimo. Dili ko ikaw igkaila. Tinuod kini, dili ba. [Nagaingon ang igsoong babaye, "Tinuod kana."—Ed.] Dili sab ka taga dinhi. Taga Chicago ka. Mrs. Alexander. Kung husto kana, nan iwarawara ang imong kamot. Karon balik na sa Chicago ug mamaayo na.

⁵⁴¹ Unsa ma'y iyang gihikap? Ang mao ra mismong Butang nga gihikap niadtong babaye nga adunay talinugo, ang borlas sa Iyang bisti, dili ang sa ako.

⁵⁴² Anaay usa ka luoy'ng babaye nga nagalingkod dinha mismo sa taliwala sa kadaghanan, kung mahimo ko unta nga masabtan niya ako. Ikaw nga nakatakilid ang imong ulo. Wala ako makaila kanimo. Dili ko ikaw igkaila, apan nagaantus ka tungod sa sakit sa tiyan. Ang imong bana nagalingkod tupad nimo. Aduna siya'y problema sa iyang dalunggan. Ang imong ngalan mao si Czap. Dili ko kamo igkaila. Dili kamo taga dinhi. Taga Michigan kamo. Kon husto kana, iwarawara ang inyong mga kamot. Mobalik mo sa Michigan, nga naayo na. Ang inyong pagtoo mao'y nakapaayo kaninyo. "Kung mahimo mong toohan, ang tanang butang mamahimo."

⁵⁴³ May luoy'ng babaye dinha nga dunay sakit sa tutunlan, nga nagalingkod dinha dapit sa tumoy, nga taga Georgia, og nakabisti og puti. Mobalik ka, didto sa Georgia, nga naayo na. Giayo ka na ni Jesus Cristo. Nagatoo ka ba niini?

⁵⁴⁴ May babaye nga nagalingkod dinha, nga nagatan-aw kanako, diha mismo sa tumoy sa lingkoranan. Aduna siya'y sakit sa sinus. Kon motoo siya niini, nan ayohon siya sa Dios. Mrs. Brown, magtoo ka sa tibuok mong kasingkasing, himoon ni Jesus Cristo. . . Dili ko ikaw igkaila, apan nakaila Siya kanimo. Uh-huh. Nagatoo ka ba niini? Ipataas ang imong kamot. Husto.

⁵⁴⁵ Ang nagahigda dinhi niini nga teheras. Sultih siya nga motan-aw dinhi dapit. Dugay na siya nga nagaantus, sa walay paghunong. Kung mahimo ko lang nga ayohon siya, buhaton ko gayud, sir. Pero wala man ko'y kasarang sa pag-ayo. Dili siya taga dinhi; kondili gikan pa sa halayo. Taga Missouri ka. Ang imong mga sakit pang-sulod. Apan kung motoo ka sa tibuok

mong kasingkasing, ug dili magduhaduha, mahimo gyud kang ayohon ni Jesus Cristo; ug makabalik ka na sa Missouri, nga naayo na, ug magpahayag sa imong testimonyo. Nagatoo ka ba niini? Kung ingon-ana dawata kini, ug bitbita ang imong teheras ug pauli na. Giayo ka na ni Jesus Cristo.

⁵⁴⁶ Nagatoo ba kamo? Mao kana ang pagpaila sa Presensiya sa Eternal nga Hari. Nagatoo ba kamo niini karon, sa tibuok n'yong kasingkasing? Karon, naghimo gayud Siya og lingin, sa palibot mismo niining bilding. Nagatoo ba kamo niini sa tibuok n'yong kasingkasing? Nagatoo ba mo nga anaa kamo sa Iyang Presensiya?

⁵⁴⁷ Karon, ginatoohan n'yo ba ug ginadawat nga usa kamo sa ginsakupan niini nga Gingharin? Ipataas ang inyong kamot. Miingon si Jesus, "Kini nga mga ilhanan maganunot kanila nga nagatoo. Kung pandongan nila sa ilang mga kamot ang mga masakiton, mangaayo sila." Kabahin ra kita sa usa'g usa; kabahin kamo kanako, kabahin ninyo ako; kitang tanan kabahin ni Cristo. Karon, magkadungan, natong ipandong ang atong mga kamot sa usa'g usa.

⁵⁴⁸ Dinhi mismo, ang maong babaye nga naghigda sa teheras mibangon na, nagalakaw na, og mopauli na nga naayo na. Amen.

⁵⁴⁹ Kamo, ang matag usa kaninyo, naayo na man, kung motoo gyud kamo niini. Karon ipandong n'yo ang inyong mga kamot sa usa'g usa, ug kamo kini nga bahin ni Cristo. Iampo n'yo ang tawo nga gipandongan n'yo sa inyong mga kamot, sa paagi lamang nga gusto ninyo.

⁵⁵⁰ Ginoong Jesus, naila namo nga ania Ka karon. Ikaw ang among Hari; gipaila Mo ang Imong Kaugalingon sa among taliwala. Ginapasalamatan Ka namo tungod niini nga Presensiya. Ug, Ginoo, miingon man Ka, "Kung magaingon ka niining bukid, 'Bumalhin ka,' og dili kini pagaduhaduhan; kondili toohan nga mamatuman gayud kung unsa ma'y imong giingon, maangkon mo kini, maangkon mo kanang unsay imong giingon."

⁵⁵¹ Kung ingon niana, ingon nga pagtuman sa niini nga sugo, ingon nga pagtuman sa Pulong sa Dios nga dili mapakyas, kami ingon nga Imong mga delegado gikan sa kinse ka gatus ka milya kwadrado, nga Siyudad, nagaingon kami kang Satanas, ang napildi na nga yawa, "Ang imong katapusan mao ang pagsunog. Kami ang mga delegado nga gikan sa Siyudad nga kwadrado, ang Siyudad kon diin ang Cordero mao ang Kahayag. Kami mao ang mga gipahayag nga kinaiyahan sa Dios nga Makagagahum-sa-tanan, nga gitubos ni Jesus Cristo pinaagi sa Iyang grasya."

⁵⁵² Satanas, gumula ka, ug biyai na ang matag masakiton nga tawo nga ania dinhi, sa Ngalan ni Jesus Cristo. Ang balaang mga kamot nga gitubos na, tungod kay nagatoo man sila sa Pulong ug ingon nga mga kinaiyahan sa hunahuna sa Dios, karon kana

nga mga kamot naipandong na sa usa'g usa. Dili mo na sila magunitan pa. Gumula ka, sa Ngalan ni Jesus Cristo!

⁵⁵³ Karon, sa Ngalan ni Ginoong Jesus, karon, ania Siya. Ang Iyang Pulong nagaingon nga ania Siya. Ang inyong presensiya ug ang inyong pagtoo nagapanulti, nga, usa kamo sa mga ginsakupan. Bisan sa matag hiyograpikal nga pagsukod nga atong mapakita, mao gayud. Naila ba ninyo nga kamo mga tinubos nga anak nga lalaki ug mga anak nga babaye sa Dios? Naila ba ninyo nga *kini* mao ang inyong Pulo-y-anan? *Dinhi* kamo mopaingon.

⁵⁵⁴ Mao kana kon nganong nagaanhi kamo, mao kana kon nganong nagaduol kamo kang Cristo, tungod nagakaon man kamo sa Iyang Pulong. Ug kung nagkaaduna kamo og higayon nga sama niini, dinhi, pinaagi lamang sa Iyang gipahayag nga mga kinaiyahan, unsa pa kaha pag makasulod na kita sa Iyang Presensiya? Oh, pagkaanindot gayud niana! Ang matag usa kaninyo aduna ma'y katungod nga ayohon ang mga may sakit, ipandong lang ang inyong mga kamot nganha sa mga may sakit. Ang matag usa kaninyo aduna pu'y katungod nga magbautismo.

⁵⁵⁵ Kung aduna ma'y ania dinhi nga wala pa nabautismohan sa Ngalan ni Jesus Cristo, abli na ang bautismohan.

⁵⁵⁶ Kana lang ang bugtong paagi nga makaadto kamo, uh-huh, husto kana, ang pagtuman sa matag Pulong. Hinumdumi n'yo, usa ra ka gamay'ng bahin sa Pulong, sa sinugdang kaniadto, ang nagpahinungdan sa matag sala sa yuta. Miingon si Jesus, "Ang si kinsa man nga magataktak og usa ka Pulong gikan Niini, o magadugang og usa ka pulong ngadto Niini, dili makasulod." Ang iyang ngalan pagapapason gikan sa maong Basahon, sa higayon nga buhaton niya kana.

⁵⁵⁷ Ug wala gayu'y bahin sa Biblia diin dunay si kinsa man nga nabautismohan, sa Iglesia, sa lahi nga paagi kondili sa Ngalan gayud ni Jesus Cristo. Kung wala pa kamo nabautismohan sa ingon-anang paagi, nan mas maayo nga buhaton n'yo na kini.

⁵⁵⁸ "Oh," moingon mo, "wala man kana'y unsa man nga kalahian." Aduna gayud sa kang Eva kaniadto.

⁵⁵⁹ Ang ingon ni Satanas, "Oh, sigurado gayud, ang Dios, abi nimo ang Dios..." Apan, gibuhat gyud Niya. Mao ma'y gisulti Niya.

⁵⁶⁰ Gihatag Niya kaniadto kang Pedro ang mga susi sa Ginghamian, ug kung unsa ma'y gibugkos didto sa Pentecostes gibugkos na hangtud sa kahangturan. Mao kana'y hinungdan nga ang Pangasaw-onon gipakita pag-usab, sa ikaduhang higayon; tungod aduna ma'y usa ka Iglesia nga tinawag pagawas sa kaulahi pang panahon, maingon nga aduna usab kaniadto sa unang panahon, tukma gayud. Mitubo ang Kahoy gikan sa mga gamut niini, paingon sa Punoang Pangasaw-onon, sama sa nahitabo niadtong panahona; ang obra-maestra na usab sa Dios,

maingon sa gikasulti ko duha ka Domingo na ang milabay, aron pagadalhon ngadto sa Siyudad.

Panalanginan kamo sa Dios. “Nagatoo na ako karon.”

⁵⁶¹ Napildi na si Satanas. Nasayod man siya. Hinoon ania pa siya sa yuta, nagalibotlibot siya sama sa usa ka leon nga nagangulob. Pero dili na magdugay hangtud nga siya’y, oh, matapos na siya. Nasayod man siya sa iyang panahon. Mao nga nagalibotlibot gayud siya sama sa usa ka leon nga nagangulob.

⁵⁶² Apan, hinumdumi n’yo, nga ang Principe sa Pakigdait anaa ra nagatindog dinha; ang Maong Gamhanan nga Balaan. Ang Arkitekto sa akong pagkatawo, ang Arkitekto Nga nagbuhat kanako sa kung unsa ako, Nga nagbuhat kaninyo sa kung unsa kamo, mga ania karon. Kung ang Arkitekto, Nga nasayod kung unsaon sa pagtukod ang bilding, sa husto nga pagkahan-ay niini, si kinsa ba ang mas may kahibalo kaysa sa Arkitekto? Ug ania Siya aron pamatud-an, ang Iyang Kaugalingon, nga ania Siya.

⁵⁶³ Bueno nagadepende gihapon kana sa inyong pagtoo. Magtoo, magtoo lamang! Uh-huh.

I’m bound for that beautiful City
 My Lord has prepared for His Own;
 Where all the Redeemed of all ages
 Will sing “Glory!” around the White Throne.
 Sometimes I grow homesick for Heaven, (Pag
 matapos na kining tanan!)
 And the glory I There shall behold:
 What a joy that will be when my Saviour I see,
 In that beautiful City of gold!

⁵⁶⁴ Hinumdumi n’yo, nga sa simbahan, unyang gabii, magpahigayon sila og komunyon. Kung ania pa kamo sa siyudad, hangtud unya, kon gusto n’yong motambong, gusto sab gyud namo nga makauban kamo. Usa kana ka handumanan mahitungod sa atong pagakan-on, usa sa niining mga adlaw, uban Kaniya.

⁵⁶⁵ Gihigugma ko kamo. Dili lang ko kahibalo kung unsaon sa pagpahayag niini. Pero sa hunahuna ko kamo gayud ang asin sa kalibutan. Ug nadungog ko gani ang mahitungod sa inyong maayong kinaiya diha sa taliwala sa kalibutan, busa nagahatag kana kanako og mas dakung pagsalig diha kaninyo.

⁵⁶⁶ Apan, hunahunaa n’yo, kining gamay’ng pundok, nga mahiligugmaon sama sa kung unsa kita, magkabulag-bulag na unya, usa sa niining mga adlaw. Ngani ato kining pangandoyon. Apan kung mahitabo man nga may usa kanato nga motaliwan na sa dili pa kita magkita-kita pag-usab, nan kita’y. . .

I will meet you in the morning, by the bright
 river side,
 When all sorrow has drifted away;

I'll be standing by the portal, when the gates
open wide,
At the close of life's long, weary day.

I will meet you in the morning, by the bright
river side, (Nalimot ko sa tunga-tunga.)
. . . down by the river, and, with rapture, "auld"
acquaintance renew;

Makita ko kamo nianang higayona, og makaila gihapon
kaninyo.

You will know me in the morning, by the smile
that I wear,
I will meet you in the morning, in the City, that
is built foursquare.

⁵⁶⁷ Gusto ba ninyo kana? "Hangtud nga magkita-kita kita!"
Karon manindog na kita. *Take The Name Of Jesus With You*,
hatagi kami palihog og tono niana.

⁵⁶⁸ Gihigugma n'yo ba Siya? Dili ba Siya kahibulongan?
Nagatoo ba kamo nga Kamatuoran kini? Mopaingon ba kamo
didto, pinaagi sa grasya sa Dios? Hangtud nga makadangat na
kita didto:

Dalha ninyo ang Ngalan ni Jesus uban kaninyo,
Ingon nga usa ka Panagang sa matag lit-ag;
Ug sa diha nga ang mga panulay magapalibot
kaninyo,
Litoka lang diha sa pag-ampo ang maong
Balaan nga Ngalan.

Mao lang kana ang pagabuhaton, hangtud nga makita namo
kamo pag-usab. Sige.

Take the Name of Jesus with you,
Child of sorrow and . . . [Adunay nagaingon,
"Uyang gabii?"—Ed.] (Dili.)

It will joy and comfort give you,
Take It everywhere you go.

Precious Name, Oh how sweet!
Hope of earth and joy of Heaven;
Precious Name, Oh how sweet!
Hope of earth and joy of Heaven.


⁵⁶⁹ Bueno, gikinahanglan ko ùna nga laktawan ang akong
Mensahe. Pero sa umaabot nga adlaw, kon itugot sa Ginoo,
balikan ra nako ug hisgotan ang mahitungod niining "halapad
nga mga dalan," ug hisgotan gyud kini, kita n'yo, kon diin
magkaaduna na kita og daghang oras. Nagaingon kamo kaniadto
mahitungod sa dili nato pagpabilin og dugay. Nadugay ra gyud
tà, karon. Mainit pa gyud. Apan, karon, panalanginan kamo sa
Dios. Ganahan gyud ko og ingon-ana nga pag-awit.

⁵⁷⁰ Ngani may usa ka silingan dinhi, ang miingon, niadtong miaging gabii sa diha nga gipalong nila ang ispeker sa gawas, miingon, “Nalipay gyud ko og ayo sa Mensahe, pero nganong gihunong man ninyo kadtong maanindot nga pag-awit, kita n’yo, diha sa gawas?” Busa, silingan, kung nagapaminaw ka man niining buntaga, sa hunahuna ko aduna gyud kita og buutan kaayo nga mga silingan sa Jeffersonville. Ginaparking baya nato ang atong mga sakyanan sa atubangan sa ilang mga balay ug tanan nang uban pa; pero wala gyud sila’y unsa man nga ginasulti bahin niini; mao nga padayon ra pud tà nga nagaparking. Busa, ginapasalamatan nato sila karon.

⁵⁷¹ Oh, kahibulongan gayud Siya! Ang Dios magauban kaninyo karon.

. . . Name, Oh how sweet!
 Hope of earth and joy of Heaven.
 Till we meet!

⁵⁷² Iduko nato ang atong ulo. Ipapauli na kita sa pastor, sa pipila na lang ka gutlo. Ang Dios magauban kaninyo!

. . . we meet at Jesus’ feet; (Didto sa mahimayaong Siyudad, didto sa Trono.)
 Till we meet! till we meet!
 God be with you till we meet. . . 

64-0802 Ang Umalabot Nga Puloy-anan Sa Langitnong
Pamanhonon Ug Sa Yutan-ong Pangasaw-onon
Branham Tabernacle
Jeffersonville, Indiana U.S.A.

CEBUANO

©2021 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Pahibalo Bahin Sa Katungod Sa Pagmantala

Ang tanang katungod sa pagmantala iyaha lamang sa tag-iya. Kining basahona mahimong i-print sa printer sa balay alang sa personal nga gamit o sa pagpang-apod-apod, nga walay-bayad, ingon nga usa ka instrumento sa pagpakaylap sa Ebanghelyo ni Jesus Cristo. Kining basahona dili mahimong ibaligya, kopyahon nga pang-dinaghan, i-post sa website, i-store sa usa ka retrieval system, ihubad sa ubang pinulongan, o gamiton sa pagpangayo og mga amot nga walay ginapagawas nga kasulatan nga pagpahanugot gikan sa Voice Of God Recordings®.

Alang sa dugang nga mga kasayuran o alang sa uban pa nga ginapang-apod-apod nga mga materyales, mahimong kontakon ang:

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

www.branham.org